

## **KANDUNGAN**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 8 HINGGA NO. 89 )**

18 MEI 2015

**NOTA: [RUJUK PENYATA RASMI HARIAN (HANSARD)]**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG DIJAWAB DI DALAM DEWAN (SOALAN NO. 1 HINGGA 7 )**

**NURELFIRA BT MOHD DAUD  
CAWANGAN PERUNDANGAN  
PARLIMEN MALAYSIA**



## **PEMBERITAHUAN PERTANYAAN**

### **DEWAN RAKYAT, MALAYSIA**

**PERTANYAAN : LISAN**

**DARIPADA : PUAN NURUL IZZAH BINTI ANWAR**

**KAWASAN : LEMBAH PANTAI**

**TARIKH : 18.5.2015**

**NO. SOALAN : 8**

#### **SOALAN**

YB Nurul Izzah Binti Anwar (Lembah Pantai) minta **MENTERI PERDAGANGAN ANTARABANGSA DAN INDUSTRI** menyatakan

- (a) status terkini Analisis Kos Faedah TPPA; dan
- (b) apakah rancangan Kerajaan dalam memastikan kepentingan rakyat terjamin, terutamanya syarikat-syarikat Bumiputera untuk bersaing dengan syarikat-syarikat gergasi antarabangsa sekiranya perjanjian ini ditandatangani kelak.

#### **JAWAPAN**

Tuan Yang Dipertua,

Kerajaan sedar TPPA akan ada kos dan manfaat. Sehubungan itu, dua analisis kos faedah telah diarahkan. Satu dibuat oleh Institute of Strategic and International Studies (ISIS) dan satu lagi oleh Price Waterhouse Coopers (PwC).

Dengan mengambil kira kedudukan rundingan yang telah berubah apabila rundingan maju untuk mencari *landing zones*, analisis telah digerakkan pada suku kedua tahun ini. Kajian dijangka siap bulan Julai 2015 dan akan dibentangkan bersama-sama teks rundingan yang dimuktamadkan nanti di sesi Parlimen yang akan datang.

Tuan Yang Di Pertua,

Berhubung dengan soalan mengenai rancangan Kerajaan untuk menyediakan syarikat Bumiputera supaya lebih bersedia dalam menghadapi persaingan syarikat gergasi antarabangsa, seperti mana yang pernah saya nyatakan sebelum ini, terdapatnya kelebihan dan cabaran yang bakal dihadapi dalam menyertai TPPA.

Dari segi kelebihan, penyertaan TPPA menjangkakan:

1. **Peluang akses pasaran** – TPPA menawarkan peluang kepada Malaysia untuk menjadi sebahagian daripada pasaran pengguna yang mempunyai 800 juta orang. Selain itu, ia juga memberi akses pasaran yang lebih baik terutamanya dengan 4 negara yang masih belum ada FTA, iaitu Amerika Syarikat, Kanada, Peru, dan Mexico.
2. **Destinasi Pelaburan** – Untuk mengukuhkan lagi Malaysia sebagai hub pelaburan serantau dan Asia. Bayangkan sekiranya Malaysia menarik diri di masa sekarang, Malaysia akan menjadi destinasi pelaburan yang kurang menarik bagi bakal pelabur (berpotensi) dan pelabur yang sedia ada kerana mereka mungkin menimbang semula pelan rancangan pengembangan mereka di Malaysia

3. **Rantai Bekalan Serantau** – Malaysia perlu mengukuhkan diri sebagai sebahagian dari rantai bekalan serantau ini terutamanya meletakkan Malaysia di mana situasi yang hendak bersaing dengan negara serantau lain yang juga menyertai TPP.
4. **Ketelusan dan Tadbir Urus Yang Cekap** – TPPA seiring dengan dasar transformasi negara untuk mempromosikan tadbir urus yang cekap dan telus.

Tuan Yang Dipertua,

Walau bagaimanapun, kita perlu mengakui bahawa terdapatnya cabaran yang bakal dihadapi. TPPA dijangka akan mengundangkan pembukaan ruang ekonomi yang membawakan persaingan. Namun begitu, pembukaan pasaran sebenarnya telah berlaku semenjak tahun 1993 melalui AFTA dan lain-lain FTA yang telah ditandatangani.

Tuan Yang Dipertua,

Kerajaan akan tetap mempertahankan dasar-dasar Bumiputera. FTA seperti TPPA akan mengambil kira daya saing entiti perniagaan tempatan. Selain itu, kita harus juga melihat kepada manfaat yang dibawa di sebalik liberalisasi pasaran. Pengeksport barang dan perkhidmatan di Malaysia dijangka menikmati akses pasaran yang lebih meluas di bawah TPPA.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KETIGA,**  
**PARLIMEN KETIGA BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : YB DR. NOOR AZMI BIN GHAZALI**  
**[ BAGAN SERAI ]**

**TARIKH : 18 MEI 2015 (ISNIN)**

**SOALAN :**

**DR. NOOR AZMI BIN GHAZALI [ BAGAN SERAI ]** minta **PERDANA MENTERI** menyatakan Malaysia kini berada di pusingan lima tahun terakhir ke arah menjadi sebuah negara maju dan berpendapatan tinggi. Sejauh manakah pencapaian hingga sekarang dari sudut pendapatan dan juga kecanggihan ekonomi negara dan adakah Malaysia sudah mempunyai tahap pengetahuan, daya inovasi dan daya saing yang boleh meletakkan Malaysia setanding dengan negara maju yang lain.

**JAWAPAN: YB SENATOR DATO' SRI ABDUL WAHID OMAR,**  
**MENTERI DI JABATAN PERDANA MENTERI**

Tuan Yang di-Pertua,

Kerajaan berkeyakinan bahawa Malaysia mampu mencapai status negara berpendapatan tinggi menjelang tahun 2020 di sebalik keadaan ekonomi semasa yang mencabar. Pendekatan yang dilaksanakan di bawah RMKe-10 dan RMKe-11 juga dijangka mampu melonjakkan Malaysia beralih daripada negara berpendapatan sederhana tinggi kepada negara berpendapatan tinggi untuk mencapai pendapatan per kapita sekurang-kurangnya AS\$15,000 pada tahun 2020. Ini berdasarkan kepada prestasi ekonomi negara yang kekal mampan dan berdaya saing serta mampu mencatat pertumbuhan sebanyak 6% pada tahun 2014. Bagi tahun 2015, ekonomi negara dijangka akan berkembang antara 4.5% hingga 5.5%.

Dari sudut sosioekonomi, kadar kemiskinan telah berkurang daripada 49.3% pada tahun 1970 kepada 0.6% pada tahun 2014, manakala kemiskinan tegar telah berjaya dibasmi. Pendapatan bulanan purata isi rumah meningkat lebih 20 kali daripada RM264 pada tahun 1970 kepada RM6,141 pada tahun 2014. Dalam tempoh yang sama, pendapatan penengah meningkat daripada RM166 kepada RM4,585. Jurang pendapatan juga semakin mengecil seperti yang ditunjukkan oleh pekali Gini daripada 0.513 pada tahun 1970 kepada 0.401 pada tahun 2014.

Untuk makluman Ahli Yang Berhormat, pencapaian Malaysia juga telah diiktiraf di arena antarabangsa sebagaimana berikut:

- Merupakan negara ke-12 paling berdaya saing daripada 60 negara berdasarkan kepada *World Competitiveness Yearbook 2014, International Institute for Management Development*;
- Menduduki tangga ke-20 daripada 144 negara dalam *Global Competitiveness Report 2014-2015, World Economic Forum*;
- Menduduki tangga ke-18 daripada 189 negara dalam *Doing Business Report 2015, World Bank*; dan
- Merupakan negara 20 teratas sebagai destinasi yang mesra pelabur berdasarkan *Economist Intelligence Unit's 2014 Business Environment Rankings, 2014-2018*.

Kesemua pencapaian ini menyokong landasan bagi meletakkan Malaysia setanding dengan negara maju yang lain menjelang 2020.

Sekian. Terima kasih.

Soalan No : 10

**PEMBERITAHU PERTANYAAN DEWAN RAKYAT**

**PERTANYAAN :** LISAN

**DARIPADA :** Y.B. TUAN SIM CHEE KEONG  
[ BUKIT MERTAJAM ]

**TARIKH :** 18.5.2015

**SOALAN :**

Tuan Sim Chee Keong [ Bukit Mertajam ] minta **MENTERI PENDIDIKAN** menyatakan bilakah mekanisme pembayaran PTPTN mengikut pendapatan penghutang akan dilaksanakan.

**JAWAPAN**

Tuan Yang di-Pertua,

Kementerian Pendidikan Malaysia (KPM) memahami keadaan peminjam-peminjam yang menghadapi masalah terhadap pembayaran balik pinjaman mereka. Oleh itu, penerima-penerima pembiayaan hendaklah sentiasa mendampingkan diri dengan Perbadanan Tabung Pendidikan Tinggi Nasional (PTPTN) supaya proses pembayaran balik boleh dikemas kini dan distruktur semula berdasarkan kepada kemampuan dan kedudukan kewangan masing-masing. Di samping itu, PTPTN juga telah memperkenalkan beberapa insentif bagi menggalakkan peminjam membuat pembayaran secara konsisten seperti pemberian rebat sebanyak 10 peratus sekiranya membayar secara berterusan selama 12 bulan sehingga 31 Disember 2015 dan menawarkan diskaun 20 peratus kepada peminjam yang membuat

penyelesaian pinjaman secara sekaligus atau *lump sum* mulai 10 Oktober 2014 sehingga 31 Mac 2015.

Untuk makluman Dewan yang mulia, di bawah salah satu inisiatif dalam Pelan Pembangunan Pendidikan Malaysia 2015-2025 (Pendidikan Tinggi) melalui Lonjakan Ke 5, iaitu Kemampunan Kewangan, PTPTN sedang meneliti satu model baharu yang mesra pelanggan. Di antara cadangannya termasuklah peminjam hanya perlu membayar balik pinjaman mengikut kemampuan berdasarkan peratusan tertentu daripada jumlah pendapatannya. Model baharu yang akan diperkenalkan nanti masih dalam perbincangan bersama-sama pihak berkepentingan agar apabila dilaksanakan kelak ianya tidak membebankan mana-mana pihak.

RJM01

NO. SOALAN : 11

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB TUAN KHOO SOO SEANG  
[TEBRAU]**

**TARIKH : 18 MEI 2015 (ISNIN)**

**SOALAN :**

**YB Tuan Khoo Soo Seang [Tebrau] minta PERDANA MENTERI menyatakan apakah langkah-langkah yang dilaksanakan oleh Kerajaan untuk memastikan orang ramai lebih berhati-hati dengan spekulasi dan pemalsuan maklumat mengenai projek PR1MA.**

**JAWAPAN: YB DATO'SERI DR. SHAHIDAN BIN KASSIM,**  
**MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, pelbagai modus operandi digunakan oleh pihak yang tidak bertanggungjawab bagi menipu rakyat berhubung pembangunan perumahan PR1MA. Ingin saya tegaskan bahawa PR1MA tidak pernah melantik pihak ketiga sebagai ejen bagi menguruskan pembelian perumahan PR1MA. Pihak PR1MA juga tidak pernah mengutip wang deposit atau sebarang sumbangan sebagai jaminan bagi mendapatkan rumah PR1MA.

Pihak PR1MA mengambil serius mengenai isu ini. Beberapa inisiatif telah dilaksanakan oleh PR1MA bagi memastikan orang ramai lebih berhati-hati dengan spekulasi dan pemalsuan maklumat mengenai projek PR1MA. Notis pengiklanan di akhbar-akhbar utama tempatan telah dikeluarkan secara berkala untuk memberikan kesedaran kepada orang ramai untuk tidak terjerumus dan menjadi mangsa dalam kes penipuan ini.

Selain itu, di laman sesawang (*website*) PR1MA juga turut dimuat naik dengan notis peringatan kepada para pemohon PR1MA. Pihak PR1MA juga turut memuat naik notis peringatan melalui pelbagai medium seperti television, radio dan media sosial (*Facebook PR1MA*).

Sekian. Terima kasih.

**NO. SOALAN: 12**

**PEMBERITAHUAN PERTANYAAN BAGI JAWAB LISAN**  
**DEWAN RAKYAT**

**PERTANYAAN : LISAN**

**DARIPADA : TUAN OSCAR LING CHAI YEW [ SIBU ]**

**TARIKH : 18 MEI 2015**

**RUJUKAN : 7835**

**SOALAN:**

**Tuan Oscar Ling Chai Yew [ Sibu ]** minta **MENTERI DALAM NEGERI** menyatakan bagaimana mendapatkan Student Pass untuk kanak-kanak yang tidak ada kewarganegaraan Malaysia dan juga mana-mana kewarganegaraan lain atau tidak ada passport dan dokumen lain.

**JAWAPAN:**

**Tuan Yang di-Pertua,**

**Untuk makluman Yang Berhormat, Jabatan Imigresen Malaysia (JIM) hanya mengeluarkan pas pelajar kepada kanak-kanak warganegara asing yang masuk dan mempunyai dokumen perjalanan atau pasport yang sah untuk bersekolah di Malaysia. Manakala bagi kes di mana seseorang kanak-kanak tidak memegang sebarang kewarganeraan dan tidak jelas status di Malaysia, sesuatu dokumen perjalanan tidak dapat dikeluarkan kepada mereka. Oleh itu, secara teknikalnya mereka ini tidak memenuhi syarat untuk dikeluarkan dengan pas pelajar.**

**PEMBERITAHUAN PERTANYAAN DEWAN RAKYAT**

**PERTANYAAN** : **LISAN**

**DARIPADA** : **DATUK MAS ERMIEYATI BINTI SAMSUDIN [ MASJID TANAH ]**

**TARIKH** : **18 MEI 2015 (ISNIN)**

**SOALAN** : **Datuk Mas Ermieyati binti Samsudin [Masjid Tanah] minta **MENTERI PERTANIAN DAN INDUSTRI ASAS TANI** menyatakan impak yang telah diberikan oleh Program Turun Harga Pasar Tani yang telah diperkenalkan oleh Kementerian baru-baru ini dan sejauh mana tempoh program ini akan diteruskan.**

**JAWAPAN:**

**Tuan Yang Dipertua,**

Impak Program Jualan Turun Harga di Pasar Tani adalah seperti berikut :

- (i) Memberi nilai penjimatan antara 5 ke 20% kepada pengguna dengan anggaran sebanyak RM139 juta setahun;
- (ii) Peningkatan bilangan pengunjung ke Pasar Tani diseluruh negara sebanyak 10 hingga 20 % daripada bilangan pengunjung sedia ada antara 500 hingga 1,000 orang;

- (iii) Purata nilai jualan bagi komoditi utama di Pasar Tani meningkat sebanyak 13%; dan
- (iv) Mendorong peruncit lain untuk mengurangkan harga jualan.

Buat masa ini, program akan diteruskan memandangkan sambutan yang diterima daripada pengguna adalah amat menggalakkan.

**PEMBERITAHUAN PERTANYAAN LISAN**

**MESYUARAT KEDUA, PENGGAL KETIGA, PARLIMEN YANG KE-13**

**DEWAN RAKYAT**

**PERTANYAAN : LISAN**

**DARIPADA : DATO' SERI ABDUL HADI BIN AWANG [ MARANG ]**

**TARIKH : 18 MEI 2015 (ISNIN)**

**NO. SOALAN : 14**

**DATO' SERI ABDUL HADI BIN AWANG [ MARANG ]** minta **PERDANA MENTERI** menyatakan apakah langkah yang diambil oleh Kerajaan untuk meredakan isu sensitif seperti kaum dan agama yang boleh menimbulkan ketegangan dalam masyarakat.

**JAWAPAN:**

Tan Sri Yang Di-Pertua,

Adalah menjadi aspirasi dan harapan kerajaan agar setiap warganegara Malaysia keseluruhannya boleh hidup dalam suasana mesra, bersatupadu, bekerjasama dan saling hormat menghormati antara satu dengan yang lain, tanpa mengira kaum, agama dan latar belakang sosio-ekonomi. Suasana seperti ini akan memudahkan usaha untuk membangunkan Negara ke tahap yang lebih tinggi, sempurna dan setanding dengan negara-negara maju yang lain.

Namun, hakikatnya Kerajaan menghadapi pelbagai cabaran untuk merealisasikan aspirasi tersebut. Walaupun kesepaduan sosial (*social cohesion*) itu telah sekian lama terjalin dan wujud, namun masih terdapat segelintir masyarakat yang sengaja mempersoalkan mahupun mempertikaikan perkara-perkara tertentu yang boleh

menjadi penyumbang kepada terjejasnya perhubungan antara kaum di Negara ini. Kerajaan sentiasa berusaha melaksanakan usaha penyatuan masyarakat melalui langkah-langkah seperti berikut:

- a) **Menggalakkan penglibatan rakyat pelbagai kaum di dalam kegiatan-kegiatan kejiranan kelolaan Kawasan Rukun Tetangga di seluruh negara.**
- b) **Wujudkan penghayatan dan pemahaman kepada pelajar-pelajar sekolah dan pelajar universiti mengenai pengertian perpaduan dan prinsip-prinsip Rukun Negara, nilai-nilai murni dan aspirasi Gagasan 1Malaysia melalui Sambutan Kemerdekaan, Pertandingan Koir Lagu-lagu Patriotik, Debat Perpaduan IPT, Kelab-Kelab Rukun Negara di sekolah rendah dan menengah dan Sekretariat Rukun Negara di kolej dan institusi pengajian tinggi.**
- c) **Melatih kepimpinan peringkat akar umbi berhubung kepentingan untuk hidup bersatu padu.** Institut Kajian dan Latihan Integrasi Nasional (IKLIN) di bawah Jabatan Perpaduan Negara dan Integrasi Nasional (JPNIN) telah dipertanggungjawabkan untuk melatih ahli-ahli komuniti ke arah pemupukan perpaduan dan integrasi nasional.
- d) **Menjalinkan perkongsian strategik bersama Institusi-institusi pengajian tinggi** khasnya Institut Kajian Etnik (KITA) di UKM dan institusi pemikir (*think-tank institution*) untuk berdiskusi, berwacana, mengadakan perbincangan, mendapatkan pandangan pakar, menjalankan kajian dan penyelidikan mengenai usaha-usaha meningkatkan hubungan etnik dan perpaduan nasional.
- e) **Menggalakkan keharmonian agama dan persefahaman di kalangan penganut-penganut agama** melalui pendekatan dialog di bawah naungan Jawatankuasa Mempromosikan Persefahaman Dan Keharmonian Di Antara Penganut Agama (JKMPKA) untuk memupuk persefahaman.

- f) **Membangunkan Pelan Tindakan Perpaduan Negara (National Unity Blueprint)** yang mengesyorkan kepada Kerajaan langkah-langkah untuk meningkatkan perpaduan dan keharmonian rakyat.
- g) **Menganjurkan lebih banyak sesi perbincangan, bengkel, *contestation of ideas* dan perdebatan** melibatkan golongan muda melalui pendekatan berorientasikan idea bagi mengupas isu berbangkit dalam hubungan antara kaum seperti kontrak sosial, perkara 151 hingga 153 Perlembagaan Persekutuan dan lain-lain.
- h) **Menggalakkan penglibatan mahasiswa IPTA/IPTS di dalam program MyInternship**, suatu program *cross-fertilization* di mana pelajar bumiputera berpeluang menjalani latihan industri di syarikat-syarikat bukan bumiputera. Program ini menyediakan peluang perkongsian ilmu pengetahuan, pendedahan kepada budaya kerja dan suasana yang berbeza, jalinan hubungan dan sekali gus menepis persepsi negatif bahawa syarikat bukan bumiputera cenderung mengambil para pelatih atau pekerja di kalangan kaum mereka sendiri.
- i) **Menggalakkan penyiaran drama, filem, dokumentari oleh penerbit-penerbit swasta.** Penerbit dan pengarah filem boleh memasukkan nilai-nilai perpaduan di dalam tayangan mereka agar menjadi contoh ikutan dan amalan baik di kalangan rakyat Malaysia sebagai satu tanggungjawab sosial.

Adalah dipercayai bahawa melalui langkah-langkah, kepekaan dan kerjasama semua rakyat jelata, keharmonian dan perpaduan akan dapat terus dipupuk, keamanan dan kebahagiaan dikekalkan untuk manfaat semua rakyat dan generasi yang akan datang, selaras dengan hasrat Wawasan Negara dan Gagasan 1 Malaysia.

**NO SOALAN :15**

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATO' SERI TIONG KING SING  
(BINTULU)**

**PERTANYAAN : LISAN**

**TARIKH : 18.05.2015**

**Y.B. DATO' SERI TIONG KING SING [ BINTULU ]** minta **MENTERI KEWANGAN** menyatakan apakah langkah-langkah Kerajaan dalam memastikan Ringgit Malaysia sentiasa berdaya saing di pasaran global bagi menjamin kestabilan industri tempatan.

**JAWAPAN**

Tuan Yang di-Pertua,

1. Penyusutan kadar pertukaran nilai ringgit sejak September 2014 bukanlah suatu kes terpencil dan ianya didorong terutamanya oleh faktor luaran. Mata wang serantau yang lain, termasuk ringgit Malaysia turut

mengalami penyusutan nilai antara 1% sehingga 11.2% berbanding dolar AS sejak September 2014 hingga 13 Mei 2015. Pengukuhan dolar AS adalah disebabkan oleh prospek ekonomi AS yang semakin baik dan kemungkinan kenaikan kadar faedah di AS yang menarik minat pelabur terhadap aset dalam nilai dolar AS. Selain itu, negara-negara pengeksport komoditi, termasuk Malaysia, turut mengalami kesan ekoran kejatuhan harga minyak mentah dunia.

2. Berdasarkan perkembangan terkini, prestasi mata wang ringgit telah semakin pulih dan lebih stabil. Malahan, ringgit merupakan antara mata wang yang telah mencatatkan prestasi terbaik berbanding mata wang serantau sejak April 2015. Ringgit menambah nilai sebanyak 3.1% berbanding dolar AS. Ringgit juga menambah nilai berbanding semua mata wang serantau antara 0% sehingga 6.8%. Penambahan nilai ringgit adalah terutamanya disumbangkan oleh kenaikan harga minyak mentah global. Nilai ringgit juga turut meningkat disebabkan oleh penyusutan nilai dolar AS berikutan jangkaan pasaran terhadap penangguhan US Federal Reserve (Fed), dengan izin, untuk mengembalikan kadar faedah ke paras yang lebih wajar.

Tuan Yang di-Pertua,

3. Seperti mana-mana sistem kadar pertukaran yang fleksibel, turun naik jangka masa pendek adalah sesuatu yang mungkin berlaku, terutamanya dalam persekitaran global yang tidak menentu. Objektif dasar Kerajaan menerusi Bank Negara Malaysia (BNM) adalah untuk memastikan keadaan yang teratur dalam pasaran pertukaran asing ringgit dan mengelakkan turun naik yang ketara dalam kadar pertukaran. Ini adalah penting memandangkan Malaysia merupakan sebuah ekonomi yang sangat terbuka dengan aktiviti perdagangan dan pelaburan antarabangsa yang tinggi. Usaha-usaha yang dilaksanakan untuk membangunkan dan memperdalamkan pasaran pertukaran asing dalam negeri dari segi saiz dan instrumen juga telah membolehkan peniaga tempatan untuk berlindung daripada terdedah kepada ketidakstabilan kadar pertukaran melalui perlindungan nilai.

SOALAN NO. 16

**PEMBERITAHUAN PERTANYAAN BAGI JAWAPAN LISAN**

**MESYUARAT KEDUA, PENGGAL KETIGA,**

**PARLIMEN KETIGA BELAS,**

**MAJLIS MESYUARAT DEWAN RAKYAT**

**PERTANYAAN : JAWAB LISAN**

**DARIPADA : TUAN SHAMSUL ISKANDAR BIN MOHD AKIN  
[BUKIT KATIL]**

**TARIKH : 18 MEI 2015 (ISNIN)**

**SOALAN :**

Tuan Shamsul Iskandar bin Mohd Akin [ Bukit Katil ] minta  
MENTERI PEMBANGUNAN WANITA, KELUARGA DAN  
MASYARAKAT menyatakan adakah agenda memperkasa orang  
kurang upaya tidak menjadi agenda primer bila mana Jabatan  
Pembangunan Orang Kurang Upaya tidak diberikan taraf Ketua  
Pengarah di peringkat Kementerian.

**JAWAPAN: YB DATO' SRI ROHANI BINTI ABDUL KARIM,**  
**MENTERI PEMBANGUNAN WANITA, KELUARGA**  
**DAN MASYARAKAT**

Tuan Yang Dipertua,

Agenda memperkasakan golongan orang kurang upaya (OKU) bertujuan untuk memastikan golongan OKU mendapat kesaksamaan hak dan peluang yang sama seperti anggota masyarakat yang lain dalam semua aspek kehidupan selaras dengan matlamat untuk menggalakkan integrasi dan penyertaan penuh OKU dalam masyarakat.

Komitmen ke arah memperkasakan golongan OKU diterjemahkan dengan penggubalan Akta Orang Kurang Upaya 2008 (Akta 685). Akta ini bertujuan bagi memastikan hak, kepentingan dan kesejahteraan golongan OKU sentiasa terpelihara dengan mengadakan peruntukan bagi pendaftaran, perlindungan, rehabilitasi, pembangunan dan kesejahteraan orang OKU, penubuhan Majlis Kebangsaan Bagi OKU, dan perkara-perkara yang berkaitan dengannya. Penubuhan Jabatan Pembangunan Orang Kurang Upaya (JPOKU) yang merupakan sebuah jabatan khas yang ditubuhkan di bawah Akta Orang Kurang Upaya 2008

(Akta 685) merupakan satu mekanisme yang menyokong pelaksanaan fungsi dan perjalanan kuasa Majlis Kebangsaan Bagi OKU di bawah Akta ini. JPOKU yang ditubuhkan pada tahun 2009 bertanggungjawab bagi pendaftaran, perlindungan, rehabilitasi, perkembangan dan kesejahteraan OKU. JPOKU diketuai oleh Pengarah jabatan gred S54 dengan jumlah perjawatan seramai 27 orang yang terdiri daripada pelbagai gred jawatan.

Walaupun JPOKU tidak diketuai oleh seorang Ketua Pengarah, ia telah berjaya melaksanakan fungsi dan peranan khususnya memperjuangkan kesaksamaan hak dan peluang OKU dalam penyertaan efektif OKU dalam masyarakat.

**NO. SOALAN: 17**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB DATUK NOOR EHSANUDDIN BIN MOHD HARUN NARRASHID [ KOTA TINGGI ]**

**TARIKH : 18 MEI 2015 (ISNIN)**

**SOALAN :**

**YB Datuk Noor Ehsanuddin bin Mohd Harun Narrashid [ Kota Tinggi ]** minta **PERDANA MENTERI** menyatakan apakah langkah-langkah Kerajaan menangani isu Perlarian Rohingya.

**JAWAPAN: YB. DATO' SERI DR. SHAHIDAN BIN KASSIM**  
**MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, Kerajaan tidak mengiktiraf status pelarian dan pemohon suaka memandangkan Malaysia bukan Negara Pihak kepada Konvensyen Status Pelarian 1951 atau Protokol Status Pelarian 1967. Walau bagaimanapun, Kerajaan atas dasar kemanusiaan membenarkan Pendatang Asing Tanpa Izin (PATI) yang memegang kad UNHCR tinggal sementara di negara ini sehingga dihantar pulang ke negara asal atau ke negara ketiga. Dasar sedia ada ini juga adalah terpakai kepada PATI etnik Rohingya dari Myanmar yang memegang kad UNHCR yang sah. Isu mengenai pelarian etnik Rohingya ini merupakan isu sejagat yang memerlukan bantuan dan sokongan masyarakat antarabangsa dan bukan tanggungjawab Malaysia semata-mata.

Dalam hubungan ini, UNHCR sebagai badan di bawah Pertubuhan Bangsa-Bangsa Bersatu yang memberikan perlindungan dan mengeluarkan kad UNHCR kepada etnik Rohingya Myanmar bertanggungjawab untuk menjaga kebajikan, kehidupan harian, kesihatan, pendidikan dan sebagainya kepada pelarian yang tinggal sementara di Malaysia selaras dengan perundangan dan peraturan yang berkuatkuasa.

Kerajaan sentiasa menggesa UNHCR untuk mempercepatkan proses penghantaran pulang pelarian ini ke negara asal atau ke negara ketiga khususnya dari Myanmar kerana ia menimbulkan pelbagai masalah dari

segi ekonomi, sosial, ketenteraman awam dan keselamatan negara. Dalam hal ini, Kerajaan Myanmar memainkan peranan penting dalam mewujudkan keamanan dan keselamatan di Rakhine State, Myanmar bagi memastikan etnik Rohingya Myanmar ini dapat pulang semula ke negara asal mereka.

Sekian. Terima kasih.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB DATO' DR. MUJAHID YUSOF RAWA**

**[ PARIT BUNTAR ]**

**TARIKH : 18 MEI 2015 (ISNIN)**

**SOALAN :**

**YB Dato' Dr. Mujahid Yusof Rawa [ Parit Buntar ] minta PERDANA MENTERI menyatakan berapakah jumlah tangkapan aktiviti penyeludupan yang berjaya dilaksanakan oleh Agensi Pengutkuasaan Maritim Malaysia di kawasan berhampiran Parlimen Parit Buntar dan apakah jenis penyeludupan dan tindakan yang dilakukan oleh pihak berkuasa terbabit.**

**JAWAPAN: YB DATO' SERI DR SHAHIDAN BIN KASSIM,  
MENTERI DI JABATAN PERDANA MENTERI**

Tuan Yang di-Pertua,

Pada 26 Ogos 2009, Jemaah Menteri telah memutuskan bahawa Agensi Penguatkuasaan Maritim Malaysia (APMM) sebagai agensi penguatkuasaan tunggal yang dipertanggungjawab sepenuhnya bagi pengawalan, penguatkuasaan undang-undang dan pengawasan di laut.

Aktiviti penyeludupan merupakan aktiviti jenayah yang kerap berlaku di Zon Maritim Malaysia. Sebanyak 647 kes tangkapan telah berjaya dilakukan oleh APMM bermula dari tahun 2006 sehingga 15 Mei 2015. Bagi kes penyeludupan di kawasan berhampiran Parlimen Parit Buntar di bawah tanggungjawab Daerah Maritim 3 yang berpangkalan di Lumut, Perak, sebanyak 12 tangkapan aktiviti penyeludupan telah berjaya dilakukan. Tangkapan yang dilaksanakan adalah seperti berikut:

- i. 3 kes di bawah Akta ATIPSOM 2007 (2 kes pada 2014 dan 1 kes pada 2015);
- ii. 3 kes di bawah Akta 716 (Pemuliharaan Hidupan Liar) (1 kes pada 2013, 1 kes pada 2014 dan 1 kes pada 2015);
- iii. 3 kes di bawah kesalahan Rokok (3 kes pada 2011)
- iv. 2 kes di bawah kesalahan Kultur Kerang (1 kes pada 2008 dan 1 kes pada 2010); dan
- v. 1 kes di bawah Akta KPDKKK (Daging) pada tahun 2012.

Bagi tindakan untuk menyekat atau menangkap mereka yang terlibat dengan kes penyeludupan pula, APMM sentiasa melaksanakan rondaan secara berterusan terutamanya di kawasan sempadan perairan Negara.

Kerjasama yang baik bersama dengan komuniti nelayan dan perkapalan telah banyak membantu APMM dalam menangani kes penyeludupan di laut. Selain itu, jaringan kerjasama dengan agensi penguatkuasaan yang lain juga dilaksanakan dalam operasi secara bersepadu bagi membanteras jenayah di laut.

Sekian. Terima kasih.

**NO. SOALAN: 19**

**PEMBERITAHUAN PERTANYAAN BAGI JAWAB LISAN**  
**DEWAN RAKYAT**

**PERTANYAAN : LISAN**

**DARIPADA : DATUK SERI PANGLIMA HAJI ABDUL  
GHAPUR BIN HAJI SALLEH [ KALABAカン ]**

**TARIKH : 18 MEI 2015**

**RUJUKAN : 7836**

**SOALAN:**

**Datuk Seri Panglima Haji Abdul Ghapur bin Haji Salleh [ Kalabakan ]  
minta MENTERI DALAM NEGERI menyatakan :-**

- (a) apakah benar dakwaan bahawa jumlah anggota polis di Tawau tidak mencukupi untuk memantau dan membanteras jenayah di Tawau dengan efektifnya; dan
- (b) jika benar, apakah pelan tindakan Kementerian untuk mengatasi kekurangan ini.

**JAWAPAN:**

**Tuan Yang di-Pertua,**

Bagi menjawab soalan (a), di bawah Perancangan Strategik PDRM telah mengunjurkan gunatenaga semasa yang diperlukan sejumlah 150,000 orang pegawai dan anggota selaras dengan transformasi PDRM untuk menyediakan perkhidmatan yang bertaraf “*World Class Policing*” di samping mencapai sasaran di bawah “*Government Transformation Programme (GTP)*”. Pada dasarnya, pihak Kerajaan telah meluluskan sebanyak 4,000 perjawatan baru bagi setiap tahun mulai tahun 2012 sehingga 2015 bagi tujuan memperkasakan lagi perkhidmatan polis kepada masyarakat.

**Statistik keanggotaan bagi Ibu Pejabat Polis Daerah Tawau, Sabah yang merangkumi balai-balai polis seperti berikut:-**

PANGKAT	GRED	KEKUATAN
ACP	YA22	1
SUPT	YA20	1
DSP	YA18	2
ASP	YA16	11
INSP	YA13/YY14	27
<b>JUMLAH PEGAWAI KANAN POLIS</b>		<b>42</b>
SI	YA10	2
SI/D	YA10	2

SM	YA8	9
SM/D	YA8	3
SJN/SM/D	YA5/YA8	18
SJN/SM	YA5/YA8	27
KPL/SJN/SM	YA4/YA8	16
KPL	YA4/YY4	57
KPL/D	YA4	10
KONS/L/KPL/KPL	YA1/YA4	182
KONS/L/KPL/KPL/D	YA1/YA4	29
<b>JUMLAH PRP &amp; KONS</b>		355
KPL/S	YT4	2
KONS/L/KPL/KPL/S	YT1/YT2/YT4	48
<b>JUMLAH PRP &amp; KONS/S</b>		50
<b>JumlahKeseluruhan</b>		447

**Keanggotaan yang sedia ada bagi IPD Tawau ketika ini adalah berkemampuan untuk melaksanakan tugas kepolisan bagi memantau dan membanteras jenayah dengan efektif. Namun begitu kajian sentiasa dilakukan dari masa ke semasa untuk menambah bilangan anggota di setiap daerah selaras dengan pembangunan dan pertambahan penduduk di sesuatu daerah bersesuaian dengan keadaan semasa.**

**Bagi menjawab soalan (b), untuk kajian menaiktaraf pangkat dan mengukuhkan perjawatan di balai-balai polis serta di Ibu Pejabat Polis Daerah, pihak PDRM sedang membuat kajian menyeluruh di Semenanjung, Sabah dan Sarawak untuk dikemukakan kepada agensi**

**pusat. Kajian yang dibuat adalah berdasarkan kepada kedudukan balai berkenaan serta fungsi dan beban tugas yang dipikul oleh balai berkenaan mengikut kategori berikut:-**

- i) **Balai Polis Metropolitan**
- ii) **Balai Polis Bandar**
- iii) **Balai Polis di luar Bandar**
- iv) **Balai Polis di Pulau-pulau**
- v) **Balai Polis di Sempadan Antarabangsa**
- vi) **Balai Polis di Lapangan Terbang (antarabangsa dan domestik) serta di Pelabuhan-pelabuhan.**
- vii) **Balai Polis di Kawasan Pendalaman, Kawasan Felda, Perkampungan Orang Asli, kampung-kampung baru dan sebagainya.**

**Faktor-faktor yang akan diambil kira adalah seperti berikut:-**

- i) **Faktor sosial ekonomi, dilihat dari segi pekerjaan, tahap ekonomi penduduk, kawasan industri, kawasan perbankan dan lain-lain lagi.**
- ii) **Faktor kompleksiti penugasan, dengan mengambil kira perkara-perkara yang perlu ada dalam mewujudkan sebuah balai atau ibu pejabat polis iaitu mesti ada (*Must have*), patut ada (*Should have*) dan elok jika ada (*Nice to have*).**

**Selain daripada kajian pengukuhan perjawatan, kajian tersebut juga mengambil kira bebanan kewangan yang akan ditanggung oleh Kerajaan dari segi emolumen serta keperluan logistik yang lain.**

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. PUAN SITI ZAILAH BINTI MOHD YUSOFF  
(RANTAU PANJANG)**

**PERTANYAAN : LISAN**

**TARIKH : 18.05.2015**

**Y.B. PUAN SITI ZAILAH BINTI MOHD YUSOFF [ RANTAU PANJANG ]**

minta **MENTERI KEWANGAN** menyatakan kedudukan hutang negara dalam dan luar negara terkini berbanding dengan KDNK serta kesan penurunan nilai ringgit serta Indeks Harga Pengguna (CPI) terkini.

**JAWAPAN**

Tuan Yang Di-Pertua,

Untuk makluman Ahli Yang Berhormat, jumlah **hutang Kerajaan Persekutuan pada akhir Mac 2015 adalah sebanyak RM596.8 bilion atau 52.1% daripada Keluaran Dalam Negeri Kasar (KDNK).**

Daripada jumlah berkenaan, **97% atau RM579.2 bilion adalah hutang domestik, sementara bakinya RM17.6 bilion atau 3% merupakan pinjaman luar pesisir.** Kedudukan hutang Kerajaan Persekutuan kekal terurus dan dikategorikan sebagai negara keberhutangan sederhana.

2. Lazimnya, penyusutan nilai ringgit akan menyebabkan kenaikan kos import. Peningkatan ini akan menyebabkan kesan langsung terhadap Indeks Harga Pengguna (IHP) yang mengukur inflasi kerana harga barang yang diimport secara terus dari luar negara akan menjadi lebih mahal. Walau bagaimanapun, dalam persekitaran harga minyak yang rendah dengan ketara, kesan terhadap kadar inflasi adalah kecil, antaranya disebabkan oleh jumlah barang import tidak termasuk petrol dan diesel mencakupi hanya 7.2% daripada bakul IHP. Malahan dalam tempoh suku pertama 2015, harga import pada peringkat pengeluar telah mencatatkan penurunan sebanyak 0.3%.

3. Dari sudut keseluruhan IHP, bagi tempoh tiga bulan pertama 2015, inflasi hanya meningkat perlahan, iaitu 0.7% berbanding 3.4% bagi tempoh yang sama tahun lepas. Bagi bulan Januari 2015, inflasi meningkat sederhana sebanyak 1% berbanding bulan sebelumnya (Disember 2014: 2.1%) disebabkan oleh pengurangan harga pam petrol RON97 dan RON95

**SULIT**

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KETIGA BELAS**

---

**PERTANYAAN : LISAN**

**DARIPADA : IR. SHAHARUDDIN BIN ISMAIL  
[ KANGAR - BN ]**

**TARIKH : 18 MEI 2015 (ISNIN)**

**SOALAN (NO. 21)**

Minta **MENTERI BELIA DAN SUKAN** menyatakan adakah Kementerian bercadang untuk mewujudkan “Laman Belia” di kawasan Parlimen Kangar yang berfungsi sebagai platform kepada golongan belia melakukan aktiviti riadah dan sukan serta rekreasi di sebuah kawasan khas serta boleh dijadikan sebagai model sekiranya ia berjaya menjadi tempat berkumpul secara sihat golongan muda masa kini.

serta diesel di bawah mekanisme apungan terurus menyak petrol meskipun negara menghadapi gangguan bekalan makanan akibat banjir di beberapa negeri. Peningkatan inflasi semakin perlahan pada bulan Februari kepada 0.1% berikutan penurunan harga minyak. Walau bagaimanapun, inflasi meningkat sedikit pada bulan Mac kepada 0.9% dengan penyelarasan harga minyak sebanyak 25 sen seliter pada 1 Mac 2015. Dengan mengambil kira perkembangan terkini, kadar inflasi negara bagi tahun 2015 diunjurkan akan berada dalam lingkungan 2%-3%. Sehingga kini, inflasi masih berada pada paras yang terkawal.

**SULIT**

**JAWAPAN**

Yang di-Pertua,

Kementerian telah menyediakan Kompleks Belia dan Sukan Negeri Perlis yang turut berfungsi sebagai Laman Belia dan pusat setempat (*one stop centre*) serta menyediakan tempat pelaksanaan aktiviti di kalangan belia seperti gimnasium rakyat, gelanggang badminton, bilik mesyuarat dan sebagainya. Pada masa yang sama, Kementerian sedang dalam usaha kajian untuk mentransformasikan kompleks-kompleks belia dan sukan sedia ada seluruh Malaysia agar mengikuti trend dan cita rasa belia masa kini dan menjadi tempat berkumpul secara sihat golongan muda masa kini.

Sekian, terima kasih.

**PEMBERITAHUAN PERTANYAAN DEWAN RAKYAT**  
**JAWAPAN OLEH YB DATUK SERI DR. S. SUBRAMANIAM**  
**MENTERI KESIHATAN MALAYSIA**

**PERTANYAAN :** **LISAN**

**DARIPADA :** **YB LAKSAMANA PERTAMA MOHAMAD**  
**IMRAN BIN ABD HAMID (B) [ LUMUT ]**

**TARIKH :** **18 MEI 2015**

**SOALAN :**

**YB Laksamana Pertama Mohamad Imran Bin Abd Hamid (B) [Lumut]** minta **MENTERI KESIHATAN** menyatakan langkah-langkah membasmi tibi setelah mendapati tujuh (7) pelajar Kolej Matrikulasi Johor dijangkiti wabak ini, begitu juga dengan kematian Dr. Iskandar Rosli di Hospital Sungai Buloh yang dikatakan disebabkan penyakit ini.

**Tuan Yang Di Pertua,**

Kementerian Kesihatan Malaysia (KKM) sedia maklum bahawa penyakit Tibi merupakan penyakit berjangkit kedua utama di Malaysia selepas Denggi. Pada tahun 2014, sejumlah **24,711 kes** (kadar notifikasi 81 setiap 100,000 penduduk) telah direkodkan iaitu peningkatan sebanyak **2.7%** berbanding **24, 071 kes** pada tahun 2013.

**Tuan Yang Di Pertua,**

Penyakit Tibi merebak melalui udara dan boleh menjangkiti sesiapa sahaja yang berada berdekatan, apabila individu yang telah dijangkiti

*Mycobacterium Tuberculosis* tersebut batuk atau bersin. Penyakit Tibi lebih mudah merebak di kawasan atau institusi seperti Pusat Koreksional, Pusat jagaan serta Kediaman asrama kerana kepadatan penduduk.

Berkaitan kes tujuh (7) pelajar Kolej Matrikulasi Johor yang dijangkiti penyakit Tibi, Kementerian Kesihatan telah melakukan perkara berikut;

- i. Aktiviti siasatan kes, saringan kontak dan pendidikan kesihatan telah dilakukan oleh Pejabat Kesihatan Daerah Ledang setelah menerima notifikasi penyakit Tibi dari Klinik Kesihatan Paya Mas;
- ii. Sejumlah 2,708 pelajar serta kakitangan KMJ telah disaring penyakit Tibi. Daripada jumlah tersebut didapati empat (4) pelajar positif saringan kahak dan telah dimulakan rawatan Tibi manakala 3 kes lagi adalah melalui ujian dan pemeriksaan dari Klinik Kesihatan Paya Mas. Kes-kes yang di dalam rawatan akan disusuli di dalam program pengurusan rawatan atau *Directly Observed Therapy (DOT)*;
- iii. Pengasingan bagi pergerakan pelajar, penggunaan topeng muka (*face mask*) dan penerangan etika batuk bagi individu yang mempunyai gejala Tibi telah dilakukan bagi pencegahan penularan penyakit ini. (Ringkasan laporan wabak seperti di Lampiran 1); dan
- iv. Secara keseluruhannya, Kementerian sentiasa berusaha memperkuatkannya Pelan Strategik Kawalan Tibi Kebangsaan (2011-2015) dengan fokus utama pengesanan dan rawatan awal penyakit Tibi sehingga pesakit sembuh.

**Tuan Yang Di Pertua,**

KKM sentiasa peka bahawa selain rakyat biasa, anggota kesihatan termasuklah doktor yang merawat pesakit juga mempunyai risiko yang tinggi mendapat penyakit Tibi. Pada tahun 2014, rekod Kementerian menunjukkan sejumlah **273 kes** Tibi berlaku di kalangan Anggota Kementerian Kesihatan Malaysia berbanding **249 kes** pada tahun 2013 (Lampiran 2).

Untuk makluman, Dr. Iskandar Rosli disahkan telah dijangkiti penyakit Tibi jenis Pulmonari Tibi- kahak Negatif dan penyebab kematian beliau adalah disebabkan oleh komplikasi penyakit lain dan bukanlah disebabkan oleh Tibi.

Kementerian sentiasa memperkuuhkan Program Pencegahan Tibi di semua lapisan masyarakat termasuklah anggota kesihatan sepermata berikut;

- i. Saringan secara sistematik Tibi aktif di kalangan anggota kesihatan yang berisiko bagi tujuan pengesanan dan rawatan awal. Pada tahun 2013, sejumlah 30,331 anggota kesihatan telah disaring dan 33 anggota dikesan dan dirawat penyakit Tibi aktif;
- ii. Pelaksanaan operasi *Guidelines on Prevention and Management of Tuberculosis for Healthcare Workers in Ministry of Health Malaysia (2012)* di semua kemudahan kesihatan;

- iii. Mengadakan latihan dalam perkhidmatan berkaitan Kawalan Jangkitan berkaitan pencegahan penyakit Tibi kepada semua kategori anggota kesihatan secara berterusan dan berkala; dan
- iv. Memastikan anggota kesihatan sentiasa mengamalkan amalan *Standard Precaution-Personnel Protection Equipment (PPE)* untuk melindungi daripada jangkitan Tibi.

**Tuan Yang Di Pertua,**

KKM sentiasa berusaha memperkuatkan program pencegahan dan rawatan Tibi di Malaysia. Hasrat Kementerian adalah selaras dengan misi Pertubuhan Kesihatan Sedunia (WHO) iaitu menamatkan epidemik Tibi menjelang tahun 2050.

**NO. SOALAN: 23**

**PEMBERITAHUAN PERTANYAAN BAGI JAWAB LISAN**  
**DEWAN RAKYAT**

**PERTANYAAN : LISAN**

**DARIPADA : DATO' AR. WAN MOHAMMAD**  
**KHAIR-IL ANUAR BIN WAN AHMAD**  
**[ KUALA KANGSAR ]**

**TARIKH : 18 MEI 2015**

**RUJUKAN : 7837**

**SOALAN:**

**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI DALAM NEGERI** menyatakan usaha-usaha yang akan dijalankan bagi memaksimakan aplikasi MyKad untuk urusan harian.

**JAWAPAN :**

**Tuan Yang di-Pertua,**

**Kad Pengenalan Biru bertaraf Warganegara Malaysia (MyKad)** telah dilengkapi dengan aplikasi pengenalan diri, lesen memandu, maklumat pasport, maklumat kesihatan, *Touch n Go* dan **Aplikasi Prasarana Kekunci Awam (Public Key Infrastructure, PKI)**.

**Sehingga kini, penggunaan MyKad telah turut diperluaskan untuk kegunaan agensi melalui aplikasi *on card* oleh Lembaga Pemasaran Pertanian Persekutuan (FAMA), Jabatan Perikanan Malaysia (DOF), Jabatan Keselamatan dan Kesihatan Pekerjaan (DOSH) dan Lembaga Kemajuan Ikan Malaysia (LKIM). Melalui aplikasi ini, agensi dapat membuat pengesahan maklumat pemegang MyKad dan juga dapat menyimpan maklumat berkaitan aplikasi agensi masing-masing di dalam MyKad dengan persekitaran yang selamat dan terkawal. MyKad juga telah digunakan sebagai medium untuk pengesahan diri secara sepenuhnya oleh bank-bank, Lembaga Tabung Haji (TH), Kumpulan Wang Simpanan Pekerja (KWSP) dan banyak lagi termasuk syarikat-syarikat peruncitan.**

**Selain itu, Kementerian Dalam Negeri (KDN) melalui Jabatan Pendaftaran Negara (JPN) turut menggalakkan dan menyokong syarikat pembangun aplikasi dan pembekal alat pembaca kad**

**membangunkan aplikasi yang boleh menggunakan MyKad untuk tujuan pengesahan identiti diri bagi memaksimakan penggunaan MyKad. Antara aplikasi tersebut adalah *branchless banking*, pendaftaran maklumat pelawat, pemantauan kehadiran di sekolah memandu dan lain-lain lagi.**

**Tuan Yang di-Pertua,**

**Pihak Kementerian Dalam Negeri melalui Jabatan Pendaftaran Negara turut mengambil kira kepentingan untuk memupuk kesedaran orang ramai terhadap kemudahan penggunaan MyKad dalam urusan harian. Dalam hal ini, maklumat mengenai promosi MyKad telah dipaparkan di belakang resit urusniaga kaunter Jabatan Pendaftaran Negara. Selain itu, Jabatan Pendaftaran Negara juga telah dan akan terus mempromosi aplikasi MyKad melalui program Hari Bertemu Pelanggan, pameran sempena Hari Jabatan Pendaftaran Negara dan lain-lain pameran anjuran agensi-agensi kerajaan seperti Pameran Anti Dadah, Pameran Sempena Minggu ICT dan sebagainya.**

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**  
**DARIPADA : DATUK HAJI SHABUDIN BIN YAHYA**  
**[TASEK GELUGOR]**  
**TARIKH : 18.05.2015 (ISNIN)**

**DATUK HAJI SHABUDIN BIN YAHYA** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah status berkenaan caj perkhidmatan yang dikenakan oleh pihak restoran atau hotel dan sejauh manakah usahakan Kerajaan dalam memastikan rakyat tidak membayar lebih akibat dari pengenaan caj perkhidmatan ini.

**JAWAPAN:**

**Tuan Yang Di-Pertua,**

Caj perkhidmatan mula diperkenalkan pada tahun 1970an dan **telah dipraktikkan oleh industri perhotelan & restoran mewah.** Kutipan caj ini **adalah menggantikan sistem pemberian tips** yang dilihat tidak praktikal kerana hanya pekerja di barisan hadapan sahaja yang akan menerima *tips* tersebut. Selain itu, caj ini juga **merupakan sebahagian daripada upah** dan dipersetujui dalam *collective agreement* (CA) (mempunyai kesatuan sekerja) atau *contract of service* (CS) (tidak mempunyai kesatuan sekerja).

Kadar agihan bagi kutipan caj perkhidmatan dan penetapan untuk menghapuskannya adalah mengikut persetujuan antara majikan dan pekerja. Oleh sebab itu, Kerajaan tidak terlibat dengan penetapan kadar dan urusan pemansuhan caj perkhidmatan tersebut.

**Tuan Yang Di-Pertua,**

Untuk makluman, Kerajaan telah memutuskan bahawa buat masa ini pihak industri perhotelan dan restoran yang mempunyai CA dan CS antara majikan dengan pekerja sahaja yang boleh mengenakan caj perkhidmatan. Namun, pihak hotel dan restoran perlu memaparkan notis di premis perniagaan untuk memberi makluman kepada pengguna mengenai pengenaan caj perkhidmatan tersebut. Melalui pemaparan notis ini, pengguna dapat membuat pilihan sama ada ingin menggunakan perkhidmatan di premis tersebut atau tidak.

Sehubungan itu, pihak industri adalah tertakluk kepada peraturan P.U.(A)79 yang diwartakan pada 23 April 2015 berkenaan Penandaan Caj Perkhidmatan Bagi Hotel dan Restoran di bawah Akta Kawalan Harga dan Antipencatutan 2011 yang berkuatkuasa pada 1 Mei 2015. Kegagalan peniaga untuk mematuhi peraturan ini boleh dikenakan tindakan di bawah Perkara 5, P.U.(A)79 Perintah Kawalan Harga dan Antipencatutan (Penandaan Caj Perkhidmatan Bagi Hotel dan Restoran) 2015 dan jika disabitkan kesalahan, boleh didenda tidak melebihi RM100,000.00.

Kutipan caj perkhidmatan hendaklah diagihkan kepada pekerja berdasarkan kadar yang telah dipersetujui seperti yang terkandung di dalam CA dan CS. Sekiranya majikan gagal mengagihkan caj perkhidmatan seperti yang dipersetujui dalam CA dan CS, maka pekerja boleh membuat aduan kepada **Jabatan Perhubungan Perusahaan/Mahkamah Perusahaan** atas kesalahan gagal mematuhi CA atau di **Jabatan Tenaga Kerja** kerana gagal mematuhi CS.

**SOALAN NO: 25**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : TUAN SIM TONG HIM [ KOTA MELAKA ]**

**TARIKH : 18 MEI 2015**

**SOALAN :**

**Tuan Sim Tong Him [ Kota Melaka ]** minta **PERDANA MENTERI** menyatakan sejak tahun 2000 hingga tahun 2015, berapakah Laporan Suruhanjaya Hak Asasi Manusia Malaysia (SUHAKAM) yang telah dibentangkan kepada Parlimen dan di antaranya berapa laporan yang dapat dibahas oleh Ahli Parlimen dan nyatakan cadangan yang dikemukakan dan tindakan yang telah diambil.

Merujuk persoalan yang dibangkitkan oleh Yang Berhormat tentang jumlah laporan yang dapat dibahas oleh Ahli Parlimen, tiada peruntukan didalam Akta 597 yang mengkehendaki laporan tahunan SUHAKAM tersebut dibahaskan. Namun, ini tidak bermakna Kerajaan menghalang mana-mana ahli-ahli Parlimen dari membahaskan laporan tahunan tersebut kerana masih terdapat ruang sedia ada yang disediakan oleh Dewan Rakyat bagi membahaskannya. Ruang yang dimaksudkan ini termasuklah ketika sesi perbahasan Titah Diraja pada sesi pembukaan Parlimen, sesi pembentangan bajet tahunan dan juga sesi pertanyaan-pertanyaan bagi jawab lisan atau bukan lisan oleh Menteri-menteri. Berdasarkan laporan tahunan yang telah dikemukakan, Kerajaan mulai tahun 2006 melalui agensi di bawah koordinasi Bahagian Hal ehwal Undang-Undang (BHEUU), Jabatan Perdana Menteri telah mengemukakan maklumbalas secara bertulis terhadap Laporan Tahunan SUHAKAM. Maklumbalas ini mengandungi jawapan-jawapan terhadap isu-isu yang dibangkitkan dalam laporan tahunan tersebut dan dibawa perhatian ke Jemaah Menteri seterusnya dibawa ke pengetahuan ahli-ahli Parlimen dan SUHAKAM sendiri.

Bagi menggalakkan minat serta perhatian ahli-ahli Parlimen kepada isu-isu yang dibangkitkan dalam laporan tahunan, Kerajaan menggalakkan Suhakam agar lebih kerap melakukan pertemuan, dialog serta *engagement* agar ahli-ahli Parlimen dapat memahirkan diri dengan *subject* dan *complexities* isu-isu yang ditimbulkan oleh laporan tahunan tersebut. Usaha sedemikian diharap akan dapat mempertingkatkan lagi rasa minat dan perhatian di kalangan ahli-ahli Parlimen terhadap isu-isu hak asasi manusia yang berkait rapat dengan kehidupan seharian manusia.

Sekian, terima kasih.

**JAWAPAN: YB SENATOR DATUK PAUL LOW SENG KUAN**  
**MENTERI DI JABATAN PERDANA MENTERI**

Tuan Yang Dipertua,

Akta Suruhanjaya Hak Asasi Manusia Malaysia 1999 [Akta 597] melalui Seksyen 21(1) menjelaskan keperluan pihak Suhakam mengemukakan suatu laporan tahunan kepada Parlimen mengenai segala aktivitinya di sepanjang tahun yang dilaporkan itu. Manakala Seksyen 21 (2) pula menetapkan laporan tersebut hendaklah mengandungi antara lain aktiviti-aktiviti utama yang telah dijalankan oleh Suhakam seperti kajian tematik, seminar, ceramah, sesi perundingan, dialog serta persidangan peringkat nasional dan antarabangsa. Semenjak penubuhan Suhakam pada tahun 2000, sebanyak 15 Laporan Tahunan telah dibentangkan oleh pihak Suhakam kepada Parlimen. Pelaporan aktiviti-aktiviti ini juga adalah selaras dengan fungsi dan kuasa utama SUHAKAM di bawah seksyen 4 Akta SUHAKAM 1999.

Bagi tahun 2014, terdapat beberapa isu-isu utama telah diberi tumpuan oleh SUHAKAM. Isu-isu tersebut antara lain adalah Laporan Inkiri Nasional Mengenai Hak Tanah Orang Asal/Asli di Malaysia (Laporan NI), kematian di dalam Tahanan Polis yang mana mengandungi laporan penuh kajian berhubung punca kematian dalam tahanan, pemerhatian dan hasil penemuan(findings) SUHAKAM, pengenalan Pelan Tindakan Hak Asasi Manusia Nasional (NHRAP) yang bermatlamat memastikan skop pelan boleh dilaksana dan dihasilkan berdasarkan konsultasi dengan semua pihak berkepentingan serta mengutamakan penyertaan kepada triti utama hak asasi manusia antarabangsa dan syor-syor Penilaian Penggalan Sejagat (UPR) Malaysia. Selain itu, hak kepada Kesihatan di Penjara, Pendidikan Hak Asasi di Sekolah, alternatif kepada penahanan imigresen terhadap Kanak-kanak serta Kebebasan Berhimpun turut diberi perhatian.

**MESYUARAT KEDUA, PENGGAL KETIGA  
PARLIMEN KETIGA BELAS TAHUN 2015  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : JAWAB LISAN**

**DARIPADA : TUAN HAJI HASBI BIN HAJI  
HABIBOLLAH (LIMBANG)**

**TARIKH : 18 MEI 2015, ISNIN**

**SOALAN : 26**

Minta **MENTERI KEMAJUAN LUAR BANDAR DAN WILAYAH** menyatakan pertimbangan untuk membina sebuah Kolej MARA di Parlimen Limbang sebagai pemangkin untuk melahirkan modal insan dari kawasan utara Sarawak.

**JAWAPAN :**

Tuan Yang Di-Pertua,

Untuk makluman YB, pada masa sekarang terdapat enam (6) buah Kolej MARA yang terdapat di seluruh negara iaitu Kolej MARA Seremban, Kolej MARA Banting, Kolej MARA Kulim, Kolej MARA Kuala Nerang dan Kolej MARA KETENGAH. MARA akan mengkaji keperluan cadangan untuk membina sebuah Kolej MARA di Parlimen Limbang dan akan mengemukakan cadangan ini kepada Unit Perancang Ekonomi, Jabatan Perdana Menteri untuk pertimbangan dan kelulusan.

**PEMBERITAHU PERTANYAAN DEWAN RAKYAT**

**PERTANYAAN :** LISAN

**DARIPADA :** Y.B. DATUK BUNG MOKTAR BIN RADIN  
[ KINABATANGAN ]

**TARIKH :** 18.5.2015

**SOALAN :**

**Datuk Bung Moktar bin Radin [ Kinabatangan ]** minta **MENTERI PENDIDIKAN** menyatakan perancangan pihak Kementerian dalam mewujudkan sebuah kolej komuniti di Kinabatangan memandangkan terdapatnya keperluan dan permintaan. Tapak bagi tujuan pembinaan kolej komuniti ini adalah tersedia. Ini adalah selaras dengan dasar Kementerian Pendidikan bagi “1 Kolej Komuniti, 1 Parlimen”.

**JAWAPAN**

Tuan Yang di-pertua,

Untuk makluman Ahli Yang Berhormat, penubuhan sesebuah institusi pengajian tinggi awam (IPTA) termasuk politeknik atau kolej komuniti mengambil kira pelbagai aspek seperti keperluan guna tenaga negara, keperluan strategik pembangunan negara dan keupayaan pembiayaan kerajaan.

Jemaah Menteri dalam mesyuaratnya pada 8 September 2004 bersetuju bahawa kolej-kolej komuniti dibangunkan berdasarkan kepada keperluan di sesebuah kawasan dan bukannya di setiap daerah atau Parlimen memandangkan terdapat kawasan yang tidak mempunyai ramai penduduk (kepadatan rendah).

Pada masa ini, telah terdapat lapan (8) buah kolej komuniti di negeri Sabah iaitu Kolej Komuniti Tawau, Kolej Komuniti Lahad Datu, Kolej Komuniti Beaufort, Kolej Komuniti Semporna, Kolej Komuniti Sandakan, Kolej Komuniti Tambunan, Kolej Komuniti Penampang dan Kolej Komuniti Kota Marudu. Oleh itu, Kementerian Pendidikan Malaysia berpandangan kolej komuniti sedia ada yang berhampiran seperti Kolej Komuniti Tawau dan Kolej Komuniti Lahad Datu masih mampu menampung permintaan daripada lepasan sekolah menengah di Parlimen Kinabatangan dan persekitarannya.

Pihak Kementerian akan terus berusaha memperluaskan akses pendidikan dan latihan bagi menyumbang kepada kemajuan sosio-ekonomi dan pemikiran masyarakat di Parlimen Kinabatangan melalui pendidikan yang relevan dan bermanfaat pada masa hadapan. Kementerian mengambil maklum dan memberi perhatian terhadap cadangan Ahli Yang Berhormat serta akan berusaha untuk melihat keperluan berkenaan berdasarkan keupayaan kewangan kerajaan.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KETIGA,**  
**PARLIMEN KETIGA BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : YB DATO' WIRA OTHMAN BIN ABDUL**  
**[ PENDANG ]**

**TARIKH : 18 MEI 2015 (ISNIN)**

**SOALAN :**

**Dato' Wira Othman bin Abdul [ Pendang ]** minta **PERDANA MENTERI** menyatakan berapakah perbelanjaan untuk Orkestra Philharmonic dan perlumbaan F1 oleh **PETRONAS** dibandingkan dengan perbelanjaan untuk membantu usahawan bumiputera.

**JAWAPAN: YB SENATOR DATO' SRI ABDUL WAHID OMAR,  
MENTERI DI JABATAN PERDANA MENTERI**

Tuan Yang di-Pertua,

Kewujudan Dewan Filharmonik PETRONAS (“DFP”) dan perlumbaan F1 adalah bagi tujuan mengketengahkan Malaysia sebagai sebuah pusat pelancongan, kebudayaan dan sukan permotoran yang unggul di rantau ini. Penglibatan PETRONAS di dalam usaha-usaha ini adalah sebahagian daripada tanggungjawab sosial korporat (*Corporate Social Responsibility*) bagi menyokong pembangunan modal insan (mengketengahkan pelumba muda tempatan yang berbakat seperti Jazeman Jaafar dan Nabil Jeffri, memberi ruang kepada artis tersohor tempatan berkarya seperti Datuk Jamal Abdillah, Hafiz AF, Datuk Siti Nurhaliza) selain membantu pembangunan infrastruktur dan sebagainya. Peruntukan bagi usaha-usaha ini adalah bergantung sepenuhnya kepada faktor komersial seperti kos operasi, tajaan korporat.

Oleh yang demikian, untuk tujuan pembandingan, perbelanjaan PETRONAS untuk DFP dan perlumbaan F1 adalah untuk tujuan yang berbeza jika dibandingkan dengan perbelanjaan untuk pembangunan usahawan bumiputera.

Dari segi pembangunan usahawan bumiputera di dalam industri minyak dan gas, PETRONAS telah, sedang dan akan terus menyokong dan melaksanakan agenda pemerkasaan ekonomi Bumiputera melalui

program-program strategik seperti *Vendor Development Programme* (VDP) yang melangkaui bidang keusahawanan termasuk penghasilan modal insan dalam bidang minyak dan gas. Sejak penubuhannya pada tahun 1994, program VDP telah memberi peluang kepada sebanyak 88 buah syarikat Bumiputera melalui penganugerahan kontrak-kontrak yang berjumlah RM7.7 bilion.

Sekian, terima kasih.

**PEMBERITAHUAN PERTANYAAN  
DEWAN RAKYAT**

**PERTANYAAN : BAGI JAWAB LISAN**

**DARIPADA : DAT UK HAJI DATU NASRUN BIN DATU  
MANSUR [ SILAM ]**

**TARIKH : 18 MEI 2015 (ISNIN)**

**SOALAN : 29**

**Datuk Haji Datu Nasrun bin Datu Mansur [ Silam ]** minta **MENTERI PENGANGKUTAN** menyatakan bilakah projek penaiktarafan Lapangan Terbang Lahad Datu untuk kegunaan TUDM dibawah ESSCOM akan dapat dilaksanakan, memandangkan perkara ini telah diumumkan dalam Bajet 2015.

## **JAWAPAN**

Tuan Yang di-Pertua,

Kementerian Pengangkutan (MOT) telah meneliti skop bernilai RM50 juta yang dicadangkan oleh Kementerian Pertahanan (MINDEF) bagi kedua-dua projek iaitu Menaik Taraf Lapangan Terbang Lahad Datu dan Perpindahan Skuadron Hawk daripada Butterworth ke Labuan tersebut. Kementerian mendapati bahawa hampir keseluruhan skop cadangan berkenaan lebih menjurus kepada keperluan untuk pembinaan fasiliti dan infrastruktur Tentera Udara Diraja Malaysia di kedua-dua lapangan terbang.

Oleh yang demikian, Kementerian telah menyatakan pandangan kepada Kementerian Pertahanan (MINDEF) bahawa permohonan peruntukan pembangunan kepada Kementerian Kewangan sebanyak RM50 juta untuk kedua-dua projek tersebut perlu dilaksanakan oleh pihak MINDEF.

Tuan Yang di-Pertua,

Skop projek ini tidak melibatkan pengambilan balik tanah dan landasan sedia ada adalah sesuai dengan keperluan operasi pesawat C130 Hercules, milik TUDM. Selain daripada itu, kemudahan lapangan terbang yang ada boleh digunakan dan projek peningkatan taraf hanya melibatkan keperluan TUDM.

**NO. SOALAN: 30**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DR. TAN SENG GIAW [ KEPONG ]**

**TARIKH : 18 MEI 2015**

**RUJUKAN : 8054**

**SOALAN:**

**Dr. Tan Seng Giaw [ Kepong ]** minta **MENTERI DALAM NEGERI** menyatakan kerjasama antarabangsa dan keberkesanannya untuk menangani golongan militan.

**JAWAPAN:**

**Tuan yang di-Pertua,**

**Kerajaan telah mengambil beberapa inisiatif bagi menyekat fahaman IS daripada terus merebak ke dalam negara. Antaranya ialah mengadakan kerjasama antarabangsa dengan agensi-agensi perisikan negara luar melalui perkongsian maklumat khususnya dengan negara-negara ASEAN. Hasil daripada perkongsian maklumat ini, adalah sangat berkesan di mana pihak polis dapat membuat pemantauan rapi dan menjelaki mereka yang disyaki terlibat dengan kumpulan pengganas tersebut.**

**Sebagai contoh, nama individu-individu yang disyaki sebagai pengganas yang diperolehi hasil daripada perkongsian maklumat ini akan dipanjangkan kepada Jabatan Imigresen Malaysia untuk disenaraihitamkan dan dimasukkan ke dalam *Senarai Syak (Suspect List)* bagi mengesan pergerakan mereka di semua pintu masuk utama seluruh negara. Hasilnya telah terbukti apabila pihak polis telah berjaya menahan seramai 107 orang yang disyaki terlibat dengan kegiatan kumpulan militan *Islamic State (IS)* yang terdiri daripada 91 orang rakyat Malaysia dan 16 orang warganegara asing.**

**Selain daripada itu, Kerajaan juga sedang dalam usaha untuk melaksanakan *Advanced Passenger Screening System (APSS)* yang merupakan saringan awal ke atas pelancong untuk memasuki negara ini sebelum berlepas daripada negara asal. Ini untuk memastikan bahawa setiap warganegara asing dapat ditapis dengan lebih awal dan terperinci.**

**MESYUARAT KEDUA, PENGGAL KETIGA  
PARLIMEN KETIGA BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : JAWAB LISAN**

**DARIPADA : DATUK JUSLIE BIN AJIROL  
(LIBARAN)**

**TARIKH : 18.05.2015**

**SOALAN : 31**

Minta **MENTERI KEMAJUAN LUAR BANDAR DAN WILAYAH** menyatakan tindakan segera memodenkan sektor luar bandar melalui penambahbaikan infrastruktur, menyediakan persekitaran kondusif dan menggalakkan pelaburan supaya kawasan luar bandar dapat ditransformasikan sebagai pusat industri, sekali gus berupaya menjana peluang pekerjaan industri.

## **Jawapan:**

Tuan Yang di-Pertua,

Usaha memodenkan sektor luar bandar telah mula dilaksanakan oleh Kementerian Kemajuan Luar Bandar dan Wilayah (KKLW) sejak sekian lama di bawah Dasar Transformasi Nasional (DTN) melalui Program Transformasi Luar Bandar (*Rural Transformation Programme* - RTP). Bagi mencapai hasrat tersebut, Kementerian Kemajuan Luar Bandar dan Wilayah telah mewujudkan Pusat Transformasi Luar Bandar atau *Rural Transformation Centre* (RTC) sebagai pusat integrasi perkhidmatan yang merangsang kegiatan ekonomi dan memberi peluang pekerjaan kepada masyarakat luar bandar. Sehingga kini, KKLW **telah membangunkan 7 buah RTC** iaitu Perak, Kelantan, Melaka, Pahang, Johor, Kedah dan Terengganu. Jumlah pengunjung RTC ialah seramai **7.8 juta orang** dengan **nilai jualan** hasil urus niaga yang direkodkan berjumlah **RM476 juta**.

Tuan Yang di-Pertua,

Aktiviti memajukan luar bandar sentiasa menjadi keutamaan dalam agenda pembangunan di bawah Bidang Keberhasilan Utama Negara (NKRA) Mempertingkatkan Pembangunan Luar Bandar. Usaha-usaha ini dilipat ganda lagi dengan penambahbaikan infrastruktur luar bandar seperti jalan raya, bekalan air bersih dan bekalan elektrik bagi memberi manfaat kepada **lebih 5 juta rakyat lagi di kawasan luar bandar**. Sepanjang tahun 2010 - 2014, Kerajaan telah membina sepanjang **4,553 kilometer jalan raya**, manakala **330,000 isirumah** menerima kemudahan **bekalan air bersih, 130,000 isirumah** dapat menikmati kemudahan **bekalan elektrik** tanpa gangguan dan **73,392 ketua isirumah telah diberi bantuan rumah**.

Tuan Yang di-Pertua,

Di samping melengkapkan penyampaian infrastruktur, Kerajaan melalui Kementerian Kemajuan Luar Bandar dan Wilayah juga telah memperkenalkan Program Kampung

Abad ke-21 (KA21) di bawah Program Transformasi Kerajaan 2.0 (GTP 2.0). Program ini mampu menggalakkan pelaburan sekali gus menjadikan kawasan luar bandar tersebut ditransformasikan menjadi hab ekonomi yang berkembang pesat serta mempunyai daya tarikan terhadap golongan belia. Usaha ini membantu mengekalkan infrastruktur dan pada masa yang sama membangunkan ekonomi luar bandar melalui Pertandingan Pelan Perniagaan Luar Bandar (*Rural Business Challenge* – RBC) dan Program Desa Lestari.

Untuk makluman, program RBC telah membantu mewujudkan peluang pekerjaan baharu dan industri di kawasan luar bandar manakala, Program Desa Lestari pula telah membangunkan kampung menjadi lebih maju dan masyarakatnya berpendapatan tinggi melalui aktiviti yang dipacu oleh koperasi dalam bidang ekonomi seperti pelancongan, pertanian, perladangan serta industri kecil dan sederhana (IKS).

Tuan Yang di-Pertua,

Secara umumnya, Kementerian Kemajuan Luar Bandar dan Wilayah akan meneruskan agenda pembangunan luar bandar bukan hanya dari aspek kemajuan infrastruktur fizikal tetapi juga dalam bidang ekonomi yang bersesuaian selaras dengan hasrat menjadikan luar bandar sebagai kawasan yang maju, menarik dan menguntungkan.

Soalan No : 32

**PEMBERITAHU PERTANYAAN DEWAN RAKYAT**

**PERTANYAAN : LISAN**

**DARIPADA : Y.B. DR. ONG KIAN MING [ SERDANG ]**

**TARIKH : 18.5.2015**

**SOALAN :**

**Dr. Ong Kian Ming [ Serdang ]** minta **MENTERI PENDIDIKAN** menyatakan jumlah bayaran yang dibuat kepada perunding dalam penyediaan Pelan Pembangunan Pendidikan Negara (Pengajian Tinggi) 2015-2025.

**JAWAPAN**

Tuan Yang di-Pertua,

Untuk makluman Ahli Yang Berhormat, sepanjang tempoh dua tahun (2013-2015), Kementerian Pendidikan Malaysia (KPM) telah memperuntukkan belanjawan sebanyak RM8.5 juta untuk pembangunan pelan tindakan tersebut meliputi kos yang berkaitan dengan kajian semula Pelan Strategik Pengajian Tinggi Negara, sesi pendengaran awam di seluruh negara, penyelidikan dan perundingan awam.

RJM03

**PEMBERITAHUAN PERTANYAAN DEWAN RAKYAT  
JAWAPAN OLEH YB DATO SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : LISAN**  
**DARIPADA : YB TUAN V. SIVAKUMAR [ BATU GAJAH ]**  
**TARIKH : 18 MEI 2015**  
**SOALAN :**

**YB Tuan V. Sivakumar [Batu Gajah]** minta **MENTERI KESIHATAN** menyatakan sama ada Kerajaan bercadang untuk membina sebuah klinik kesihatan di Pekan Pusing, Batu Gajah di bawah Rancangan Malaysia Ke Sebelas. Jika ya, nyatakan lokasi, jumlah peruntukan dan langkah-langkah yang telah diambil setakat ini berhubung dengan projek berkenaan.

**Tuan Yang di-Pertua,**

Penyediaan kemudahan kesihatan di sesebuah lokasi sememangnya mengambilkira keperluan penduduk setempat. Pada masa ini, penduduk Pekan Pusing mendapatkan perkhidmatan kesihatan melalui Klinik Kesihatan di Pekan Pusing, Batu Gajah yang mana sebelum ini merupakan Klinik Kesihatan Ibu dan Anak tetapi telah dinaiktaraf kepada Klinik Kesihatan dengan perkhidmatan pesakit luar pada Februari 2015.

Bagi pesakit yang memerlukan perkhidmatan pesakit dalam ianya boleh di dapati dari Hospital Batu Gajah sejauh 7km dan Hospital Ipoh sejauh 25km daripada Klinik Kesihatan Pekan Pusing.

Kementerian Kesihatan Malaysia (KKM) mengambil maklum akan keperluan untuk meningkatkan lagi perkhidmatan yang lebih komprehensif di Klinik Kesihatan Pekan Pusing. Oleh itu, KKM ini sedang di dalam proses perolehan sebuah tapak bersebelahan Sekolah Menengah Kebangsaan Pusing bagi tujuan tersebut. Peruntukan bagi pelaksanaan projek klinik kesihatan di Pekan Pusing yang baru akan dipohon di dalam rolling plan ke dua bagi Rancangan Malaysia ke 11 akan datang apabila proses perolehan tanah selesai.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATUK SAPAWI BIN AHMAD WASALI  
(SIPITANG)**

**PERTANYAAN : LISAN**

**TARIKH : 18.05.2015**

**Y.B. DATUK SAPAWI BIN AHMAD WASALI [ SIPITANG ]** minta **MENTERI KEWANGAN** menyatakan apakah bentuk aduan dan rungutan utama yang dibuat oleh pengguna sejak GST dilaksanakan 1 April lalu dan apakah langkah-langkah penambahbaikan yang sudah diambil setakat ini.

**JAWAPAN**

Tuan Yang Dipertua,

Sehingga 10 Mei 2015, sebanyak 4,849 aduan berkaitan isu GST telah diterima oleh JKDM sejak GST dilaksanakan meliputi antara lain kenaikan harga barang, pengeluaran invois yang tidak menepati kriteria yang

ditetapkan, kesalahan klasifikasi barang dan pengesahan layanan GST ke atas pembekalan. Dalam masa yang sama, pihak KPDNKK juga telah menjalankan 256,886 pemeriksaan ke atas semua jenis premis perniagaan dan sebanyak 702 kertas siasatan telah dibuka bagi kesalahan yang dilakukan dibawah Akta Kawalan Harga dan Anti Pencatutan 2011. Bagi KPDNKK, sebanyak 815 kes dalam siasatan dan 44 kes akan dibawa ke mahkamah.

Untuk makluman Yang Berhormat, JKDM melalui Jabatan Peguam Negara telah **membuka 13 kertas siasatan di mana 2 dalam proses pendakwaan di bawah seksyen 33(2)(b) Akta Cukai Barang dan Perkhidmatan 2014 dan 11 lagi dalam proses siasatan.** Selain itu, KPDNKK turut mengeluarkan tiga dakwaan terhadap peniaga yang melakukan kesalahan di bawah Akta Kawalan Harga dan Anti Pencatutan 2011. Sehingga 14 Mei 2015, dua syarikat telah disabitkan kesalahan di Mahkamah Sesyen di bawah Seksyen 14 (1), Akta Kawalan Harga dan Anti Pencatutan 2011 dengan jumlah denda sebanyak RM140,000.

KPDNKK dan JKDM akan terus melaksanakan operasi mengesan kesalahan yang dilakukan oleh peniaga supaya peniaga membuat semua dokumentasi dan rekod berhubung transaksi perniagaan termasuklah resit

pembelian dan penjualan dengan tepat untuk mengelakkan sebarang kesilapan dan kes penipuan terhadap pengguna.

Selain itu, JKDM juga telah menubuhkan *GST Helpdesk* di seluruh negara dan *GST Call Center* bagi membantu dan membimbing peniaga dalam menguruskan sistem GST serta menguruskan aduan pengguna berkaitan salah laku peniaga di bawah Akta GST. JKDM turut menjalankan Operasi *MYSTERY Shopping* untuk memastikan peniaga mematuhi perundangan Akta GST 2014 dan seterusnya mengambil tindakan ke atas ketidakpatuhan (non-compliance) dan *Fraud GST*. Di samping itu, KPDNKK juga turut menubuhkan talian Pusat Gerakan Anti Pencatutan (PGAP) bagi menerima aduan pengguna dan menyelaras tindakan penguatkuasaan antipencatutan di seluruh negara.

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : UST. DATUK DR. MOHD. KHAIRUDDIN BIN  
AMAN RAZALI  
[ KUALA NERUS ]**

**TARIKH : 18 MEI 2015**

**RUJUKAN : 7838**

**SOALAN:**

**Ust. Datuk Dr. Mohd. Khairuddin bin Aman Razali [ Kuala Nerus ]**  
minta **MENTERI DALAM NEGERI** menyatakan bilangan pekerja asing  
berdaftar dan tanpa izin di negeri-negeri di Malaysia dan bilangan  
mereka mengikut sektor-sektor.

**JAWAPAN :**

**Tuan Yang di-Pertua,**

**Jumlah pekerja asing yang memegang Pas Lawatan Kerja Sementara (PLKS) yang masih sah dan aktif sehingga 30 April 2015 adalah seramai 1,946,152 orang. Jumlah ini mewakili pekerja asing yang digaji secara sah dan dikeluarkan Pas Lawatan Kerja Sementara (PLKS) oleh Jabatan Imigresen Malaysia.**

**Pecahan mengikut sektor bagi tempoh sehingga 30 April 2015 adalah seperti berikut :**

<b>BIL.</b>	<b>SEKTOR</b>	<b>JUMLAH (ORANG)</b>
1.	<b>Perkilangan</b>	<b>727,896</b>
2.	<b>Pembinaan</b>	<b>368,051</b>
3.	<b>Perladangan</b>	<b>289,313</b>
4.	<b>Perkhidmatan</b>	<b>253,573</b>
5.	<b>Pertanian</b>	<b>160,326</b>
6.	<b>Pembantu Rumah</b>	<b>146,993</b>

**Mengenai statistik pendatang asing tanpa izin (PATI), Kementerian ini tidak mempunyai rekod yang khusus memandangkan sehingga kini rekod yang dimiliki oleh Jabatan Imigresen Malaysia adalah berdasarkan pas yang dikeluarkan kepada pekerja asing yang bekerja di negara ini iaitu Pas Lawatan Kerja Sementara (PLKS).**

**Bagaimanapun, tidak dinafikan bahawa masih terdapat PATI yang berada dalam negara. Seseorang warga asing juga dianggap sebagai PATI sekiranya melakukan kesalahan seperti tinggal lebih masa, melanggar Syarat Pas, tidak memiliki Pas/Permit yang sah atau menggunakan Pas/Dokumen Palsu.**

**Berdasarkan 3,003 jumlah operasi penguatkuasaan yang dijalankan bagi tempoh 1 Januari 2015 sehingga 30 April 2015 seramai 80,581 orang warga asing telah diperiksa. Daripada jumlah tersebut seramai 19,007 orang adalah merupakan PATI. Sehubungan ini, tindakan penguatkuasaan akan dilaksanakan secara berterusan bertujuan untuk mengesan, menangkap, mendakwa dan mengusir PATI yang berada di dalam negara.**

**PEMBERITAHUAN PERTANYAAN  
DEWAN RAKYAT**

**PERTANYAAN : BAGI JAWAB LISAN**

**DARIPADA : DATO' KAMARUDIN BIN JAFFAR [TUMPAT]**

**TARIKH : 18 MEI 2015 (ISNIN)**

**SOALAN : 36**

**Dato' Kamarudin bin Jaffar [Tumpat] minta MENTERI PENGANGKUTAN menyatakan berapakah jumlah penumpang yang menggunakan tiap-tiap satu lapangan terbang Alor Setar, Johor Baharu, Kota Bharu dan Kuala Terengganu pada suku pertama 2015.**

## **JAWAPAN**

Tuan Yang di-Pertua,

Jumlah penumpang yang menggunakan tiap-tiap satu lapangan terbang Alor Setar, Johor Bahru, Kota Bharu dan Kuala Terengganu pada suku pertama 2015 adalah seperti berikut:

<b>Bil</b>	<b>Lapangan Terbang</b>	<b>Jumlah Penumpang</b>
1	Alor Setar	173 ribu
2	Johor Bahru	623 ribu
3	Kota Bharu	476 ribu
4	Kuala Terengganu	187 ribu

**PEMBERITAHUAN PERTANYAAN DEWAN RAKYAT**

**PERTANYAAN** : LISAN

**DARIPADA** : **TUAN HAJI AHMAD LAI BIN BUJANG [SIBUTI]**

**TARIKH** : **18 MEI 2015 (ISNIN)**

**SOALAN** : Tuan Haji Ahmad Lai bin Bujang [Sibuti] minta MENTERI PERTANIAN DAN INDUSTRI ASAS TANI menyatakan menyatakan apakah manfaat yang boleh diberikan dengan kewujudan Agro Bazaar Rakyat 1Malaysia dan Pasar Komuniti dan Karavan (PAKAR) terutamanya kepada penduduk luar bandar.

**JAWAPAN:**

**Tuan Yang Dipertua,**

Antara manfaat yang boleh diberikan dengan kewujudan Agro Bazaar Rakyat 1Malaysia dan Pasar Komuniti dan Karavan (PAKAR) terutamanya kepada penduduk luar bandar adalah seperti berikut :

- (i) Menawarkan penjimatan 5%-20% bagi komoditi terpilih kepada pengguna;
- (ii) Menawarkan luang pasaran langsung kepada pengeluar dan selaras dengan Jihad Memerangi Orang Tengah;

- (iii) Menggalakkan petani, penternak dan nelayan menjual secara terus kepada pengguna;
- (iv) Membolehkan petani, penternak dan nelayan mendapat harga yang munasabah sehingga 60% dari harga barang dijual melalui pengurangan lapisan pasaran; dan
- (v) Memastikan pengguna mendapat bekalan secara berterusan.

**NO. SOALAN: 38**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN CHUA TIAN CHANG @ TIAN CHUA  
[ BATU ]**

**TARIKH : 18 MEI 2015**

**RUJUKAN : 7839**

**SOALAN:**

**Tuan Chua Tian Chang @ Tian Chua [ Batu ] minta MENTERI DALAM NEGERI menyatakan adakah siasatan polis mendapati apakah peranan wanita Kyrgyz Aidana Baizieva dalam penerbangan helikopter M GB itu, adakah dia seorang pembantu juruterbang amatur yang dijemput oleh juruterbang Clifford Fournier.**

**JAWAPAN:**

**Tuan Yang di-Pertua,**

Pihak polis telah menjalankan siasatan terhadap kemalangan helikopter yang terhempas di kawasan hutan Kg. Sg. Pening, Jalan Sg. Lalang, Semenyih, Kajang. Siasatan pihak polis tertumpu kepada Laporan Mati Mengejut (SDR) berkait Semenyih Repot 2194/2015 pada 5 April 2015 untuk mengesahkan 6 mangsa yang disyaki terkorban dalam naas tersebut iaitu Tan Sri Dr. Jamaludin b. Jarjis, Dato Azlin b. Alias, Dato' Tan Huat Seang, Razkan b. Seran, Kapten Clifford William Fournier Jr dan Aidana Braizieva. Post Mortem telah dijalankan di Hospital Kuala Lumpur mendapati sebab kematian bagi semua *Human Recognition* adalah *Multiple Injuries Due To Helicopter Crashed*.

Siasatan secara menyeluruh dilaksanakan oleh pihak berkuasa Penerbangan Awam Malaysia (DCA) dan proses siasatan masih lagi berjalan. Kementerian tidak bercadang untuk memberi ulasan kerana dikhuatiri boleh menjelaskan siasatan yang sedang berjalan.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB DATO' HAJI MOHD ZAIM BIN ABU HASAN  
[PARIT]**

**TARIKH : 18 MEI 2015 (ISNIN)**

**SOALAN :**

**YB Dato' Haji Mohd Zaim bin Abu Hasan [ Parit ]** minta **PERDANA MENTERI** menyatakan statistik kakitangan perkhidmatan awam yang telah diisytiharkan muflis semenjak tahun 2010. Apakah langkah tindakan Kerajaan bagi memastikan masalah ini tidak lagi berlaku di kalangan penjawat awam.

**JAWAPAN: YB DATO' SERI DR SHAHIDAN BIN KASSIM,  
MENTERI DI JABATAN PERDANA MENTERI**

Tuan Yang di-Pertua,

Berdasarkan laporan daripada Jabatan Insolvensi Malaysia dari tahun 2010 hingga 2014, seramai 1,897 penjawat awam telah diisyiharkan muflis. Oleh itu Kerajaan memandang serius terhadap penjawat awam yang diisyiharkan muflis. Penjawat awam yang didapati muflis boleh dikenakan tindakan tatatertib sehingga hukuman buang kerja.

Sebagai langkah pencegahan, Kerajaan telah memberikan amaran dengan menggariskan peraturan di bawah Peraturan-Peraturan Pegawai Awam (Kelakuan dan Tatatertib) 1993, [P.U.(A)395/1993] bagi menghindarkan pegawai awam daripada mengalami kesusahan kerana berhutang

Dari segi pemantauan, Jabatan Akauntan Negara telah menyediakan Laporan Keterhutangan Yang Serius dan laporan tersebut dibincangkan dalam Mesyuarat Ketua-ketua Setiausaha Kementerian.

Selain itu, Agensi Kaunseling dan Pengurusan Kredit, Bank Negara (AKPK) boleh memberikan khidmat nasihat yang lebih profesional kepada mana-mana pegawai dalam mengurus kewangan termasuk dalam isu keterhutangan kewangan.

Dalam masa yang sama, Ketua Jabatan turut bertanggungjawab dalam memastikan pegawai bawahannya mematuhi setiap peraturan, selaras

dengan **Peraturan 3C**, Peraturan-Peraturan Pegawai Awam (Kelakuan dan Tatatertib) 1993 berhubung dengan tugas kawalan dan pengawasan tatatertib oleh Ketua Jabatan.

Sekian. Terima kasih.

**PEMBERITAHUAN PERTANYAAN BAGI JAWAB LISAN**  
**DEWAN RAKYAT MALAYSIA**

**PERTANYAAN : JAWAB LISAN**

**DARIPADA : TUAN MOHAMED HANIPA BIN MAIDIN  
[ SEPANG ]**

**TARIKH : 18 MEI 2015**

**SOALAN : Tuan Mohamed Hanipa bin Maidin [ Sepang ] minta  
MENTERI LUAR NEGERI menyatakan:-**

- (a) adakah Kerajaan akan membuat apa-apa bantahan rasmi secara lisan dan bertulis ke atas Kerajaan Bangladesh sebelum atau selepas hukuman bunuh ke atas pemimpin Jamaat Islami Bangladesh, Muhammad Kamaruzzaman dilaksanakan pada 11 April 2015; dan
  
- (b) jika ya, bila bantahan tersebut dibuat dan apakah respon Kerajaan Bangladesh, dan jika tidak, mengapakah tidak ada bantahan dibuat.

## **JAWAPAN**

Tuan Yang di-Pertua,

Saya mengucapkan terima kasih kepada Yang Berhormat Sepang atas soalan yang dikemukakan.

2. Sebagaimana yang sudah saya maklumkan di Dewan yang mulia sebelum ini melalui jawapan bertulis bertarikh 25 November 2014, Malaysia masih mengambil pendirian untuk tidak mencampuri urusan dalaman dan perundangan Bangladesh yang jelas mengambil tindakan yang dirasakan perlu dalam menyelesaikan masalah dalaman negara tersebut sebagai sebuah negara berdaulat. Perbicaraan yang dilakukan dan hukuman yang dijatuhkan oleh Tribunal Antarabangsa yang telah ditubuhkan pada 25 Mac 2010 oleh Kerajaan Bangladesh adalah mengikut lunas undang-undang tempatan yang berlandaskan piawaian antarabangsa.

Sekian, terima kasih.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. TUAN NG WEI AIK  
(TANJONG)**

**PERTANYAAN : LISAN**

**TARIKH : 18.05.2015**

**Y.B. TUAN NG WEI AIK [ TANJONG ]** minta **MENTERI KEWANGAN** menyatakan bilangan premis perniagaan yang telah diperiksa, aduan yang telah diterima, notis dan kompaun yang telah dikeluarkan, tindakan mahkamah termasuk jenis tindakan yang telah diambil terhadap peniaga-peniaga yang melanggari Akta Cukai Barang dan Perkhidmatan 2014 sejak GST dilaksanakan pada 1 April 2015.

**JAWAPAN**

Tuan Yang Dipertua,

Sehingga 10 Mei 2015, sebanyak 4,849 aduan berkaitan isu GST telah diterima oleh JKDM sejak GST dilaksanakan meliputi antara lain kenaikan harga barang, pengeluaran invois yang tidak menepati kriteria yang ditetapkan, kesalahan klasifikasi barang dan pengesahan layanan GST ke atas pembekalan. Selain itu, JKDM bersama KPDNKK telah menjalankan OPS BERSEPADU JKDM-KPDNKK dan telah melawat 8,299 buah premis bermula 1 April hingga 15 April 2015. JKDM juga telah mengeluarkan 214 tawaran kompaun bagi kes lewat daftar GST dibawah seksyen 184, Akta Cukai Barang dan Perkhidmatan 2014. Dalam masa yang sama, pihak KPDNKK juga telah menjalankan 256,886 pemeriksaan ke atas semua jenis premis perniagaan dan sebanyak 702 kertas siasatan telah dibuka bagi kesalahan yang dilakukan dibawah Akta Kawalan Harga dan Anti Pencatutan.

Untuk makluman Yang Berhormat, JKDM melalui Jabatan Peguam Negara telah **membuka 13 kertas siasatan di mana 2 dalam proses pendakwaan di bawah seksyen 33(2)(b) Akta Cukai Barang dan Perkhidmatan 2014 dan 11 lagi dalam proses siasatan.** Selain itu, KPDNKK turut mengeluarkan tiga dakwaan terhadap peniaga yang melakukan kesalahan di bawah Akta Kawalan Harga dan Anti Pencatutan

2011. Sehingga 14 Mei 2015, dua syarikat telah disabitkan kesalahan di Mahkamah Sesyen di bawah Seksyen 14 (1), Akta Kawalan Harga dan Anti Pencatutan 2011 dengan jumlah denda sebanyak RM140,000.

KPDNKK dan JKDM akan terus melaksanakan operasi mengesan kesalahan yang dilakukan oleh peniaga supaya peniaga membuat semua dokumentasi dan rekod berhubung transaksi perniagaan termasuklah resit pembelian dan penjualan dengan tepat untuk mengelakkan sebarang kesilapan dan kes penipuan terhadap pengguna.

**NO. SOALAN: 42**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN JULIAN TAN KOK PING [STAMPIN]**

**TARIKH : 18 MEI 2015**

**RUJUKAN : 8055**

**SOALAN:**

**Tuan Julian Tan Kok Ping [ Stampin ]** minta **MENTERI DALAM NEGERI** menyatakan jumlah serta jenis kes yang dikenakan siasatan atas Akta Hasutan (Sedition Act) semenjak ianya dikuatkuasakan. Dalam senarai, kategorikan juga ahli politik serta aktivis yang akan mahupun disiasat.

**JAWAPAN:**

**Tuan Yang di-Pertua,**

**Untuk makluman, pihak polis tidak mempunyai rekod bagi kes-kes yang dibuka di bawah Akta Hasutan 1948 semenjak ianya dikuatkuasakan. Walau bagaimanapun, berdasarkan rekod polis, sejak tahun 2008 sehingga 2014, sebanyak 409 kes berhubung dengan Akta Hasutan 1948 telah disiasat oleh pihak polis. Daripada jumlah tersebut, sebanyak 99 kes masih di dalam siasatan, 30 kes telah dirujuk kepada Timbalan Pendakwa Raya, 116 kes di dalam siasatan lanjut, 26 kes sedang dituduh di Mahkamah dan baki 138 kes telah dikategorikan sebagai tiada tindakan lanjut (*No Further Action-NFA*).**

**Statistik ini adalah merangkumi mereka yang terdiri daripada pelbagai latar belakang pekerjaan termasuklah ahli politik, aktivis NGO, pelajar, pendidik dan blogger.**

**PEMBERITAHU PERTANYAAN DEWAN RAKYAT**

**PERTANYAAN :** LISAN

**DARIPADA :** Y.B. TUAN IDRIS BIN HAJI AHMAD  
[ BUKIT GANTANG ]

**TARIKH :** 18.5.2015

**SOALAN :**

Tuan Idris bin Haji Ahmad [ Bukit Gantang ] minta **MENTERI PENDIDIKAN** menyatakan apakah status terkini pembinaan Kampus Universiti Islam Malaysia Cyberjaya dan apakah kursus yang ditawarkan setakat ini.

**JAWAPAN**

Tuan Yang di-Pertua,

Untuk makluman Ahli Yang Berhormat, Universiti Islam Malaysia (UIM) telah diluluskan penubuhannya sebagai sebuah universiti swasta pada 01 November 2013 dan didaftarkan pada 14 Julai 2014 di bawah Akta Institusi Pendidikan Tinggi Swasta 1996 [Akta 555] dengan alamat premis berdaftar institusi tersebut adalah di Blok I, Bangunan MKN Embassy Techzone, Jalan Teknokrat 2, 63000 Cyberjaya, Selangor. Institusi dalam proses untuk membina kampus tetap di atas tanah seluas 100 ekar beralamat di Persiaran Semarak Api, Cyberjaya.

Cadangan penubuhan UIM tertumpu kepada penawaran kursus pengajian peringkat pasca siswazah yang berdasarkan inter/intra bidang Tasawwur Islam dengan bidang sains tulen, sains sosial dan kemanusiaan. Sehingga 30 April 2015, UIM telah diberikan kelulusan

untuk menawarkan satu (1) kursus pengajian peringkat sarjana di bawah Akta 555 iaitu Sarjana Sains Perbandingan Pengajian Pengurusan Kewangan dan satu (1) kursus jangka pendek Pengurusan Harta Wakaf yang hanya boleh dianugerahkan sebagai sijil kehadiran.

RJM04

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATUK WEE JECK SENG  
(TANJONG PIAI)**

**PERTANYAAN : LISAN**

**TARIKH : 18.05.2015**

**Y.B. DATUK WEE JECK SENG [ TANJONG PIAI ]** minta **MENTERI KEWANGAN** menyatakan :-

- (a) berapakah jumlah angka yang telah dijimatkan melalui usaha 11 langkah penjimatan perbelanjaan di sektor awam; dan
- (b) bagaimana pengukuran dibuat untuk menentukan sama ada sasaran berjaya dicapai atau tidak.

**JAWAPAN**

Tuan Yang di-Pertua,

Kerajaan telah melaksanakan dua (2) inisiatif pengurangan perbelanjaan

Kerajaan Mengurus tahun 2014 iaitu:

1. 11 langkah penjimatan dalam sektor awam berkuat kuasa mulai 2 Januari 2014; dan
2. Pengurangan peruntukan Belanja Mengurus Tahun 2014 di bawah OA20000 (Perkhidmatan & Bekalan) sebanyak 5% yang telah dilaksanakan pada 7 April 2014.

Penjimatan perbelanjaan awam daripada pelaksanaan 11 langkah tersebut adalah sebanyak RM400 juta manakala pengurangan 5% peruntukan di bawah Perkhidmatan dan Bekalan telah menjimatkan perbelanjaan sebanyak RM1.3 bilion.

Kementerian Kewangan telah mengambil langkah dengan mengadakan perbincangan bersama semua Kementerian/ Jabatan bagi mencari kaedah terbaik melaksanakan pemotongan peruntukan sebanyak 5%.

Kementerian/ Jabatan diberi kebebasan untuk menentukan program/ aktiviti yang hendak dikurangkan peruntukan selagi ianya tidak menjelaskan secara signifikan program Kementerian dan tidak mendatangkan implikasi kewangan tambahan pada masa akan datang.

Soalan No: 45

**PEMBERITAHU PERTANYAAN DEWAN RAKYAT**

**PERTANYAAN :** LISAN

**DARIPADA :** Y.B. TUAN ZAIRIL KHIR JOHARI  
[ BUKIT BENDERA ]

**TARIKH :** 18.5.2015

**SOALAN :**

Tuan Zairil Khir Johari [ Bukit Bendera ] minta **MENTERI PENDIDIKAN** menyatakan mengapa peperiksaan pusat amali sains bagi Fizik, Kimia, Biologi dan Sains Tambahan SPM yang sepatutnya dilaksanakan tahun ini telah ditangguhkan sehingga tahun 2016.

**JAWAPAN**

Tuan Yang di-Pertua,

Jawatankuasa *Task Force Amali Sains* dalam Mesyuarat *Task Force Amali Sains* Bil.1/2015 pada 13 Januari 2015 telah membuat keputusan menangguhkan pelaksanaan Peperiksaan Pusat Amali Sains mata pelajaran *Physics* (Kod 4531), *Chemistry* (Kod 4541), *Biology* (Kod 4551) dan *Additional Science* (Kod 4561) bagi Sijil Pelajaran Malaysia (SPM) mulai tahun 2015 kepada tahun 2016 kerana masalah kerosakan makmal sains di sekolah-sekolah yang terlibat dengan banjir.

Untuk makluman Ahli Yang Berhormat, kebanyakan sekolah di beberapa negeri yang ditenggelami air, atau digunakan sebagai Pusat Pemindahan Sementara semasa bencana banjir besar pada akhir tahun 2014, telah mengalami kerosakan termasuklah makmal sains.

Keadaan tersebut mewujudkan telah menyebabkan suasana tempat bagi pembelajaran dan pengajaran (PdP) kurang kondusif. Kerosakan makmal sains tersebut juga telah menjaskan pelaksanaan PdP yang berbantukan amali di makmal sains dan secara tidak langsung menjaskan persediaan sekolah untuk melaksanakan peperiksaan amali sains pada bulan Oktober 2015.

Kementerian juga mengambil kira bahawa penangguhan pelaksanaan Peperiksaan Pusat Amali Sains mulai tahun 2015 adalah untuk memastikan keputusan SPM 2015 bagi mata pelajaran *Physics* (Kod 4531), *Chemistry* (Kod 4541), *Biology* (Kod 4551) dan *Additional Science* (Kod 4561) tidak terjejas yang sudah pasti akan merugikan murid itu sendiri terutama sekolah yang terlibat dengan bencana banjir.

RJM05

**PEMBERITAHUAN PERTANYAAN DEWAN RAKYAT**  
**MESYUARAT KEDUA, PENGGAL KETIGA**  
**PARLIMEN KETIGA BELAS TAHUN 2015**

**PERTANYAAN : LISAN**

**DARIPADA : DATO' HENRY SUM AGONG [ LAWAS ]**

**TARIKH : 18 MEI 2015 ( ISNIN )**

**SOALAN :**

**DATO' HENRY SUM AGONG [ LAWAS ]** minta **PERDANA MENTERI** menyatakan pendirian Kerajaan berhubung cadangan menggunakan perkataan 'Dayak' menggantikan bangsa lain-lain di bawah Perlembagaan Malaysia Perkara 16.

**JAWAPAN:** **YB DATUK JOSEPH ENTULU BELAUN**  
**MENTERI DI JABATAN PERDANA MENTERI**

**Tuan Yang di-Pertua,**

Kerajaan melalui Mesyuarat Jemaah Menteri pada 21 Januari 2015 memutuskan supaya Jawatankuasa Teknikal Bumiputera Sabah dan Sarawak (JTBSS) mengkaji cadangan penggunaan kaum 'Dayak' bagi menggantikan 'Bumiputera Sarawak' atau 'lain-lain kaum' dalam borang kerajaan.

JTBSS telah membincangkan perkara ini dalam mesyurat Bilangan 1 Tahun 2015 pada 5 Mac 2015 dan Bilangan 2 Tahun 2015 pada 12 Mei 2015. JTBSS mengambil maklum bahawa melalui pengauditan terhadap penggunaan kaum dalam borang kerajaan oleh MAMPU pada 2011, terdapat 198 borang rasmi yang menggunakan maklumat identiti kaum atas perkara-perkara berikut:

- (i) Berkaitan Perkara 153 Perlembagaan Persekutuan;
- (ii) Berkaitan keperluan perundangan tertentu;
- (iii) Bagi memenuhi keperluan *stakeholder*; dan
- (iv) Bagi tujuan penyelidikan dan perancangan.

JTBSS telah bersetuju dengan cadangan penggunaan kaum ‘Dayak’ bagi menggantikan ‘Bumiputra Sarawak’ atau ‘lain-lain kaum’ dalam borang kerajaan. Walau bagaimanapun perkara ini perlu di perhalusi oleh pihak yang berkepentingan di Sarawak iaitu Majlis Adat Istiadat Sarawak dan Jabatan Peguam Besar Negeri Sarawak serta Pejabat Peguam Negara dan beberapa agensi di peringkat Persekutuan. Ianya perlu dilaksanakan bagi memastikan tiada percanggahan dengan mana-mana klausa perundangan sedia ada serta bagi memastikan hak-hak dan keistimewaan yang diberikan kepada mereka dalam perundangan sedia ada terpelihara. JTBSS melalui MAMPU akan mengemukakan Nota Makluman Jemaah Menteri hasil rumusan pandangan dan syor dari pihak yang berkenaan untuk pertimbangan.

Manakala bagi Negeri Sabah, cadangan penggunaan kaum akan dirujuk dengan Kerajaan Negeri untuk mendapatkan persetujuan bersama.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB TUAN FONG KUI LUN [BUKIT BINTANG]**

**TARIKH : 18 MEI 2015 (ISNIN)**

**SOALAN :**

**YB Tuan Fong Kui Lun [Bukit Bintang]** minta **PERDANA MENTERI** menyatakan apakah hasil siasatan sepenuhnya oleh Ketua Audit Negara berhubung akaun dan kewangan IMDB dan apakah hasil penemuan siasatan tersebut.

**JAWAPAN : YB DATO' SERI DR. SHAHIDAN BIN KASSIM,  
MENTERI DI JABATAN PERDANA MENTERI**

Tuan Yang di-Pertua,

Pengauditan 1MDB sedang giat dijalankan dan sedang di peringkat pelaporan. Jabatan Audit akan membentangkan laporan awal pengauditan tersebut kepada Jawatankuasa Kira-kira Wang Negara pada akhir bulan Jun 2015.

Sekian. Terima kasih.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. TUAN MOHD RAFIZI BIN RAMLI  
(PANDAN)**

**PERTANYAAN : LISAN**

**TARIKH : 18.05.2015**

**Y.B. TUAN MOHD RAFIZI BIN RAMLI [ PANDAN ]** minta **MENTERI KEWANGAN** menyatakan secara terperinci pelaburan dan pegangan (ekuiti, bon, pinjaman dan lain-lain) oleh KWSP dan KWAP di dalam 1MDB dan anak-anak syarikatnya (termasuk bekas anak syarikat iaitu SRC International Sdn. Bhd.) setakat 31 Mac 2015.

**JAWAPAN**

Tuan Yang di-Pertua,

Kumpulan Wang Simpanan Pekerja (KWSP) telah melanggan bon

terbitan 1Malaysia Development Berhad (1MDB) yang berjumlah RM200 juta pada tahun 2009 dan ianya dijamin sepenuhnya oleh Kerajaan Malaysia.

Selain itu, KWSP turut mempunyai pendedahan pelaburan terhadap anak-anak syarikat 1MDB iaitu Panglima Power Sdn. Bhd. (PPSB) dan Jimah Energy Ventures Sdn. Bhd. yang berjumlah RM1.52 bilion. Penglibatan pelaburan KWSP di dalam anak-anak syarikat tersebut berlaku pada tahun 2003 (PPSB) dan 2005 (JEV), iaitu sebelum pengambilalihan oleh 1MDB ke atas PPSB dan JEV, masing-masing pada tahun 2012 dan 2014.

Bagi Kumpulan Wang Amanah Persaraan (Diperbadankan) pula, pelaburan dan pegangan KWAP di dalam 1MDB dan anak-anak syarikatnya setakat 31 Mac 2015 adalah berjumlah RM1.4 bilion iaitu di dalam:

1. Bandar Malaysia Sdn Bhd
2. 1MDB Energy Limited
3. 1MDB Global Investment Limited
4. Jimah Energy Ventures Bhd

**PEMBERITAHU PERTANYAAN DEWAN RAKYAT**

**PERTANYAAN :** LISAN

**DARIPADA :** Y.B. TAN SRI DATO' SERI ABD KHALID BIN IBRAHIM [ BANDAR TUN RAZAK ]

**TARIKH :** 18.5.2015

**SOALAN :**

**Tan Sri Dato' Seri Abd Khalid bin Ibrahim [ Bandar Tun Razak ]** minta **MENTERI PENDIDIKAN** menyatakan sejauh manakah Pelan Pembangunan Pendidikan Malaysia 2013-2015 boleh mempertingkatkan standard pendidikan nasional terutama dalam menangani kebimbangan awam sebagaimana yang digambarkan oleh Bank Dunia "kemerunduman mutu pendidikan Malaysia lebih menggusarkan daripada kenaikan paras hutang isi rumahnya".

**JAWAPAN**

Tuan Yang di-Pertua,

Kementerian Pendidikan Malaysia (KPM) menyedari bahawa kualiti pendidikan negara perlu dipertingkatkan sesuai dengan keperluan dan cabaran semasa. Pelan Pembangunan Pendidikan Malaysia (PPPM 2013-2015) telah dibangunkan hasil daripada penilaian menyeluruh terhadap sistem pendidikan negara dengan mengambil kira input daripada pelbagai pihak berkepentingan seperti pandangan awam, pendapat pakar-pakar pendidikan dalam dan luar negara. PPPM telah dilaksanakan dengan objektif yang jelas untuk meningkatkan keberhasilan murid melalui transformasi sistem pendidikan. Lima (5) aspirasi sistem dan 6 (enam) aspirasi murid yang terdapat dalam PPPM

diharap dapat mengangkat kualiti sistem pendidikan Malaysia untuk berada dalam kalangan satu pertiga terbaik dunia menjelang 2025 berdasarkan pentaksiran antarabangsa seperti TIMSS dan PISA.

Untuk makluman Ahli Yang Berhormat, beberapa kejayaan membanggakan pada gelombang pertama PPPM telah dicapai. Di antara pencapaian PPPM ialah hampir 100% murid-murid tahap satu (1) telah menguasai literasi dan numerasi, hampir 80% murid Tahun Dua (2) pula telah menguasai Bahasa Inggeris. Pada masa yang sama, 100% (2259) ambilan Guru Pelatih IPGM Jun 2014 memenuhi syarat 5A ke atas dalam SPM sejarah dengan dasar baharu pengambilan calon guru dari kalangan 30% terbaik SPM di samping melepas saringan kelayakan yang ditetapkan.

Pada tahun 2014, sebanyak 31.03% sekolah berada dalam Band 1 dan Band 2, meningkat daripada sebanyak 28.99 % sekolah pada tahun 2013. Manakala jumlah sekolah yang berada dalam Band 6 dan Band 7 menunjukkan pengurangan daripada 1.78% kepada 1.39%. Di samping itu, pelaksanaan secara berterusan inisiatif Kemahiran Berfikir Aras Tinggi (KBAT) dan lain-lain inisiatif PPPM turut memberi impak dan meningkatkan standard pendidikan negara.

Dari sudut akses kepada pendidikan tinggi, Malaysia telah mencapai kadar enrolmen pendidikan tinggi 48% pada tahun 2012. Ini merupakan peningkatan 70% enrolmen dalam tempoh satu dekad, mencecah 1.2 juta pelajar IPT awam dan swasta. Dalam tempoh 1990 hingga 2010, enrolmen sarjana muda telah meningkat enam kali ganda dan sepuluh kali ganda untuk enrolmen sarjana dan PhD. Peningkatan ini

meletakkan Malaysia pada kedudukan ketiga dalam kalangan negara ASEAN selepas Singapura dan Thailand.

Dari sudut keberhasilan dan kualiti penyelidikan, bilangan artikel penyelidikan yang dihasilkan di Malaysia telah meningkat lebih tiga kali ganda antara 2007 hingga 2012. Ini merupakan kadar peningkatan paling tinggi di dunia, sementara bilangan sitasi pula bertambah empat kali ganda antara 2005 hingga 2012 di mana *Universiti Penyelidikan* (RU) menyumbang 70% penerbitan. Selain itu, antara 2007 hingga 2012, bilangan paten yang difaikkan meningkat 11% setiap tahun dan menjana pendapatan sebanyak RM1.25 bilion menerusi perkhidmatan penyelidikan dan perundingan.

RJM06

**NO. SOALAN: 51**

**PEMBERITAHUAN PERTANYAAN BAGI JAWAB LISAN**  
**DEWAN RAKYAT**

**PERTANYAAN : LISAN**

**DARIPADA : TUAN LIM GUAN ENG [ BAGAN ]**

**TARIKH : 18 MEI 2015**

**RUJUKAN : 7840**

**SOALAN:**

**Tuan Lim Guan Eng [ Bagan ]** minta **MENTERI DALAM NEGERI** menyatakan sebab abang kepada Ketua Polis Negara dan para demonstrasi yang menentang Gereja di Taman Medan, Petaling Jaya tidak ditahan, digari dan direman sebagaimana dikenakan ke atas pemimpin Pakatan Rakyat dan wartawan Malaysian Insider sebelum ini. Apakah tindakan polis ke atas protes ini.

**JAWAPAN:**

**Tuan Yang di-Pertua,**

**Berhubung dengan isu perhimpunan bagi membantah kewujudan gereja di kawasan Taman Medan di Metro Square Taman Medan, Petaling Jaya pada 20 April 2015. Pihak polis telah membuka kertas siasatan berkait Petaling Jaya Repot 5415/2015 di bawah Seksyen 448/511 Kanun Keseksaan atas kesalahan cuba melakukan pencerobohan bangunan. Dalam kejadian tersebut, terdapat lebih kurang 40 orang telah hadir dan berkumpul di kawasan tersebut. Tiada tangkapan dibuat terhadap mereka yang terlibat dalam perhimpunan tersebut memandangkan kesemua mereka yang diarahkan hadir ke balai polis untuk membantu siasatan telah hadir memberikan keterangan penuh, maka tiada keperluan untuk ditahan reman, digari dan ditahan bagi melengkapkan siasatan.**

**Pihak polis akan menjalankan siasatan tanpa mengira kedudukan dan fahaman politik seseorang dan siasatan yang dijalankan adalah telus dan “*without fear or favour*”.**

**PEMBERITAHU PERTANYAAN  
DEWAN RAKYAT, MALAYSIA**

---

**PERTANYAAN : LISAN**

**DARIPADA : PUAN TERESA KOK SUH SIM  
[ SEPUTEH ]**

**TARIKH : ISNIN, 18 MEI 2015**

**RUJUKAN : L1 [PR-1332-L68274]**

**SOALAN :**

**Puan Teresa Kok Suh Sim [ Seputeh ]** minta **MENTERI WILAYAH PERSEKUTUAN** menyatakan bila dan sebab DBKL menjual tanah 2 ekar di lot 37890 di Jalan Radin Anum 1, Sri Petaling kepada pihak swasta. Siapakah pembeli tanah dan apakah harga penjualan tanah tersebut dan rancangan DBKL di atas tapak tersebut.

Tuan Yang di-Pertua,

Untuk makluman Ahli Yang Berhormat Seputeh, Dewan Bandaraya Kuala Lumpur menawarkan penjualan tanah Lot 37890 kepada Tetuan Yayasan Wilayah Persekutuan pada 23 Oktober 2013 pada harga RM30,484,011.00.

Dewan Bandaraya Kuala Lumpur juga mengenakan syarat kepada Tetuan Yayasan Wilayah Persekutuan untuk menyelesaikan dan menanggung sendiri segala kos yang berkaitan dengan pemindahan dan pampasan ke atas halangan di tapak.

Tetuan Yayasan Wilayah Persekutuan bercadang untuk membina pembangunan bersepadu yang melibatkan pembinaan rumah dan komersial serta kemudahan-kemudahan yang berkaitan untuk pembeli.

**NO. SOALAN: 53**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN R. SIVARASA [ SUBANG ]**

**TARIKH : 18 MEI 2015**

**RUJUKAN : 7841**

**SOALAN:**

**Tuan R. Sivarasa [ Subang ] minta MENTERI DALAM NEGERI menyatakan status siasatan laporan polis Bidor/002063/13 oleh Rajamah a/p Pachiappan, ibu kepada Murugan Kandasamamy, mantan pegawai khas kepada calon PKR di Kawasan Parlimen Tapah, En. Vasantha Kumar a/l Krishnan yang dibunuh tempoh kempen PRU itu selepas menerima ugutan politik daripada orang-orang yang tidak dikenali.**

**JAWAPAN:**

**Tuan Yang di-Pertua,**

**Pihak polis telah menjalankan siasatan berkaitan kematian Murugan Kandasamamy, yang dijumpai terapung di dalam lombong terbiar di belakang Industri Bemban, Pusing, Batu Gajah, Perak dan hasil bedah siasat sebab kematian adalah disebabkan pukulan oleh objek tumpul di bahagian kepala si mati dan dipercayai telah dibunuh. Siasatan dijalankan berkait Pusing Rpt: 969/13 pada 5 Mei 2013 dan disiasat di bawah Seksyen 302 Kanun Keseksaan.**

**Selain itu siasatan juga dijalankan terhadap laporan yang dibuat oleh ibu kepada si mati bersabit Bidor Rpt 2063/ 13 pada 4 Julai 2013 yang mendakwa bahawa mendiang anaknya sebelum dibunuh telah menerima beberapa ugutan melalui telefon dan diberi amaran untuk menjauhkan diri dan tidak menyokong calon Parti Keadilan Rakyat (PKR) yang bertanding bagi Parlimen Kampar dalam Pilihanraya Umum (PRU) ke 13 yang lalu.**

**Pihak polis telah membuat beberapa tangkapan berdasarkan kepada semakan panggilan keluar dan masuk nombor-nombor telefon dalam telefon yang digunakan oleh mangsa. Namun begitu semua tangkapan yang dibuat tidak dapat dikaitkan dengan pembunuhan tersebut. Siasatan masih diteruskan untuk mendapatkan petunjuk baru dalam kes pembunuhan ini.**

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATO' IR. HAJI NAWAWI BIN AHMAD  
(LANGKAWI)**

**PERTANYAAN : LISAN**

**TARIKH : 18.05.2015**

**Y.B. DATO' IR. HAJI NAWAWI BIN AHMAD [ LANGKAWI ]** minta **MENTERI KEWANGAN** menyatakan apakah Kerajaan bercadang untuk membenarkan anak muda yang belum berkahwin untuk mengeluarkan sebahagian wang simpanan KWSP untuk mereka melangsungkan perkahwinan.

**JAWAPAN**

Tuan Yang di-Pertua,

Tujuan skim Kumpulan Wang Simpanan Pekerja (KWSP) adalah

untuk menyediakan simpanan persaraan bagi membiayai sara hidup apabila telah bersara kelak. Sehubungan itu, cadangan membenarkan pengeluaran KWSP bagi tujuan menampung perbelanjaan perkahwinan adalah tidak selaras dengan objektif dan prinsip Skim KWSP sebagai sebuah organisasi keselamatan sosial yang menyediakan simpanan untuk persaraan ahli.

**PEMBERITAHUAN PERTANYAAN**

**DEWAN RAKYAT, MALAYSIA**

**PERTANYAAN : LISAN**

**DARIPADA : TUAN CHONG CHIENG JEN**  
**[ BANDAR KUCHING ]**

**TARIKH : 18.5.2015 (ISNIN)**

**TUAN CHONG CHIENG JEN [ BANDAR KUCHING ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apa sebabnya walaupun harga diesel yang dijual di stesen petrol adalah tanpa sebarang subsidi, harga diesel industri adalah lebih mahal daripada harga diesel di stesen petrol.

## **JAWAPAN:**

Pengapungan terkawal (*managed float*) merupakan kaedah penetapan harga diesel sektor runcit yang berdasarkan kepada perubahan kos produk petroleum di pasaran dunia. Dalam hal ini, kos produk petroleum dipengaruhi oleh kadar pertukaran mata wang dan harga purata harian produk petroleum di peringkat antarabangsa. Melalui pengapungan terkawal ini, purata perubahan kos produk bulan semasa akan menentukan penetapan harga bagi bulan berikutnya.

Manakala penetapan harga diesel sektor industri pula adalah lebih sensitif kepada perubahan-perubahan kepada kos produk petroleum, kadar pertukaran matawang. Kos operasi pengangkutan dan pemasaran juga mempengaruhi harga diesel sektor industri yang menyebabkan harga diesel adalah berbeza mengikut negeri atau wilayah. Selain daripada itu, jualan diesel industri melalui *skid tank* dikenakan GST pada kadar 6%.

Dalam hal ini, Kerajaan hanya mengawal harga jualan RON97, RON95 dan diesel untuk sektor runcit. Manakala harga jualan RON97, RON95 dan diesel untuk sektor industri pula ditetapkan oleh syarikat-syarikat minyak secara berasingan.

**PEMBERITAHUAN PERTANYAAN  
DEWAN RAKYAT**

**PERTANYAAN : BAGI JAWAB LISAN**

**DARIPADA : DATO' MOHD ARIFF SABRI BIN ABDUL AZIZ  
[ RAUB]**

**TARIKH : 18 MEI 2015 (ISNIN)**

**SOALAN : 56**

**Dato' Mohd Ariff Sabri bin Abdul Aziz [ Raub ] minta MENTERI PENGANGKUTAN menyatakan :-**

- (a) apakah tindakan yang diambil ke atas kontraktor yang lewat menyiapkan projek seperti yang dikeluarkan tender oleh KLIA yang berjumlah RM2 bilion ini dan siapakah kontraktor ini; dan
  
- (b) apakah tindakan yang diambil keatas pegawai dan juru runding yang menyumbang kepada "cost overruns" ini.

## **JAWAPAN**

Tuan Yang di-Pertua,

Tindakan yang diambil ke atas kontraktor yang lewat menyiapkan projek adalah mengenakan *Liquidated Ascertained Damages* (LAD). Dalam hal-hal ini, pihak MAHB dalam proses perundingan bersama kontraktor utama JV UEM-Binapuri tentang pembayaran jumlah tersebut.

Sebenarnya, projek klia2 tidak pernah mengalami *cost overrun* – kos projek KLIA2 meningkat kerana penambahan skop akibat *design concept* baru KLIA2 ataupun keperluan terperinci *stakeholder* seperti syarikat penerbangan dan kerajaan.

Mana-mana kontraktor ataupun jururunding yang tidak mencapai tahap prestasi yang dikehendaki maka kontrak tersebut akan diberhentikan mengikut terma dan syarat kontrak tersebut.

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : LISAN**

**DARIPADA : YB TAN SRI DATUK SERI PANGLIMA  
ANNUAR BIN MUSA [ KETEREH ]**

**TARIKH : 18 MEI 2015**

**SOALAN :**

**YB Tan Sri Datuk Seri Panglima Annuar bin Musa [ Ketereh ]** minta **MENTERI KESIHATAN** menyatakan bilakah Pusat Kesihatan Kok Lanas akan disiapkan dan mengapakah setelah sekian lama projek ini belum dimulakan.

**Tuan Yang di-Pertua,**

Pelaksanaan projek Klinik Kesihatan Jenis 3 dengan Kuarters Kok Lanas tertangguh disebabkan oleh faktor tapak cadangan projek yang tidak sesuai dan memerlukan kos rawatan tanah yang tinggi. Unit Perancang Ekonomi (EPU), Jabatan Perdana Menteri (JPM) tidak bersetuju dengan kos rawatan tersebut dan mengesyorkan pihak Kementerian Kesihatan Malaysia (KKM) mengenalpasti tapak baharu bagi projek ini.

Sehubungan itu, KKM sedang diperingkat untuk mendapatkan tapak baharu bagi projek ini. Pada 9 April 2015, KKM telah mengenalpasti satu tapak seluas 4.844 ekar melibatkan gabungan empat lot tanah (Lot61, Lot62, PT5860 dan PT5861) bagi tujuan ini. Oleh yang demikian, pelaksanaan projek ini akan diteruskan selepas urusan perolehan tanah selesai kelak.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : TUAN WONG CHEN**  
**[ KELANA JAYA ]**

**TARIKH : 18 MEI 2015**

**SOALAN :**

**Tuan Wong Chen [ Kelana Jaya ]** minta **MENTERI PERUSAHAAN PERLADANGAN DAN KOMODITI** menyatakan:-

- (a) berapakah jumlah subsidi biodiesel yang telah diberikan pada tahun 2014 dan berapakah jumlah yang dijangka akan diberikan untuk tahun 2015; dan
  
- (b) berapakah jumlah yang telah dibayar kepada syarikat-syarikat petrol untuk mensubsidi B7 untuk tahun 2014.

**JAWAPAN:**

Tuan Yang di-Pertua,

- (a) Untuk makluman Ahli Yang Berhormat, Kerajaan telah melaksanakan Program B5 (adunan 5% biodiesel sawit dengan 95% diesel petroleum) secara berperingkat mulai Jun 2011. Seterusnya, Program B5 telah dipertingkatkan kepada B7 (adunan 7% peratus biodiesel sawit dengan 93% diesel petroleum) bermula November 2014 di Semenanjung. Pelaksanaan Program B7 kemudiannya diperluaskan ke Sabah, Sarawak dan Wilayah Persekutuan Labuan bermula Disember 2014. Pelaksanaan Program B5 dan B7 sepanjang tempoh Januari hingga November 2014 melibatkan subsidi berjumlah RM72.05 juta; dan
- (b) Daripada jumlah RM72.05 juta tersebut, sebanyak RM8.19 juta telah diperuntukkan bagi Program B7 pada November 2014.

Untuk makluman Ahli Yang Berhormat, bermula 1 Disember 2014 Kerajaan telah melaksanakan Mekanisme Pengapungan Secara Terkawal, dengan izin, *Managed Float Mechanism*. Di bawah mekanisme pengapungan ini, penetapan harga runcit produk petroleum di stesen minyak adalah mengikut kaedah pengapungan terkawal, iaitu bergantung kepada harga pasaran. Kerajaan juga telah mengambil kira kos adunan biodiesel sawit dan diesel petroleum di dalam penetapan harga runcit setiap bulan.

Sekian, terima kasih.

**NO. SOALAN: 59**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DR. KO CHUNG SEN [ KAMPAR ]**

**TARIKH : 18 MEI 2015**

**RUJUKAN : 7842**

**SOALAN:**

**Dr. Ko Chung Sen [ Kampar ] minta MENTERI DALAM NEGERI menyatakan:-**

- (a) bilangan anggota polis dan bajet yang diperuntukkan setiap tahun kepada unit D5 baru yang menyiasat kes-kes berkaitan dengan hasutan; dan
- (b) adakah kesemua 126,000 anggota polis kini ditugaskan untuk memantau laman media sosial bagi mengenal pasti 'posting' yang berunsur hasutan.

**JAWAPAN:**

**Tuan Yang di-Pertua,**

**Bagi menjawab soalan (a), Unit Siasatan Jenayah Terkelas (USJT) D5, Jabatan Siasatan Jenayah, Bukit Aman dianggotai oleh enam (6) orang pegawai dan enam (6) orang anggota polis yang khusus dalam penyiasatan kes-kes berprofil tinggi termasuk siasatan di bawah Akta Hasutan 1948. Setakat ini tidak ada bajet khusus yang diperuntukkan kepada unit ini dan hanya menggunakan bajet semasa dalam PDRM.**

**Bagi menjawab soalan (b), pemantuan laman sosial bagi mengenal pasti ‘posting’ yang berunsur hasutan atau sebagainya akan dilaksanakan oleh “*Police Cyber Investigation Responce Centre*” (PCIRC) merupakan unit di bawah Bahagian Siasatan Jenayah Siber dan Multimedia, Jabatan Siasatan Jenayah Komersil (JSJK) bukan dibuat oleh semua anggota dalam PDRM. Pihak polis mempunyai banyak lagi tugas lain yang perlu dilaksanakan untuk menjaga keamanan dan keselamatan negara, mencegah jenayah dan sebagainya. Dakwaan yang menyatakan bahawa polis hanya menumpukan kepada kes hasutan semata-mata merupakan kenyataan yang tidak berasas yang dibuat oleh pihak yang tidak bertanggungjawab untuk kepentingan peribadi atau mempunyai agenda lain yang tersembunyi.**

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KETIGA,**  
**PARLIMEN KETIGA BELAS,**  
**MAJLIS MESYUARAT DEWAN RAKYAT**

**PERTANYAAN : LISAN**

**DARIPADA : YB TUAN WILLIAM LEONG JEE KEEN**  
**[ SELAYANG ]**

**TARIKH : 18 MEI 2015 (ISNIN)**

**SOALAN :**

**Tuan William Leong Jee Keen [ Selayang ]** minta **PERDANA MENTERI** menyatakan sama ada Kerajaan akan memansuhkan hukuman mati mandatori dalam masa terdekat dan adakah pelaksanaan hukuman mati digantung pada sementara waktu keputusan dibuat.

**JAWAPAN: YB PUAN HAJAH NANCY SHUKRI**  
**MENTERI DI JABATAN PERDANA MENTERI**

Tuan Yang di-Pertua,

1. Kerajaan pada masa ini melalui Jabatan Peguam Negara masih lagi menjalankan kajian bagi meneliti isu undang-undang, dasar dan keberkesanan pelaksanaan hukuman mati di Negara ini.
2. Skop kajian tersebut tidak terhad kepada kedudukan hukuman mati mandatori sahaja, sebaliknya merangkumi keseluruhan peruntukan hukuman mati yang dikuatkuasakan di Negara ini dan juga pelaksanaannya.
3. Keputusan dasar berhubung dengan pelaksanaan hukuman mati di Negara ini akan diputuskan berdasarkan hasil kajian tersebut.

Sekian, terima kasih.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATUK MADIUS TANGAU  
(TUARAN)**

**PERTANYAAN : LISAN**

**TARIKH : 18.05.2015**

**Y.B. DATUK MADIUS TANGAU [ TUARAN ]** minta **MENTERI KEWANGAN** menyatakan langkah-langkah penguatkuasaan yang telah diambil untuk menangani mereka yang menyalahgunakan pelaksanaan Cukai Barang dan Perkhidmatan (GST) di Sabah, serta usaha-usaha yang dibuat agar sistem cukai yang baru itu mencapai sasaran yang sewajarnya.

**JAWAPAN**

Tuan Yang Dipertua,

Untuk makluman Yang Berhormat, terdapat tiga jenis operasi GST

yang dijalankan di Sabah untuk menangani mereka yang menyalahgunakan pelaksanaan GST, iaitu:

1. **OPS Catut GST bersama KPDNKK** yang beroperasi pada 1 hingga 15 April untuk memastikan peniaga mematuhi peraturan yang ditetapkan. Dalam Operasi OPS Catut ini, tindakan yang diambil adalah menjurus kepada khidmat nasihat.
2. **OPS GST (Melindungi Rakyat)**. Operasi melindungi rakyat ini diadakan dengan tujuan agar perundangan GST ini berjalan lancar dan mudah dipatuhi oleh peniaga demi kebaikan bersama antara pengguna dengan peniaga untuk mencapai wawasan menuju negara maju. Operasi ini telah pun bermula pada 12 Mei 2015 yang lalu.
3. **Operasi “MYSTERY Shopping”** telah dijalankan untuk memastikan peniaga mematuhi perundangan Akta Cukai Barang dan Perkhidmatan 2014 dan seterusnya mengambil tindakan ke atas ketidakpatuhan (non-compliance) dan Fraud GST. Operasi ini telah bermula pada 1 Mei 2015 dan sehingga tempoh yang dimaklumkan kelak. Tindakan akan diambil ke atas peniaga yang ingkar selaras dengan peruntukan di bawah Akta Cukai Barang dan Perkhidmatan 2014.

Bagi memastikan tahap pematuhan ini meningkat, Kerajaan akan

terus melaksanakan pelbagai program kesedaran dan latihan GST kepada semua lapisan masyarakat termasuk peniaga bagi meningkatkan kefahaman yang tepat mengenai GST. Kerajaan melalui Jabatan Kastam Diraja Malaysia (JKDM) juga akan terus melaksanakan program *Hand Holding* kepada syarikat-syarikat yang telah mendaftar GST bagi memudahkan pemahaman yang terperinci mengenai pelaksanaan GST. Sehingga 30 April 2015, sebanyak 468 program *Hand Holding* telah diadakan dengan penyertaan lebih daripada 50,000 orang dari pelbagai sektor perniagaan.

Selain itu, JKDM juga telah menubuhkan *GST Helpdesk* di seluruh negara bagi membantu dan membimbing peniaga dalam menguruskan sistem GST. JKDM turut memuat naik video panduan membuat pembayaran GST dan panduan mengemukakan penyata GST di portal *gst.customs.gov.my* bagi memudahkan peniaga membuat tuntutan atau pembayaran GST.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KETIGA BELAS**

---

**PERTANYAAN : LISAN**

**DARIPADA : TUAN MANIVANAN A/L GOWINDASAMY  
[ KAPAR – PKR ]**

**TARIKH : 18 MEI 2015 (ISNIN)**

**SOALAN (NO. 62)**

Minta **MENTERI BELIA DAN SUKAN** menyatakan :

- (a) Langkah-langkah Kerajaan untuk memperbaiki dan memartabatkan sukan Bola Sepak akibat kegagalan di peringkat antarabangsa dan kemerosotan dari sudut prestasi serta kedudukan ranking semasa FIFA yang menjunam dimana skuad Harimau kini berada di kedudukan yang terendah pernah dicapai dalam bola sepak dunia iaitu 164 daripada 209 buah negara.
- (b) Jumlah pemain sukan negara yang pernah terlibat dengan kes makan ubat tidak diizinkan dari tempoh masa 1071 hingga 1980, 1981 hingga 1990, 1991 hingga 2000, 2001 hingga 2010 dan 2011 hingga 15 Mei 2015 serta langkah-langkah Kerajaan untuk menangani isu sebegini pada masa depan.

**JAWAPAN (A)**

Yang di-Pertua,

1. Untuk makluman Ahli Yang Berhormat, tugas untuk membangunkan sukan bola sepak adalah di bawah tanggungjawab Persatuan Bola Sepak Malaysia (FAM). Walau bagaimanapun Kerajaan melalui Kementerian Belia Dan Sukan banyak membantu dalam aspek pembangunan dan kewangan dalam meningkatkan lagi keberkesanan program pembangunan bola sepak negara.
2. Kementerian juga mengakui bahawa skuad utama bola sepak kebangsaan sedang mengalami kejatuhan prestasi jika diukur berdasarkan **ranking ke-164** yang dikeluarkan oleh FIFA pada bulan April 2015 yang lalu. Sepertimana Ahli Yang Berhormat sedia maklum, kejatuhan *ranking* bola sepak ini adalah disebabkan oleh skuad bola sepak negara kita tewas dalam beberapa siri perlawanan persahabatan antarabangsa yang diambil kira dalam perkiraan menentukan ranking bola sepak oleh Persekutuan Bola Sepak Dunia (FIFA).
3. Bagi perancangan jangka pendek, Kementerian berharap pihak Persatuan Bola Sepak Malaysia (FAM) dapat mengkaji pemilihan pasukan-pasukan yang akan kita hadapi bagi perlawanan persahabatan antarabangsa sama ada untuk tujuan pendedahan kepada pemain atau pun untuk meningkatkan semula *ranking* bola sepak negara.

**SULIT**

4. Manakala bagi perancangan jangka masa panjang, Kementerian Belia Dan Sukan telah pun menyediakan satu Pelan Pembangunan Bola Sepak Negara (PPBN), yang bertujuan untuk memastikan pembangunan pemain, kejurulatihan, kemudahan dan pertandingan dilaksanakan secara berterusan diperingkat akar umbi. Sasaran utama PPBN ini adalah untuk menyediakan satu landasan bagi mengilap bakat pemain-pemain yang berumur antara 7 sehingga 17 tahun ke arah melahirkan wira bola sepak negara dan memartabatkan pasukan kebangsaan satu hari nanti. PPBN ini juga akan dijadikan tapak penyediaan pemain-pemain yang mampu bersaing di Kejohanan **Piala Dunia Remaja bawah 17 tahun pada tahun 2019.**

**JAWAPAN (B)**

1. Untuk makluman Ahli Yang Berhormat, Agensi Anti-Doping Malaysia (ADAMAS) tidak menjumpai apa-apa rekod tentang *anti-doping* sebelum tahun 1998. Berdasarkan rekod mulai tahun 2000 hingga 2014, seramai 87 atlet terlibat dengan kes positif melalui hasil ujian di dalam pertandingan dan di luar pertandingan. Jika dibuat perbandingan, ujian doping dikalangan atlet Malaysia tidak melibatkan ujian darah sebelum ini berbanding negara luar yang mana ujian tersebut adalah lebih terperinci.
2. Untuk makluman Ahli Yang Berhormat, Kementerian melalui Agensi Anti Doping Malaysia (ADAMAS) telah merangka strategi jangka pendek iaitu dengan mengukuhkan program ujian berdasarkan strategi yang menekankan ***smart testing*** di mana ujian dilakukan berdasarkan kategori sukan yang berisiko tinggi dalam penggunaan bahan terlarang. Ujian *anti doping* akan

merangkumi ujian air kencing, ujian darah, *Athlete Biological Passport* dan *steroid profile*. Kaedah ini lebih berkesan dalam menangani gejala *doping* dalam sukan. Elemen risikan dan siasatan juga akan dilaksanakan untuk memantau dan melindungi atlet dari kesalahan *doping* contohnya seperti menyekat bekalan *steroid* dan bahan terlarang lain yang kini mudah dijual secara atas talian(*online*) di laman sosial seperti *facebook*.

3. Selain itu, masyarakat sukan keseluruhannya perlu mengamalkan budaya *Zero Tolerance*, dan pendidikan *anti doping* juga dilaksanakan dengan agresif dan menyeluruh di mana program ini memfokuskan bukan sahaja atlet malah para jurulatih dan semua pemegang taruh harus mempunyai sikap yang serius dalam membanteras gejala ini bersama. Setiap pihak perlu memainkan peranan masing-masing dalam menyokong dan membantu ADAMAS di dalam usaha ini. Program-program yang menitikberatkan informasi, kesedaran dan aspek nilai-nilai moral akan dilaksanakan bagi memastikan para atlet dan jurulatih peka terhadap informasi semasa mengenai *anti doping*.
4. Manakala strategi jangka panjang adalah dengan melaksanakan Program Pendidikan yang berdasarkan nilai moral dalam membanteras gejala *doping* di dalam sukan. Antaranya dengan pemantauan berterusan dalam latihan supaya apa-apa lonjakan prestasi betul-betul kerana program latihan yang dirancang. Maka apa-apa kaitan peningkatan prestasi dapat dikenalpasti sama ada melalui prestasi sebenar atau penggunaan bahan terlarang.

**SULIT**

5. Selain itu, Kementerian akan mengkaji undang-undang yang sedia ada untuk dikuatkuasakan dalam membendung bekalan dan sebaran bahan terlarang.

Sekian, terima kasih.

Soalan No: 63

**PEMBERITAHU PERTANYAAN DEWAN RAKYAT**

**PERTANYAAN : LISAN**

**DARIPADA : Y.B. DATUK JOSEPH SALANG ANAK GANDUM [ JULAU ]**

**TARIKH : 18.5.2015**

**SOALAN :**

**Datuk Joseph Salang anak Gandum [ Julau ]** minta **MENTERI PENDIDIKAN** menyatakan nama beberapa buah sekolah yang dicadangkan untuk disatukan dengan beberapa buah sekolah yang telah usang, kurang murid dan didapati sekarang sangat berdekatan kerana mode perhubungan ke sekolah telah bertukar dari sungai (perahu) ke jalan darat (kenderaan).

**JAWAPAN**

**Tuan Yang di-Pertua,**

Untuk makluman Ahli yang berhormat, berdasarkan pengalaman dan pelaksanaan sekolah berpusat yang diwujudkan di Sabah dan di Sarawak, Kementerian Pendidikan Malaysia (KPM) berpandangan buat masa ini konsep ini tidak diperluaskan lagi kerana konsep sekolah berpusat adalah tidak bersesuaian untuk pendidikan peringkat rendah terutama bagi murid tahun 1 sehingga tahun 3 tidak bersesuaian berada di asrama. Di samping murid-murid tersebut masih tidak boleh menguruskan diri mereka, pihak ibu bapa tidak mahu berpisah dan melepaskan anak mereka yang masih kecil tinggal di asrama. Oleh itu, KPM berpandangan pembinaan sesebuah sekolah peringkat rendah

perlu berada dekat dengan komuniti setempat supaya hak kanak-kanak yang perlu berada bersama keluarganya tidak dinafikan.

Seperti yang digariskan dalam Inisiatif Pelan Pembangunan Pendidikan Malaysia (PPPM) 2013-2025, KPM berhasrat untuk menggabungkan sekolah kurang murid (SKM) seperti kepada semua sekolah kerajaan dan bantuan kerajaan. Walau bagaimanapun, KPM akan bekerjasama dengan ibu bapa dan pihak berkepentingan setempat bagi menentukan masa depan sekolah dan mewujudkan persekitaran pembelajaran yang kondusif untuk semua murid bagi memastikan kualiti pendidikan anak mereka diberi keutamaan. Di samping itu, KPM juga sentiasa memastikan sekolah kecil di kawasan luar bandar serta pedalaman yang usang dibaiki pulih bagi memastikan bangunan sekolah yang digunakan selamat untuk murid-murid dan guru-guru.

RJM07

NO. SOALAN: 64

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**  
**DARIPADA : PUAN HAJAH NORMALA BINTI**  
**ABDUL SAMAD [ PASIR GUDANG ]**  
**TARIKH : 18.5.2015 (ISNIN)**

**PUAN HAJAH NORMALA BINTI ABDUL SAMAD [ PASIR GUDANG ]**  
minta **MENTERI PERDAGANGAN DALAM NEGERI, KOPERASI DAN**  
**KEPENGGUNAAN** menyatakan apakah tindakan yang diambil kepada  
peniaga, pembekal, pemborong dan pengilang sekiranya tidak  
mematuhi Panduan Harga Pengguna yang telah di keluarkan oleh pihak  
Kementerian dan berapakah jumlah tangkapan yang telah dibuat  
mengikut negeri?

**JAWAPAN:**

**Tuan Yang Di-Pertua,**

Buku Panduan Harga Pengguna merupakan panduan atau rujukan umum bagi harga barang keperluan asas yang terpilih sahaja dan ia tidak boleh digunakan sebagai rujukan untuk apa-apa tindakan undang-undang.

Walau bagaimanapun, Kementerian mengambil beberapa tindakan proaktif bagi menangani para peniaga, pembekal, pemberong dan pengilang yang menaikkan harga untuk tujuan mencatut. Tindakan-tindakan tersebut adalah seperti berikut:

- i. Penguatkuasaan **Akta Kawalan Harga dan Antipencatutan (AKHAP) 2011** dan **Peraturan-Peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munasabah) (Margin Keuntungan Bersih) 2014.**
- ii. Melaksanakan **OPS CATUT Fasa 1** yang telah berkuatkuasa pada **15 Januari** hingga **31 Mac 2015**. Sepanjang pelaksanaannya, sebanyak **597,833 pemeriksaan** telah dijalankan di seluruh negara. Dari jumlah ini, sebanyak **2,871 kes** telah dihasilkan dengan nilai rampasan sebanyak **RM492,137** dan nilai kompaun sebanyak **RM335,166**. Manakala di bawah **seksyen 21 AKHAP 2011** sebanyak **286 Notis** telah dikeluarkan terhadap peniaga yang menaikkan harga barang.

- iii. Melaksanakan **OPS CATUT Fasa 2** yang dikuatkuasakan mulai **1 April 2015**. Sehingga **14 Mei 2015**, sebanyak **283,245 pemeriksaan** telah dijalankan di seluruh negara. Dari jumlah ini, sebanyak **815 kes** telah dihasilkan dengan nilai rampasan sebanyak **RM134,830** dan nilai kompaun sebanyak **RM122,250**. Manakala di bawah **seksyen 21 AKHAP 2011** sebanyak **819 Notis** telah dikeluarkan terhadap peniaga yang menaikkan harga barang.
- iv. Kementerian juga bekerjasama dengan Jabatan Kastam DiRaja Malaysia (JKDM) dalam operasi bersepadu menerusi **OPS PEMATUHAN GST-CATUT** bermula **1 hingga 15 April 2015**.
- v. **Pengeluaran Notis** dibuat di bawah seksyen 21 AKHAP 2011 ke atas mana-mana pihak yang didapati menaikkan harga secara mendadak dan ketara. Peniaga yang gagal atau enggan memberi penjelasan terhadap kenaikan tersebut atau gagal mengemukakan maklumat yang diarahkan boleh dikenakan tindakan undang-undang di bawah Akta ini.

**Tuan Yang Di-Pertua,**

Sehingga 14 Mei 2015, sebanyak **8 kes** telah **didakwa dan dikompaun** di bawah **seksyen 14(1)** dan **seksyen 21(5)** AKHAP 2011 iaitu 2 kes di Melaka, 2 kes di Pulau Pinang, 1 kes di Kelantan, 1 kes di Putrajaya, 1 kes di Johor dan 1 kes di Wilayah Persekutuan Kuala Lumpur.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA** : **Y.B. TUAN TAN KOK WAI**  
**(CHERAS)**

**PERTANYAAN** : **LISAN**

**TARIKH** : **18.05.2015**

**Y.B. TUAN TAN KOK WAI [ CHERAS ]** minta **MENTERI KEWANGAN** menyatakan jumlah lesen kelab mesin slot dan lesen mesin slot dalam kelab di setiap negeri yang dipulihkan dari tahun 2014 hingga 30 April 2015 walaupun tempoh kesahan (validity) lesen-lesen itu telah tamat. Jika benar, apakah sebab lesen kelab-kelab dan mesin slot tersebut dapat dipulihkan.

**JAWAPAN**

Tuan Yang di-Pertua,

Untuk makluman Yang Berhormat, dasar kerajaan pada masa ini adalah tidak mengeluarkan sebarang lesen baru untuk mesin perjudian kepada mana-mana pihak. Sehubungan itu, tiada lesen kelab mesin slot yang telah tamat tempoh kesahan (validity) dipulihkan dari tahun 2014 hingga 30 April 2015.

**NO. SOALAN: 66**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DR. MICHAEL JEYAKUMAR DEVARAJ  
[ SUNGAI SIPUT]**

**TARIKH : 18 MEI 2015**

**RUJUKAN : 7843**

**SOALAN:**

**Dr. Michael Jeyakumar Devaraj [ Sungai Siput ] minta MENTERI DALAM NEGERI menyatakan senarai pusat-pusat tahanan imigresen yang wujud di Malaysia dengan memberi bilangan orang tahanan di tiap satu pusat pada Disember 2014 serta pecahan kewarganegaraan dan jantina orang tahanan itu.**

**JAWAPAN:**

**Tuan Yang di-Pertua,**

**Untuk makluman Yang Berhormat, terdapat sebanyak 12 pusat tahanan Imigresen di seluruh negara dan seramai 7,013 jumlah PATI yang ditahan bagi bulan Desember 2014.**

**Pecahan tahanan mengikut jantina adalah seperti berikut:-**

Bil.	DEPOT	Lelaki	Perempuan	Kanak-Kanak Lelaki	Kanak-Kanak Perempuan	JUMLAH
1.	KLIA	1,338	402	6	2	1,748
2.	Lenggeng	673	177	27	29	906
3.	Pekan Nenas	565	117	4	1	687
4.	Semenyih	471	183	10	8	672
5.	Langkap	483	130	6	6	625
6.	Ajil	488	83	17	8	596
7.	Machap Umboo	452	98	3	1	554
8.	Tanah Merah	230	29	75	3	337
9.	Bukit Jalil	255	80	1	0	336
10.	Juru	172	82	12	14	280
11.	Bekenu	130	9	0	0	139
12.	Semuja	113	19	0	1	133
	JUMLAH	5,370	1,409	161	73	7,013

**Pecahan tahanan mengikut warganegara adalah seperti berikut:-**

BIL.	WARGANEGARA	Lelaki	Perempuan	Kanak-Kanak Lelaki	Kanak-Kanak Perempuan	JUMLAH
1.	INDONESIA	1,618	674	29	26	2,347
2.	MYANMAR	1,095	148	117	41	1,401
3.	BANGLADESH	924	3	2	0	929
4.	VIETNAM	184	290	3	2	479
5.	NEPAL	447	16	0	0	463
6.	PAKISTAN	339	1	2	1	343
7.	INDIA	295	22	1	0	318
8.	THAILAND	104	83	1	1	189
9.	CAMBODIA	104	39	3	1	147
10.	CHINA	38	59	0	0	97
11.	NIGERIA	72	8	0	0	80
12.	PHILIPPINES	38	40	0	0	78
13.	SRI LANKA	45	9	0	0	54
14.	TAIWAN	32	1	0	0	33
15.	LAIN-LAIN	35	16	3	1	55
	JUMLAH	5,370	1,409	161	73	7,013

**NO. SOALAN: 67**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATUK WILLIAM @ NYALLAU ANAK BADAK  
[ LUBOK ANTU ]**

**TARIKH : 18 MEI 2015**

**RUJUKAN : 7844**

**SOALAN:**

**Datuk William @ Nyallau anak Badak [ Lubok Antu ] minta MENTERI DALAM NEGERI menyatakan tindakan yang diambil bagi membanteras kegiatan judi haram contohnya wujudnya premis menjalankan kegiatan mesin judi haram di kawasan Lubok Antu kebelakangan ini.**

**JAWAPAN:**

**Tuan Yang di-Pertua,**

**Pihak PDRM, khasnya Jabatan Siasatan Jenayah memandang serius aktiviti perjudian haram terutama yang melibatkan penggunaan internet di seluruh negara. Pihak PDRM sentiasa memantau dan menjalankan operasi secara terancang dan berterusan dalam menangani masalah perjudian ini yang banyak menimbulkan masalah sosial dan menghindari amalan negatif terutama di kalangan golongan remaja.**

**Pihak polis telah melancarkan operasi khas pada Oktober 2014 di seluruh negara termasuk di bandar-bandar utama di Sarawak dan juga di bandar-bandar kecil seperti di Lubok Antu bagi membanteras kegiatan perjudian yang dijalankan oleh orang-orang perseorangan dan juga sindiket-sindiket perjudian.**

**Statistik pemberantasan aktiviti mesin perjudian berkomputer di Negeri Sarawak bagi tahun 2014 seperti berikut:-**

**STATISTIK PERJUDIAN KOMPUTER BAGI TEMPOH JANUARI – DISEMBER 2014**

DAERAH	MESIN PERJUDIAN/SLOT - JANUARI HINGGA DISEMBER 2014				
	SERBUAN BERJAYA	TANGKAPAN	RAMPASAN	RAMPASAN WANG	PERTUDUHAN
2014	2014	2014	2014	2014	2014
KUCHING	176	267	2116	20511	166
PADAWAN	83	112	1286	22291	48
MIRI	144	240	1955	50169	108
SIBU	179	1321	2708	149945	76
BINTULU	88	361	959	18481	7
SARIKEI	27	36	275	3236	8
LIMBANG	40	40	329	4324	1
SRI AMAN	16	18	170	2511	6
KAPIT	12	19	107	2152	0
KOTA SHAN	50	55	473	12406	38
SERIAN	7	7	75	895	0
BETONG	19	41	294	8880	2
MUKAH	12	12	100	482	4
MARUDI	7	19	58	2199	0
SARATOK	3	13	60	2399	2
BAU	19	27	164	4797	16
LAWAS	31	42	221	2649	0
MERADONG	10	10	85	925	5
LUNDU	0	0	0	0	0
JULAU	0	0	0	0	0
SONG	0	0	0	0	0
SIMUNJAN	0	0	0	0	0
TATAU	1	1	8	0	1
KANOWIT	8	11	62	740	4
DALAT	2	2	11	300	0
MATU DARO	1	3	8	135	0
LUBUK ANTU	9	16	135	2362	2
BELAGA	0	0	0	0	0
JUMLAH	944	2673	11659	312789	494

**Statistik pemberantasan aktiviti mesin perjudian berkomputer di Negeri Sarawak bagi tahun 2015 (sehingga April) seperti berikut:-**

**STATISTIK PERJUDIAN KOMPUTER BAGI TEMPOH JANUARI HINGGA MARCH 2015**

DAERAH	MESIN PERJUDIAN/SLOT - JANUARI HINGGA APRIL 2015				
	SERBUAN BERJAYA	TANGKAPAN	RAMPASAN	WANG RAMPASAN	PERTUDUHAN
	2015	2015	2015	2015	2015
KUCHING	34	174	561	5734	2
PADAWAN	38	125	622	12113	0
MIRI	12	80	176	8186	0
SIBU	94	499	1301	45218	0
BINTULU	8	52	88	1977	0
SARIKEI	6	34	151	11356	0
LIMBANG	6	17	69	2210.65	0
SRI AMAN	2	13	14	515	0
KAPIT	3	5	20	250	0
KOTA SHAN	15	77	279	4725	0
SERIAN	0	0	0	0	0
BETONG	2	5	20	185	0
MUKAH	7	17	116	1345	0
MARUDI	5	48	93	3653	0
SARATOK	0	0	0	0	0
BAU	0	0	0	0	0
LAWAS	4	28	73	2227	0
MERADONG	0	0	0	0	0
LUNDU	0	0	0	0	0
JULAU	0	0	0	0	0
SONG	0	0	0	0	0
SIMUNJAN	0	0	0	0	0
TATAU	0	0	0	0	0
KANOWIT	0	0	0	0	0
DALAT	1	1	9	0	0
MATU DARO	0	0	0	0	0
LUBUK ANTU	0	0	0	0	0
BELAGA	0	0	0	0	0
JUMLAH	237	1175	3592	99694.65	2

Bagi menentukan aktiviti perjudian ini dapat ditangani sepenuhnya daripada berulang kembali, PDRM telah menubuhkan unit pemantau yang diletakkan di bawah Jabatan Integriti dan Pematuhan Standard (JIPS) dalam memastikan gejala judi haram diperangi sehingga ke akar umbi. Pasukan ini akan memantau semula premis-premis yang pernah diserbu bagi memastikan bahawa premis tidak kembali menjalankan semula aktiviti mesin perjudian haram. Pihak JIPS telah membuat pemantauan di seluruh negara mulai bulan November 2014 sehingga kini. Statistik pemantauan yang oleh pihak JIPS bermula November 2014 sehingga 3 Mac 2015 seperti berikut:-

<b>JUMLAH PEMANTAUAN</b>	<b>35,832</b>
<b>PREMIS TUTUP</b>	<b>35,058</b>
<b>PREMIS BUKA</b>	<b>808</b>
<b>SERBUAN</b>	<b>161</b>
<b>TANGKAPAN</b>	<b>620 ORANG</b>
<b>RAMPASAN BARANG</b>	<b>1,105</b>
<b>RAMPASAN WANG</b>	<b>RM 26,939</b>

Pihak polis sememangnya serius untuk membasmi kegiatan perjudian ini dan kini sedang memantau Modus Operandi (MO) baru yang digunakan oleh sindiket-sindiket dengan cara mengubah lokasi ke kondominium serta rumah kediaman bagi mengaburi mata pihak penguatkuasa. Selain itu, terdapat juga cubaan sindiket perjudian melalui ejen-ejen. Mereka menjalankan perniagaan dengan menggunakan *tablet* dan *handphone (on demand)* dengan kaedah

**tablet** akan diserahkan kepada pemain secara tertutup untuk mendapatkan jaringan perjudian. Cubaan terbaru ini telah berjaya dikesan oleh pihak PDRM dengan beberapa serbuan dan tangkapan yang telah dibuat terhadap taktik terbaru ini.

Usaha dan tindakan yang diambil oleh polis melalui operasi “Op Dadu” yang dilakukan secara agresif dan berterusan dilihat dapat mengekang gejala ini dari terus berlaku. Namun demikian usaha ini tidak akan berjaya sepenuhnya tanpa ada penglibatan daripada orang ramai dalam menyalurkan maklumat kepada pihak polis di samping orang ramai perlu menghindari aktiviti yang tidak sihat ini. Aktiviti perjudian akan terus wujud jika ada permintaan daripada pemain.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL KETIGA,**  
**PARLIMEN KETIGA BELAS,**  
**MAJLIS MESYUARAT DEWAN RAKYAT**

**PERTANYAAN :** LISAN

**DARIPADA :** YB TUAN CHE MOHAMAD ZULKIFLY BIN JUSOH [ SETIU ]

**TARIKH :** 18 MEI 2015 (ISNIN)

**SOALAN :**

Tuan Che Mohamad Zulkifly bin Jusoh [ Setiu ] minta **PERDANA MENTERI** menyatakan sejauh mana program latihan kemahiran secara komprehensif yang berdasarkan keperluan teknikal dan bukan teknikal melalui institusi-institusi tempatan yang diwujudkan oleh PETRONAS telah berjaya melahirkan tenaga kerja yang berkemahiran tinggi, berkompeten, cemerlang dan mampu bersaing di dalam arena industri hiliran dan gas di peringkat global terutamanya di kalangan anak tempatan.

**JAWAPAN: YB SENATOR DATO' SRI ABDUL WAHID OMAR,**

**MENTERI DI JABATAN PERDANA MENTERI**

Tuan Yang di-Pertua,

PETRONAS, di dalam usahanya untuk melahirkan tenaga kerja yang berkemahiran tinggi, kompeten, cemerlang dan mampu bersaing di dalam arena industri minyak dan gas di peringkat global, telah menawarkan beberapa program latihan kemahiran teknikal untuk melatih pekerja mahir dan separa mahir melalui Institut Teknologi Petroleum PETRONAS (INSTEP) untuk lepasan Diploma dan Kimanis Petroleum Training Centre (KTC) bagi lepasan sekolah.

Sejak tahun 1990, INSTEP telah melahirkan lebih daripada 8,500 tenaga kerja teknikal yang berkemahiran tinggi dan berdaya saing melalui Program Teknologi Petroleum yang ditawarkan kepada individu yang memenuhi syarat-syarat kelayakan. Selain daripada berkhidmat di dalam negara, terdapat juga graduan INSTEP yang telah berjaya berkhidmat di peringkat antarabangsa seperti di Turkmenistan dan Iraq. Pada masa ini, lebih daripada 3,700 orang daripada graduan INSTEP masih lagi di dalam perkhidmatan manakala selebihnya tidak lagi berkhidmat bersama PETRONAS di atas sebab , perpindahan tempat kerja dan sebagainya.

Sejak ditubuhkan pada tahun 2011, KTC telah melahirkan seramai 47 orang graduan yang telah menamatkan pelajaran di dalam bidang instrumentasi dan memperoleh kelayakan Sijil Kemahiran Malaysia, di mana dalam 80 peratus sedang berkhidmat di dalam industri minyak dan gas, termasuk seorang graduan yang bertugas di negara Bahrain. Selebihnya masih dalam proses mendapatkan pekerjaan dalam bidang minyak dan gas di dalam dan luar negara, termasuk sejumlah graduan yang bakal melanjutkan pelajaran ke peringkat yang lebih tinggi.

PETRONAS juga menjalankan program *Vocational Institution Sponsorship and Training Assistance* (VISTA), sebagai sebahagian daripada program tanggungjawab sosial korporat (*Corporate Social Responsibility*). Program ini melibatkan kerjasama bersama institut-institut latihan vokasional di seluruh negara merangkumi aspek bantuan dari segi penyediaan peralatan, latihan pengajar dan kurikulum program teknikal. Sejak 1992, program tersebut telah melahirkan lebih daripada 8,000 tenaga kerja teknikal yang sedang berkhidmat di dalam pelbagai industri di seluruh Negara termasuk sejumlah graduan yang telah memulakan perniagaan sendiri. Ini merupakan satu program yang baik dan akan diteruskan sebagai sokongan kepada institut latihan vokasional seluruh negara dalam melahirkan tenaga kerja berkemahiran bagi menyokong pembangunan dan pertumbuhan ekonomi negara.

Sekian, terima kasih.

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : PUAN KASTHURIRAANI A/P PATTO  
[ BATU KAWAN ]**

**TARIKH : 18 MEI 2015**

**RUJUKAN : 7845**

**SOALAN:**

**Puan Kasthuriraani a/p Patto [ Batu Kawan ]** minta **PERDANA MENTERI** menyatakan mengapakah wujudnya perbezaan dalam kenyataan yang dikeluarkan oleh Ketua Polis Negara dan Menteri Dalam Negeri dalam kes bantahan salib di atas dinding gereja di Taman Medan tanpa apa-apa siasatan dilakukan terlebih dahulu.

**JAWAPAN:**

**Tuan Yang di-Pertua,**

**Berhubung dengan isu perhimpunan untuk membantah kewujudan gereja di kawasan Taman Medan di Metro Square Taman Medan, Petaling Jaya di mana Menteri Dalam Negeri telah menyatakan tindakan boleh diambil di bawah Akta Hasutan. Walau bagaimanapun, pihak polis telah menjalankan siasatan berkait Petaling Jaya Repot 5415/2015 di bawah Seksyen 448/511 Kanun Keseksaan kerana melakukan kesalahan cuba melakukan pencerobohan bangunan pada 20 April 2015. Dalam kejadian tersebut terdapat lebih kurang 40 orang telah hadir dan berkumpul di kawasan tersebut.**

**Pihak polis dalam proses untuk melengkapkan siasatan serta mengumpul bukti-bukti sebelum Kertas Siasatan diedarkan kepada pihak Pejabat Peguam Negara untuk tindakan lanjut .**

**NO. SOALAN: 70**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DATUK IKMAL HISHAM BIN ABDUL AZIZ  
[ TANAH MERAH ]**

**TARIKH : 18 MEI 2015**

**RUJUKAN : 7846**

**SOALAN:**

**Datuk Ikmal Hisham bin Abdul Aziz [ Tanah Merah ] minta MENTERI DALAM NEGERI menyatakan setakat ini berapa ramaikah rakyat Malaysia terlibat dalam kumpulan militan Negara Islam dan usia mereka.**

**JAWAPAN:**

**Tuan Yang di-Pertua,**

**Sehingga 7 Mei 2015, seramai 154 orang rakyat Malaysia terlibat dengan kegiatan kumpulan militan *Islamic State* (IS). Daripada jumlah tersebut, 91 orang telah berjaya ditangkap di Malaysia. Manakala selebihnya seramai 45 orang masih berada di kawasan konflik, 11 orang telah terkorban dan baki 7 orang lagi telah kembali ke Malaysia di mana 6 orang daripadanya telah ditangkap dan seorang lagi masih dijejaki oleh pihak PDRM.**

Individu yang terlibat dengan kumpulan militan IS ini adalah terdiri daripada pelbagai peringkat umur iaitu antara 1 tahun hingga 60 tahun. Keadaan ini sangat membimbangkan Kerajaan apabila ianya turut melibatkan kanak-kanak. Sehubungan itu, langkah Kerajaan di dalam menggubal Rang Undang-undang Pencegahan Keganasan 2015 adalah sangat bertepatan kerana selain daripada mengambil tindakan di bawah undang-undang punitif, mereka ini juga boleh diambil tindakan di bawah Undang-undang Pencegahan Keganasan 2015 yang telahpun diluluskan di kedua-dua Dewan Parlimen dan sedang dalam proses bagi mendapatkan perkenan Seri Paduka Baginda Yang DiPertuan Agong. Seperti Ahli Yang Berhormat sedia maklum, undang-undang pencegahan yang baru ini adalah menekankan tentang proses pemulihan dan ini adalah sangat bersesuaian

**dengan hasrat Kerajaan untuk memberi peluang supaya mereka pulih dan kembali ke pangkuan masyarakat.**

**Pada masa yang sama, saya juga ingin mengambil kesempatan untuk menasihatkan semua rakyat Malaysia agar menjauhkan diri mereka daripada terlibat dengan sebarang kegiatan yang berkaitan dengan *Islamic State* ini.**

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATO' ABD. AZIZ BIN HAJI SHEIKH FADZIR  
(KULIM BANDAR BAHARU)**

**PERTANYAAN : LISAN**

**TARIKH : 18.05.2015**

**Y.B. DATO' ABD. AZIZ BIN HAJI SHEIKH FADZIR [ KULIM BANDAR BAHARU ]** minta **MENTERI KEWANGAN** menyatakan apakah rasional untuk menggunakan Pembinaan PFI bagi menyalurkan dana untuk projek pembangunan dan bukannya menyalurkan dana melalui saluran konvensional iaitu perbelanjaan pembangunan dalam belanjawan Kerajaan serta nyatakan senarai semua projek termasuklah nama kontraktor, kos dan juga status setiap projek yang telah dibiayai oleh Pembinaan PFI sejak penubuhannya.

**JAWAPAN**

Tuan Yang di-Pertua,

Untuk makluman Yang Berhormat, Pembinaan PFI Sdn Bhd (PPFI) adalah sebuah Syarikat Tujuan Khas (*Special Purpose Vehicle-SPV*) milik penuh Menteri Kewangan Diperbadankan (MKD) yang ditubuhkan pada 28 September 2006. Tujuan penubuhan syarikat ini ialah untuk memperoleh dana bagi membiayai projek-projek pembangunan dan program-program yang dikenalpasti oleh Kerajaan.

Semasa pembentangan Rancangan Malaysia Ke-9 di Parlimen pada 31 Mac 2006, Kerajaan telah mengumumkan pelaksanaan inisiatif pembiayaan swasta (PFI) dengan dana sebanyak RM20 bilion (PFI 1) dan semasa pembentangan Bajet 2012 dan 2013, Kerajaan mengumumkan pelaksanaan Pakej Rangsangan Khas yang dibiayai melalui PFI sebanyak RM12 bilion (PFI 2). Perolehan dana melalui PPFI untuk membiayai projek-projek pembangunan ini adalah bertujuan untuk mempercepatkan pelaksanaan projek-projek pembangunan Kerajaan terutamanya projek-projek infrastruktur seperti sekolah, universiti, hospital, penjara dan sebagainya memandangkan peruntukan dibawah Belanja Pembangunan (DE) adalah terhad.

Tuan Yang di-Pertua,

Untuk makluman Yang Berhormat, pelaksanaan projek termasuk proses perolehan di bawah PFI ini adalah sama seperti projek-projek pembangunan Kerajaan sedia ada yang dibiayai melalui DE. Perbezaan hanya dari aspek pembiayaan, di mana PPFI ditubuhkan bagi mendapatkan pinjaman yang kemudiannya disalurkan ke Akaun Amanah PFI di bawah kendalian Jabatan Akauntan Negara. Kaedah ini berbeza dengan pelaksanaan projek di bawah konsep kerjasama awam swasta (3P) yang diterajui oleh Unit Kerjasama Awam Swasta, Jabatan perdana Menteri (UKAS, JPM) yang mana projek berkenaan dibiayai dan dilaksanakan sepenuhnya oleh pihak swasta.

Secara umumnya, projek-projek yang dikenal pasti untuk dilaksanakan melalui pembiayaan dana PFI ini perlu mempunyai *spin-off* yang meluas ke atas pertumbuhan ekonomi dan perlu dilaksanakan dengan segera untuk memberi manfaat kepada rakyat. Terdapat 547 projek dibiayai di bawah PFI 1 dan sehingga April 2015, sebanyak 526 projek (96.2%) telah siap dilaksanakan. Bagi PFI 2 pula, terdapat 339

projek yang dikenalpasti dan 77 projek telah siap sepenuhnya manakala 262 projek/program lagi masih di peringkat pra pembinaan atau pelaksanaan dan peringkat pembinaan atau pelaksanaan. Proses perolehan, pelaksanaan dan pemantauan projek/program termasuk pelantikan kontraktor bagi menjalankan projek/program pembangunan melalui dana PFI ini dilaksanakan sepenuhnya oleh Kementerian/Agensi yang terlibat mengikut prosedur perolehan Kerajaan sedia ada. PPFI hanya berperanan mendapatkan dana untuk membiayai projek/program pembangunan yang telah dikenalpasti.

**NO. SOALAN: 72**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN HEE LOY SIAN  
[ PETALING JAYA SELATAN ]**

**TARIKH : 18 MEI 2015**

**RUJUKAN : 7847**

**SOALAN:**

**Tuan Hee Loy Sian [ Petaling Jaya Selatan ] minta MENTERI DALAM NEGERI menyatakan hasil siasatan dan tindakan ke atas pihak yang mengganggu upacara keagamaan di Gereja Community of Praise, Taman Medan, PJS 2 pada 19 April 2015 lalu.**

**JAWAPAN:**

**Tuan Yang di-Pertua,**

Kementerian memandang serius tentang kes-kes jenayah yang berlaku terutamanya kejadian yang boleh menjaskan keselamatan dan keharmonian negara, siasatan akan dijalankan tanpa mengira sama ada ianya dilakukan oleh individu berpengaruh atau sebaliknya. Berhubung dengan isu perhimpunan bagi membantah kewujudan gereja di kawasan Taman Medan di Metro Square Taman Medan, Petaling Jaya pada 20 April 2015, pihak polis telah membuka kertas siasatan berkait Petaling Jaya Repot 5415/2015 di bawah Seksyen 448/511 Kanun Keseksaan atas kesalahan cuba melakukan pencerobohan bangunan. Dalam kejadian tersebut terdapat lebih kurang 40 orang telah hadir dan berkumpul di kawasan tersebut.

Pihak polis masih meneruskan siasatan untuk mengumpul segala keterangan-keterangan dan bukti-bukti sebelum Kertas Siasatan diedarkan kepada pihak Pejabat Peguam Negara untuk tindakan lanjut. Kementerian tidak bercadang untuk mengulas lebih lanjut mengenai perkara ini kerana dikhuatiri boleh menjaskan proses siasatan yang sedang dijalankan.

**PEMBERITAHUAN PERTANYAAN BAGI JAWAB LISAN**  
**DEWAN RAKYAT**

**PERTANYAAN : LISAN**

**DARIPADA : DR. KO CHUNG SEN [KAMPAR ]**

**TARIKH : 18 MEI 2015**

**RUJUKAN : 7848**

**SOALAN:**

**Dr. Ko Chung Sen [Kampar ] minta MENTERI DALAM NEGERI menyatakan:-**

- (a) bilangan orang yang disiasat, ditahan, didakwa dan disabitkan atas kes menghasut setiap tahun bagi tempoh 5 tahun yang lepas; dan
- (b) apakah sebab-sebab peningkatan bilangan kes-kes hasutan dan sejauh manakah keberkesanan langkah-langkah yang diambil Kerajaan untuk memupuk toleransi dan keharmonian antara kaum.

**JAWAPAN:**

**Tuan Yang di-Pertua,**

**Bagi menjawab soalan (a), sejak tahun 2010 sehingga 31 Disember 2014, sebanyak 87 kes telah disiasat di bawah Akta Hasutan 1948. Daripada jumlah tersebut, 23 kes telah dibawa ke Mahkamah untuk pendakwaan.**

**Bagi menjawab soalan (b), Kerajaan tidak pernah menyekat kebebasan rakyat untuk bersuara bagi menyatakan pendapat mereka tetapi kebebasan yang diberi bukanlah secara mutlak namun terdapat segelintir pihak yang mengambil kesempatan terhadap kebebasan yang diberi. Tambahan pula dengan senario semasa dunia tanpa sempadan juga memudahkan maklumat-maklumat disebarluaskan dengan lebih pantas menerusi platform media sosial.**

**Tuan Yang di-Pertua,**

**Kerajaan telahpun mengambil tindakan secara berterusan bagi mengekang isu perkauman ini berdasarkan tiga (3) pendekatan iaitu:**

- i. melalui penguatkuasaan undang-undang termasuklah mengambil tindakan di bawah Akta Hasutan 1948 di samping undang-undang lain yang berkaitan;**

- ii. menjalankan kerjasama dengan NGO-NGO serta pemimpin-pemimpin tempatan untuk membentuk perhubungan yang baik dan persefahaman antara setiap pihak agar saling menghormati diantara kaum dan agama di dalam masyarakat majmuk di negara ini; dan
- iii. menjalankan aktiviti-aktiviti kempen kesedaran dan ceramah-ceramah berhubung keselamatan dan ketenteraman awam untuk menerangkan tentang bahayanya jika terlibat dengan kegiatan mencetuskan ketegangan dan perbalahan antara kaum dan agama.

**Tuan Yang di-Pertua,**

**Ahli-ahli Yang Berhormat juga sedia maklum, pindaan terhadap Akta Hasutan 1948 telahpun diluluskan oleh Parlimen pada sesi yang lalu. Ini menunjukkan keseriusan Kerajaan di dalam memastikan negara sentiasa dalam keadaan aman bagi mengelakkan ketegangan antara kaum berlaku.**

NO. SOALAN: 74

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**

**DARIPADA : DATO' MANSOR BIN OTHMAN  
[NIBONG TEBAL]**

**TARIKH : 18.05.2015 (ISNIN)**

**DATO' MANSOR BIN OTHMAN [NIBONG TEBAL]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan kaedah bagaimana pihak Kerajaan memantau keberkesanan proses pelaksanaan penurunan harga barang sepetimana yang dijanjikan oleh Kerajaan dengan terlaksananya sistem cukai GST 6%.

**JAWAPAN:**

**Tuan Yang Di-Pertua,**

Antara kaedah yang dilakukan oleh Kementerian bagi memantau keberkesanan proses pelaksanaan penurunan harga barang dengan terlaksananya sistem cukai GST 6% yang bermula 1 April 2015 adalah melalui pelaksanaan pemantauan harga barang dan perkhidmatan di seluruh negara. Pemantauan ini dilaksanakan oleh Pegawai Pemantau Harga Kementerian yang melibatkan sebanyak 5,000 barang dan perkhidmatan yang merangkumi 80 kategori berdasarkan 944 data barang daripada Jabatan Kastam DiRaja Malaysia. Pemantauan ini juga melibatkan 10 fasa kutipan harga iaitu sebelum, semasa dan selepas GST dilaksanakan.

Pihak Kementerian juga bertanggungjawab dalam penguatkuasaan Akta Kawalan Harga dan Antipencatutan 2011 bagi memastikan tidak berlakunya kenaikan harga barang dan perkhidmatan secara tidak terkawal sebelum, semasa dan selepas pelaksanaan GST. Bagi memantau keberkesanan pelaksanaan penurunan harga barang, pihak Kementerian juga menjalankan Ops Catut, pemantauan aduan melalui Pusat Gerakan Antipencatutan (PGAP), MyKIRA GST dan penggunaan aplikasi Ez-ADU.

Kementerian turut membangunkan pangkalan data harga barang dan perkhidmatan sebagai sumber rujukan yang penting mengenai perubahan dan kedudukan tren harga serta caj yang berpatutan dalam pasaran. Kutipan harga yang dilakukan setiap fasa akan dikemaskini ke dalam pangkalan data tersebut. Pangkalan data yang diwujudkan akan digunakan sebagai *Benchmark* dan petanda kepada siasatan Akta

Kawalan Harga dan Anti Pencatutan 2011 oleh Bahagian Penguatkuasa KPDNKK jika berlaku kenaikan harga yang melampau.

Selain itu, Buku Panduan Harga Pengguna juga diterbitkan bagi membantu rakyat Malaysia khususnya pengguna dalam membuat perbandingan harga barang keperluan asas sebelum dan selepas pelaksanaan GST. Berdasarkan maklumat yang terdapat di dalam buku Panduan Harga Pengguna ini dapat membantu pengguna dalam memastikan tiada pihak yang mengambil kesempatan menaikkan harga secara berlebihan dengan menjadikan GST sebagai alasan.

Di samping itu juga, pihak Kementerian juga telah melancarkan Kempen-Kempen Penurunan Harga 2015 yang melibatkan 7 anak syarikat dengan menawarkan diskaun sehingga 87% bagi 487,879 produk.

**PEMBERITAHUAN PERTANYAAN**  
**DEWAN RAKYAT MALAYSIA**

**PERTANYAAN : LISAN**

**DARIPADA : DATUK DR. HAJI ABD. LATIFF BIN HAJI AHMAD**

**KAWASAN : MERSING**

**TARIKH : 18 MEI 2015 (ISNIN)**

**NO. SOALAN : 75**

YB DATUK DR. HAJI ABD. LATIFF BIN HAJI AHMAD minta MENTERI PERDAGANGAN ANTARABANGSA DAN INDUSTRI menyatakan status penurunan harga kereta ekoran daripada pelaksanaan GST:-

- (a) apakah asas yang diguna pakai dalam pengiraan penurunan harga; dan
- (b) adakah penurunan harga melibatkan semua pengedar/pengeluar kenderaan.

## **JAWAPAN**

Tuan Yang Di Pertua,

Dasar Automotif Nasional (NAP) yang telah dilaksanakan sejak 2014 telah menggariskan pelan tindakan bagi mengawal selia penurunan harga kenderaan secara berperingkat termasuk melalui pelaksanaan *Goods and Services Tax (GST)*.

Sebagaimana sedia maklum, pelaksanaan GST sebanyak 6 peratus ini menggantikan cukai asal, *Sales and Service Tax* sebanyak 10 peratus.

Sejak pelaksanaan GST pada April 2015, didapati pengurangan harga jualan kenderaan dari 1 peratus ke 3 peratus berbanding harga sebelum pelaksanaan GST. Nilai penurunan harga adalah di antara RM1,000 hingga RM14,000. Penurunan harga ini tidak melibatkan semua pengedar/pengeluar kenderaan.

Bagi pengeluar, analisis yang dijalankan oleh pihak *Malaysia Automotif Institute (MAI)* menunjukkan penurunan harga kenderaan disebabkan oleh pelaksanaan GST ini melibatkan 15 pengeluar kenderaan, manakala tiada perubahan harga oleh 4 pengeluar kenderaan. Terdapat 3 pengeluar kenderaan yang masih belum membuat sebarang pengumuman rasmi berkaitan status harga kenderaan selepas pelaksanaan GST.

NO. SOALAN: 76

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**TARIKH : 18 MEI 2015 (ISNIN)**

**DARIPADA : YB TUAN LOKE SIEW FOOK  
[ SEREMBAN ]**

**SOALAN :**

**YB Tuan Loke Siew Fook [ Seremban ] minta PERDANA MENTERI menyatakan secara terperinci apakah had kelayakan untuk Perdana Menteri, Timbalan Perdana Menteri dan Ahli Jemaah Menteri dalam penggunaan Pesawat Ekskutif Kerajaan.**

**JAWAPAN: YB DATO' SERI DR. SHAHIDAN BIN KASSIM,  
MENTERI DI JABATAN PERDANA MENTERI**

Tuan Yang di-Pertua,

Pesawat Eksekutif Kerajaan adalah untuk kegunaan Seri Paduka Baginda Yang di-Pertuan Agong, Seri Paduka Baginda Raja Permaisuri Agong, YAB Perdana Menteri dan YAB Timbalan Perdana Menteri.

Pesawat Eksekutif Kerajaan juga boleh digunakan oleh DYMM Sultan-Sultan dan TYT Yang Dipertua-Yang Dipertua Negeri, YB Menteri-Menteri dan YB Timbalan-Timbalan Menteri, Tetamu-tetamu Kerajaan dari Negara Asing dan Pegawai-pegawai Kanan Kerajaan serta Orang-orang Kenamaan berdasarkan Peraturan-Peraturan Penggunaan Pesawat Eksekutif Kerajaan dan Pesawat Angkut Tentera Udara Diraja Malaysia (TUDM) yang berkuatkuasa.

Sekian. Terima kasih.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. TUAN LIM GUAN ENG  
(BAGAN)**

**PERTANYAAN : LISAN**

**TARIKH : 18.05.2015**

**Y.B. TUAN LIM GUAN ENG [ BAGAN ]** minta **MENTERI KEWANGAN** menyatakan sejauh manakah pelaksanaan GST sebanyak 6% telah menambah beban kewangan yang besar kepada rakyat dan memudaratkan pertumbuhan ekonomi dan mengapakah GST dikenakan ke atas projek awam oleh Kerajaan negeri seperti jalan, longkang, pasar, padang hijau dan dewan orang ramai.

**JAWAPAN**

Tuan Yang Dipertua,

Dengan pelaksanaan GST, Kerajaan menjangkakan bahawa Indeks Harga Pengguna akan meningkat pada kadar 1.08% sahaja. Peningkatan ini adalah secara one-off dan akan stabil dalam tempoh jangka masa pendek. Peningkatan ini adalah minimum disebabkan pelbagai barang tidak dikenakan GST termasuk produk petroleum.

Bagi **mengurangkan impak pelaksanaan GST**, Kerajaan telah memperkenalkan pakej bantuan seperti berikut:

1. Melebarkan bantuan subsidi bersasar dengan meningkatkan amaun pemberian BR1M sebanyak RM300 ke atas BR1M sedia ada;
2. Kadar cukai pendapatan individu dikurangkan sebanyak satu hingga tiga mata peratusan. **Melalui langkah ini, seramai 300 ribu orang yang kini membayar cukai pendapatan tidak lagi perlu bayar;** dan
3. Cukai pendapatan individu juga akan distruktur semula di mana pendapatan bercukai pada kadar maksimum dinaikkan daripada melebihi RM100,000 kepada melebihi RM400,000. **Kadar cukai maksimum yang kini 26% pula, dikurangkan kepada 24%, 24.5%, dan 25%. Justeru, pembayar cukai akan menikmati penjimatan bayaran cukai sekurang-kurangnya sebanyak 5.3%.**

Tuan Yang DiPertua,

Secara dasarnya, perolehan ke atas barang yang dibuat oleh Kerajaan Persekutuan dan Negeri diberi pelepasan dari membayar GST. Manakala bagi perolehan perkhidmatan, tiada pelepasan diberikan. Ini adalah selaras dengan dasar yang diamalkan sekarang di bawah sistem cukai jualan dan cukai perkhidmatan.

Bagi maksud GST projek kerja seperti pembinaan jalan raya, dewan, taman rekreasi dan gelanggang sukan adalah merupakan perolehan perkhidmatan. Ini bermaksud jabatan Kerajaan perlu membayar GST yang dikenakan oleh kontraktor yang dilantik.

**NO. SOALAN: 78**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : DR. KO CHUNG SEN [ KAMPAR ]**

**TARIKH : 18 MEI 2015**

**RUJUKAN : 7849**

**SOALAN:**

**Dr. Ko Chung Sen [ Kampar ] minta MENTERI DALAM NEGERI menyatakan :-**

- (a) sama ada PDRM sedar tentang kewujudan laman Facebook "Boikot Barang Cina DAP" (<https://www.facebook.com/BoikotBaranganCinaDapOri>) dan blog yang bertujuan untuk menghasut kebencian terhadap kaum Cina atau DAP; dan
- (b) sama ada ini dianggap menghasut dan apakah tindakan yang telah diambil terhadap mereka yang menguruskan laman web ini dan mereka yang menyebarkan kandungannya.

**JAWAPAN:**

**Tuan yang di-Pertua,**

**Bagi menjawab soalan (a), tidak dinafikan bahawa pihak Polis DiRaja Malaysia (PDRM) sedar akan kewujudan laman *facebook* serta blog *sepertimana* yang dimaksudkan oleh Ahli Yang Berhormat.**

**Bagi menjawab soalan (b) pula, saya tidak berhasrat untuk mengatakan sama ada ianya sesuatu yang menghasut ataupun tidak. Ini adalah kerana Ahli-ahli Yang Berhormat sedia maklum akan prosedur sebelum sesuatu kes itu dibuat pendakwaan di mahkamah di mana pihak polis akan menjalankan siasatan berdasarkan jika terdapat pihak-pihak tertentu membuat laporan polis. Selepas itu, Kertas Siasatan yang telah lengkap akan dikemukakan kepada Jabatan Peguam Negara untuk diteliti bagi tujuan pendakwaan. Sehubungan itu, tidak wajar untuk saya manyatakan sama ada ianya berunsur hasutan ataupun tidak.**

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**  
**DARIPADA : PUAN RUBIAH BINTI HAJI WANG**  
**[ KOTA SAMARAHAN ]**  
**TARIKH : 18.5.2015 (ISNIN)**

**PUAN RUBIAH BINTI HAJI WANG [ KOTA SAMARAHAN ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan secara terperinci hasil tindakan kementerian dalam menguatkuasakan kenaikan harga barang berikutan terdapat sesetengah pengusaha, pekedai, ataupun peruncit yang menaikkan harga barang sesuka hati dengan alasan pelaksanaan GST.

**JAWAPAN:**

Tuan Yang Di-Pertua,

Kementerian Perdagangan Dalam Negeri, Koperasi dan Kepenggunaan telah melaksanakan gerak gempur antipencatutan melalui **OPS CATUT Fasa 1** yang telah bermula pada **15 Januari 2015 hingga 31 Mac 2015** manakala **OPS CATUT Fasa 2** bermula daripada **1 April 2015** sehingga kini.

Operasi ini adalah satu tindakan penguatkuasaan gerak gempur secara terancang dan berfokus melalui **Akta Kawalan Harga dan Antipencatutan (AKHAP) 2011** dan **Peraturan-Peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munasabah) (Margin Keuntungan Bersih) 2014** ke atas keseluruhan rantaian pengedaran barang dan perkhidmatan di seluruh negara untuk menangani tindakan oleh mana-mana pihak yang cuba mengambil kesempatan menaikkan harga barang dan caj perkhidmatan tanpa sebab yang munasabah dengan menggunakan alasan GST.

Pelaksanaan **OPS CATUT Fasa 1** telah memeriksa sebanyak **597,833 premis perniagaan** di seluruh negara. Dari jumlah ini, sebanyak **2,871 kes** telah dihasilkan dengan nilai rampasan sebanyak **RM492,137** dan nilai kompaun sebanyak **RM335,166**. Manakala di bawah **seksyen 21 AKHAP 2011** sebanyak **286 Notis** telah dikeluarkan terhadap peniaga yang menaikkan harga barang.

Sehingga 14 Mei 2015, OPS CATUT Fasa 2 telah memeriksa sebanyak 283,245 premis perniagaan di seluruh negara. Dari jumlah ini, sebanyak 815 kes telah dihasilkan dengan nilai rampasan sebanyak RM134,830 dan nilai kompaun sebanyak RM122,250. Manakala di bawah seksyen 21 AKHAP 2011 sebanyak 819 Notis telah dikeluarkan terhadap peniaga yang menaikkan harga barang.

Tuan Yang Di-Pertua,

Kementerian juga bekerjasama dengan Jabatan Kastam DiRaja Malaysia (JKDM) dalam operasi bersepadu menerusi OPS PEMATUHAN GST-CATUT bermula 1 hingga 15 April 2015.

**Pengeluaran Notis** dibuat di bawah seksyen 21 AKHAP 2011 ke atas mana-mana pihak yang didapati menaikkan harga secara mendadak dan ketara. Peniaga yang gagal atau enggan memberi penjelasan terhadap kenaikan tersebut atau gagal mengemukakan maklumat yang diarahkan boleh dikenakan tindakan undang-undang di bawah Akta ini.

Sehingga 14 Mei 2015, sebanyak 8 kes telah **didakwa dan dikompaun** di bawah **seksyen 14(1)** dan **seksyen 21(5)** AKHAP 2011 iaitu 2 kes di Melaka, 2 kes di Pulau Pinang, 1 kes di Kelantan, 1 kes di Putrajaya, 1 kes di Johor dan 1 kes di Wilayah Persekutuan Kuala Lumpur.

**NO. SOALAN: 80**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN LIM LIP ENG[ SEGAMBUT ]**

**TARIKH : 18 MEI 2015**

**RUJUKAN : 7850**

**SOALAN:**

**Tuan Lim Lip Eng [ Segambut ]** minta **MENTERI DALAM NEGERI** menyatakan berapa kali pihak polis telah menghantar pegawai untuk bertemu Sirul Azhar Umar di Australia berhubung kes pembunuhan Altantuya Shaariibuu, nama anggota polis yang dihantar dan tarikh pertemuan itu.

**JAWAPAN:**

**Yang di-Pertua,**

**Maklumat yang dipohon oleh Ahli Yang Berhormat Segambut tidak dapat dikemukakan buat masa ini kerana ia masih lagi dalam siasatan pihak berkuasa. Saya khuatir ia akan menganggu proses siasatan dan kerahsiaan pihak berkuasa dalam menjalankan siasatan.**

**NO. SOALAN: 81**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TUAN ABDULLAH SANI BIN ABDUL HAMID  
[ KUALA LANGAT ]**

**TARIKH : 18 MEI 2015**

**RUJUKAN : 7851**

**SOALAN:**

**Tuan Abdullah Sani bin Abdul Hamid [ Kuala Langat ] minta MENTERI DALAM NEGERI menyatakan tindakan diambil terhadap pegawai-pegawai polis yang menyalahi hak undang-undang seperti piket yang sah oleh kesatuan sekerja di ambil tindakan oleh pihak polis.**

## JAWAPAN:

Tuan Yang di-Pertua,

**Kehadiran pihak polis dalam mana-mana perhimpunan atau berpiket adalah untuk mengawal keselamatan dan kententeraman awam supaya berjalan lancar tanpa perkara yang tidak diingini berlaku. Mana-mana peserta yang menghadiri sesuatu perhimpunan atau berpiket yang dibenarkan oleh mana-mana undang-undang atau yang telah diberikan kelulusan oleh pihak berkuasa untuk berhimpun adalah tertakluk kepada undang-undang dan peraturan yang terpakai ketika ini. Pihak polis akan mengambil tindakan sewajarnya jika kumpulan yang berhimpun telah membuat gangguan terhadap lalulintas atau mengambil tindakan yang tidak selaras dengan mana-mana peruntukan di bawah mana-mana akta yang boleh mengakibatkan pemecahan keamanan.**

**Berkaitan pertanyaan yang dikemukakan, adalah dua isu yang berbeza, walaupun piket tersebut adalah sah di bawah mana-mana undang-undang atau peraturan, tetapi masih tertakluk kepada undang-undang lain yang sedia ada. Dalam perkara ini, tiada tindakan tatatertib atau pendakwaan di mahkamah akan dikenakan oleh pihak polis yang mengambil tindakan dengan suci hati untuk mengawal perhimpunan berkenaan berlandaskan kepada undang-undang dan peraturan yang sedia ada kecuali terdapat aduan yang menyatakan tindakan yang diambil oleh pihak polis adalah secara kekerasan di luar batas kemanusiaan atau menyalahgunakan kuasa yang diberikan.**

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : LISAN**  
**DARIPADA : YB DATUK JUMAT BIN IDRIS [ SEPANGGAR ]**  
**TARIKH : 18 MEI 2015**  
**SOALAN :**

**YB Datuk Jumat bin Idris [ Sepanggar ]** minta **MENTERI KESIHATAN** menyatakan :-

- (a) adakah rakyat Malaysia begitu terdedah dengan penyakit Denggi ; dan
- (b) apakah cadangan Kementerian dalam menangani isu Denggi ini di kalangan rakyat Malaysia

**Tuan Yang di-Pertua,**

Rakyat Malaysia adalah terdedah dengan penyakit denggi kerana faktor-faktor berikut:-.

1. Faktor persekitaran yang tidak bersih dan menyumbang kepada tempat-tempat pembiakan Aedes seperti bekas polisterine, bekas

plastik dan tayar terpakai. Ini disebabkan tabiat masyarakat yang membuang sampah merata rata dan tidak mengurus sampah dengan baik. Selain itu, kurangnya kesedaran masyarakat untuk melaksanakan tindakan pencegahan seperti membersihkan persekitaran mereka dan melaksanakan aktiviti "cari dan musnah" tempat pembiakan Aedes setiap minggu;

2. Pergerakan manusia yang tidak terbatas dan lebih meluas terutamanya bagi pesakit yang telah dijangkiti virus denggi akan mudah menyebarkan virus ke tempat lain apabila pesakit melawat ke tempat baru;
3. Kepadatan penduduk yang tinggi di kawasan bandar menyebabkan penularan jangkitan lebih mudah dan pembangunan yang pesat memberi kesan kepada peningkatan tempat-tempat pembiakan Aedes;
4. Berlaku perubahan serotaip denggi (*serotype shift*) dalam komuniti dan menyebabkan peningkatan kes serta kematian denggi. Misalnya pada tahun 2014, telah berlaku 2 kali *serotype shift* iaitu pada bulan Mac dan bulan Ogos dan dari pemerhatian KKM selepas 4 bulan berlakunya *serotype shift tersebut*, terdapat peningkatan kes dan juga kematian denggi; dan
5. Faktor cuaca contohnya musim hujan dimana bekas yang boleh menakung air akan menjadi tempat pembiakan Aedes menyebabkan populasi Aedes meningkat seterusnya menyebarkan virus denggi.

**Tuan Yang di-Pertua,**

Untuk menangani isu denggi di kalangan rakyat Malaysia, Kementerian Kesihatan Malaysia (KKM) mencadangkan beberapa perkara berikut:-

1. Memastikan kediaman masing-masing bebas daripada tempat pembiakan Aedes dengan meluangkan hanya 10 minit setiap minggu, untuk mencari dan memusnahkan tempat-tempat pembiakan Aedes. Selain itu, jangan membuang sampah secara merata-rata dan pengurusan sampah hendaklah dilakukan dengan baik oleh pihak berwajib;
2. Membubuh bahan pembunuhan jentik jentik atau temephos (Abate) ke dalam bekas-bekas yang menakung air seperti kolah mandi, tangki air, alas pasu bunga, pam tandas dan sebagainya;
3. Menggunakan bahan pelindung diri seperti repellen bagi mengelakkan daripada gigitan nyamuk Aedes. Selain itu dinasihatkan untuk memakai seluar panjang dan baju lengan panjang, menggunakan jaring penghalang nyamuk di ruang rumah yang terbuka serta menggunakan aerosol bagi membunuh nyamuk dewasa;
4. Bekerjasama dengan masyarakat setempat dan lain-lain jabatan dan agensi dalam aktiviti gotong royong, Program Ayuh Gempur Aedes dan Program Communication for Behavioural Impact (COMBI); dan

5. Mendapatkan rawatan segera sama ada di klinik atau hospital sekiranya mengidap demam untuk mengelakkan berlakunya kematian dan komplikasi akibat denggi.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATO' FAUZI BIN ABDUL RAHMAN  
(INDERA MAHKOTA)**

**PERTANYAAN : LISAN**

**TARIKH : 18.05.2015**

**Y.B. DATO' FAUZI BIN ABDUL RAHMAN [ INDERA MAHKOTA ]** minta **MENTERI KEWANGAN** menyatakan sebab-sebab kemerosotan nilai Ringgit berbanding dengan mata wang utama dunia serta langkah-langkah cadangan Kerajaan untuk mengembalikan kekuahan nilai Ringgit. Nyatakan juga kesan-kesan positif dan negatif dari sudut implikasi kepada pengurusan kewangan negara dengan kejatuhan nilai mata wang ini.

**JAWAPAN**

Tuan Yang di-Pertua,

Penyusutan kadar pertukaran nilai ringgit sejak September 2014 bukanlah

suatu kes terpencil dan ianya didorong terutamanya oleh faktor luaran. Mata wang serantau yang lain, termasuk ringgit Malaysia turut mengalami penyusutan nilai antara 1% sehingga 11.2% berbanding dolar AS sejak September 2014 hingga 13 Mei 2015. Pengukuhan dolar AS adalah disebabkan oleh prospek ekonomi AS yang semakin baik dan kemungkinan kenaikan kadar faedah di AS yang menarik minat pelabur terhadap aset dalam nilai dolar AS. Selain itu, negara-negara pengeksport komoditi, termasuk Malaysia, turut mengalami kesan ekoran kejatuhan harga minyak mentah dunia.

2. Berdasarkan perkembangan terkini, prestasi mata wang ringgit telah semakin pulih dan lebih stabil. Malahan, ringgit merupakan antara mata wang yang telah mencatatkan prestasi terbaik berbanding mata wang serantau sejak April 2015. Ringgit menambah nilai sebanyak 3.1% berbanding dolar AS. Ringgit juga menambah nilai berbanding semua mata wang serantau antara 0% sehingga 6.8%. Penambahan nilai ringgit adalah terutamanya disumbangkan oleh kenaikan harga minyak mentah global. Nilai ringgit juga turut meningkat disebabkan oleh penyusutan nilai dolar AS berikutan jangkaan pasaran terhadap penangguhan US Federal Reserve (Fed), dengan izin, untuk mengembalikan kadar faedah ke paras

yang lebih wajar.

Tuan Yang di-Pertua,

3. Seperti sistem kadar pertukaran yang lain, apabila nilai ringgit menyusut, sesetengah sektor ekonomi akan menerima manfaat manakala terdapat juga sesetengah sektor ekonomi yang akan terjejas. Pengeksport akan menerima manfaat dari segi hasil eksport yang lebih tinggi dalam nilai ringgit atau peningkatan dalam permintaan bagi barang buatan Malaysia. Secara khususnya, penyusutan nilai ringgit akan memberi manfaat kepada eksport perkilangan Malaysia yang menyumbang sebanyak dua pertiga daripada jumlah eksport kasar.

4. Namun begitu, penyusutan nilai ringgit akan menyebabkan kenaikan kos import. Ini akan menyebabkan kesan langsung terhadap Indeks Harga Pengguna (IHP) yang mengukur inflasi kerana harga barang yang diimport secara terus dari luar negara akan menjadi lebih mahal. Walau bagaimanapun, setakat ini, kesan terhadap kadar inflasi adalah kecil, antaranya disebabkan oleh jumlah barang import tidak termasuk petrol dan diesel hanya mencakupi 7.2% daripada bakul IHP. Selain itu, harga minyak mentah global telah turun sebanyak 35.2% sementara harga makanan dunia telah turun sebanyak 14.3% sejak

September 2014. Oleh yang demikian, kesan terhadap kos bagi pengeluar masih lagi terkawal. Ini ditunjukkan oleh Indeks Harga Pengeluar (IHPR), dengan izin Producer Price Index, telah menurun sebanyak 3.6% antara September 2014 dan Mac 2015. Malahan, penyusutan nilai ringgit tidak memberi kesan ketara kepada kedudukan kewangan Kerajaan Persekutuan disebabkan oleh hutang luar pesisir hanya 3% atau RM17.6 bilion daripada jumlah hutang Kerajaan Persekutuan.

5. Dari sudut ekonomi pula, asas-asas ekonomi dalam negeri masih berada dalam keadaan yang mapan. Dalam tempoh suku pertama 2015, Keluaran Dalam Negeri Kasar (KDNK) benar mencatat pertumbuhan yang memberangsangkan sebanyak 5.6% terutamanya disokong oleh aktiviti ekonomi domestik yang rancak. Perkembangan ini adalah hasil daripada pelbagai inisiatif yang diambil untuk mempelbagaikan ekonomi negara serta meningkatkan daya tahan dan daya saing negara. Tambahan pula, asas-asas ekonomi yang mapan seperti kadar pengangguran yang rendah, sistem kewangan yang teguh dan rizab antarabangsa yang tinggi turut menyumbang kepada pertumbuhan ekonomi negara. Rizab antarabangsa Malaysia juga turut meningkat pada April 2015 berikutan sentimen pelabur yang bertambah baik. Pada 30 April 2015, rizab antarabangsa berjumlah

dolar AS105.8 bilion (RM392.4 bilion) berbanding dolar AS105.1 bilion (RM389.7 bilion) pada akhir Mac 2015.

6. Seperti mana-mana sistem kadar pertukaran yang fleksibel, turun naik jangka masa pendek adalah sesuatu yang mungkin berlaku, terutamanya dalam persekitaran global yang tidak menentu. Objektif dasar Kerajaan menerusi Bank Negara Malaysia (BNM) adalah untuk memastikan keadaan yang teratur dalam pasaran pertukaran asing ringgit dan mengelakkan turun naik yang ketara dalam kadar pertukaran. Ini adalah penting memandangkan Malaysia merupakan sebuah ekonomi yang sangat terbuka dengan aktiviti perdagangan dan pelaburan antarabangsa yang tinggi. Usaha-usaha yang dilaksanakan untuk membangunkan dan memperdalamkan pasaran pertukaran asing dalam negeri dari segi saiz dan instrumen juga telah membolehkan peniaga tempatan untuk berlindung daripada terdedah kepada ketidakstabilan kadar pertukaran melalui perlindungan nilai.

**NO. SOALAN: 84**

**PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KETIGA BELAS  
DEWAN RAKYAT**

---

**PERTANYAAN : LISAN**

**DARIPADA : YB DATO' HAJI MAHFUZ BIN OMAR  
[ POKOK SENA ]**

**TARIKH : 18 MEI 2015 (ISNIN)**

**SOALAN :**

**Dato' Haji Mahfuz bin Omar [ Pokok Sena ]** minta **PERDANA MENTERI** menyatakan adakah pihak-pihak industri telah dirundingkan sebelum Garis Panduan Hiburan Dalam Islam (Edisi Kedua) dikeluarkan dan sama ada pihak Jabatan Agama Islam Wilayah Persekutuan (JAWI) berhasrat menggunakan garis panduan tersebut untuk tujuan penguatkuasaan.

**JAWAPAN: (YB MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI )**

Tuan Yang di-Pertua,

Garis Panduan Hiburan Dalam Islam (Edisi Kedua) 2015 yang diterbitkan oleh Jabatan Kemajuan Islam Malaysia (JAKIM) disediakan setelah melalui beberapa proses iaitu:

- i. semakan semula terhadap Garis Panduan Hiburan Dalam Islam tahun 2007;
- ii. kajian terhadap perkembangan industri hiburan semasa;
- iii. dan beberapa siri perbincangan dan bengkel dengan pihak-pihak yang berkaitan, iaitu wakil-wakil pihak industri serta mereka yang berkepakaran dalam bidang ini terdiri daripada pensyarah pusat pengajian tinggi dan ulama.

Untuk makluman Ahli Yang Berhormat, perbincangan khusus dalam proses penggubalan yang melibatkan wakil pihak industri hiburan telah diadakan sebanyak tiga kali. Mereka yang hadir ialah wakil-wakil Jabatan Penyiaran, Kementerian Komunikasi dan Multimedia Malaysia, TV AlHijrah, Majlis Usahawan Nasyid Malaysia (MUNSYID), bekas juri Anugerah Seri Angkasa, Bahagian Media Jakim dan personaliti pengiat seni hiburan.

Objektif Garis Panduan Hiburan Menurut Islam Edisi Kedua ini adalah seperti yang berikut:

- (i) memberi panduan kepada pihak yang terlibat dalam aktiviti dan industri hiburan untuk berkarya tanpa melepas batasan syarak;
- (ii) membantu para pengajur dan pihak penerbit dalam menyusun atur program yang mengandungi aspek hiburan sejajar dengan

- didikan Islam dengan mengambil kira keperluan masyarakat, bangsa, agama dan negara;
- (iii) membantu pihak berkuasa untuk memastikan penganjuran program hiburan dalam bentuk tontonan terpimpin kepada masyarakat secara umumnya berteraskan akidah, syariah dan nilai-nilai akhlak; dan
  - (iv) memupuk kefahaman di kalangan masyarakat awam mengenai bentuk hiburan yang dianjurkan dalam Islam.

Berdasarkan kepada objektif garis panduan tersebut, Jabatan Agama Islam Wilayah Persekutuan (JAWI) akan mengambil pendekatan dalam bentuk memberi panduan dan nasihat kepada pihak-pihak yang terlibat dalam pelaksanaan program-program hiburan di Wilayah Persekutuan.

Sekian, terima kasih.

**PEMBERITAHUAN PERTANYAAN  
DEWAN RAKYAT**

**PERTANYAAN : BAGI JAWAB LISAN**

**DARIPADA : Y.B. DR. MOHD HATTA BIN MD. RAMLI  
[ KUALA KRAI ]**

**TARIKH : 18 MEI 2015 (ISNIN)**

**SOALAN : 85**

**(a) Y.B. Dr. Mohd Hatta bin Md. Ramlie [ Kuala Krai ] minta MENTERI PENGANGKUTAN menyatakan:**

- (i) bilakah perkhidmatan kereta api sektor Dabong-Tumpat akan dipulihkan; dan**
  
- (ii) bilakah perkhidmatan sepenuhnya kereta api KL-Tumpat dijangka dipulihkan.**

## **JAWAPAN**

Tuan Yang di-Pertua,

Untuk makluman Ahli Yang Berhormat, banjir besar yang melanda sektor Pantai Timur bagi laluan Kuala Lipis ke Tumpat pada bulan Disember 2014 telah mengakibatkan kerosakan teruk kepada infrastruktur keretapi dan stokereta di sektor ini serta menyebabkan landasan di sektor ini tidak selamat untuk operasi keretapi.

Untuk makluman Ahli Yang Berhormat juga, perkhidmatan keretapi bagi sektor Dabong-Tumpat serta KL-Tumpat hanya akan dapat kembali beroperasi setelah pemulihan infrastruktur keretapi dan stokereta yang menyeluruh bagi sektor Pantai Timur terutama bagi kawasan yang terjejas dengan banjir iaitu dari Kuala Lipis ke Tumpat disiapkan. Melalui program pemulihan ini, tempoh penyiapan akan mengambil masa dari 12 bulan sehingga 24 bulan. Program pemulihan ini dijangka akan mula dilaksanakan pada Ogos 2015.

Permohonan kepada Kementerian Kewangan untuk kelulusan pelaksanaan secara tender telah dikemukakan dan proses pelawaan tender akan dilaksanakan dengan kadar segera.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATO' SERI ONG KA CHUAN  
(TANJONG MALIM)**

**PERTANYAAN : LISAN**

**TARIKH : 18.05.2015**

**Y.B. DATO' SERI ONG KA CHUAN [ TANJONG MALIM ]** minta **MENTERI KEWANGAN** menyatakan apakah perancangan Kerajaan untuk menangani masalah hasil daripada penyusutan Ringgit Malaysia berbanding dengan mata wang utama seperti dolar Amerika Syarikat dan dolar Singapura.

**JAWAPAN**

Tuan Yang di-Pertua,

Penyusutan kadar pertukaran nilai ringgit sejak September 2014 bukanlah

suatu kes terpencil dan ianya didorong terutamanya oleh faktor luaran. Mata wang serantau yang lain, termasuk ringgit Malaysia turut mengalami penyusutan nilai antara 1% sehingga 11.2% berbanding dolar AS sejak September 2014 hingga 13 Mei 2015. Pengukuhan dolar AS adalah disebabkan oleh prospek ekonomi AS yang semakin baik dan kemungkinan kenaikan kadar faedah di AS yang menarik minat pelabur terhadap aset dalam nilai dolar AS. Selain itu, negara-negara pengeksport komoditi, termasuk Malaysia, turut mengalami kesan ekoran kejatuhan harga minyak mentah dunia.

2. Berdasarkan perkembangan terkini, prestasi mata wang ringgit telah semakin pulih dan lebih stabil. Malahan, ringgit merupakan antara mata wang yang telah mencatatkan prestasi terbaik berbanding mata wang serantau sejak April 2015. Ringgit menambah nilai sebanyak 3.1% berbanding dolar AS. Ringgit juga menambah nilai berbanding semua mata wang serantau antara 0% sehingga 6.8%. Penambahan nilai ringgit adalah terutamanya disumbangkan oleh kenaikan harga minyak mentah global. Nilai ringgit juga turut meningkat disebabkan oleh penyusutan nilai dolar AS berikutan jangkaan pasaran terhadap penangguhan US Federal Reserve (Fed), dengan izin, untuk mengembalikan kadar faedah ke paras

yang lebih wajar.

3. Seperti mana-mana sistem kadar pertukaran yang fleksibel, turun naik jangka masa pendek adalah sesuatu yang mungkin berlaku, terutamanya dalam persekitaran global yang tidak menentu. Objektif dasar Kerajaan menerusi Bank Negara Malaysia (BNM) adalah untuk memastikan keadaan yang teratur dalam pasaran pertukaran asing ringgit dan mengelakkan turun naik yang ketara dalam kadar pertukaran. Ini adalah penting memandangkan Malaysia merupakan sebuah ekonomi yang sangat terbuka dengan aktiviti perdagangan dan pelaburan antarabangsa yang tinggi. Usaha-usaha yang dilaksanakan untuk membangunkan dan memperdalamkan pasaran pertukaran asing dalam negeri dari segi saiz dan instrumen juga telah membolehkan peniaga tempatan untuk berlindung daripada terdedah kepada ketidakstabilan kadar pertukaran melalui perlindungan nilai.

**PEMBERITAHUAN PERTANYAAN  
MESYUARAT KEDUA, PENGGAL KETIGA  
PARLIMEN KETIGA BELAS  
DEWAN RAKYAT**

---

**PERTANYAAN : LISAN**

**DARIPADA : YB TUAN LIM KIT SIANG [ GELANG PATAH ]**

**TARIKH : 18 MEI 2015 (ISNIN)**

**SOALAN :**

Tuan Lim Kit Siang [ Gelang Patah ] minta **PERDANA MENTERI** menyatakan secara jelas pendirian Kerajaan Persekutuan mengenai cadangan penggubalan undang-undang jenayah Syariah yang tidak serasi dengan peruntukan Perlembagaan Persekutuan dan bertentangan dengan semangat kenegaraan Malaysia dan sama ada beliau bersetuju bahawa sebarang usaha untuk mengubah ketetapan Perlembagaan Persekutuan ini akan memecahbelahkan negara.

**JAWAPAN: (YB MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI )**

Tuan Yang di-Pertua,

Untuk makluman Ahli Yang Berhormat, berdasarkan Fasal (2) Perkara 74 dan butiran 1, Senarai Negeri, Jadual Kesembilan, Perlembagaan Persekutuan, undang-undang Islam diletakkan di bawah bidang kuasa

Negeri. Kuasa Negeri berkenaan dengan pewujudan dan penghukuman kesalahan terhadap perintah agama Islam hanya terpakai bagi orang yang menganut agama Islam sahaja dan setakat yang dibenarkan oleh undang-undang Persekutuan. Bagi maksud tersebut, Pihak Berkuasa Agama Negeri telah menggubal dan menguatkuasakan undang-undang kesalahan berkaitan Syariah di negeri masing-masing.

Pada masa ini, Kerajaan Persekutuan sentiasa berusaha untuk memartabatkan pentadbiran keadilan Syariah termasuk memperluaskan bidang kuasa Mahkamah Syariah, menaik taraf sistem kehakiman Syariah, menyemak semula kedudukan Hakim-Hakim Mahkamah Syariah dan memantapkan aspek penguatkuasaan dan pendakwaan Syariah di negara ini.

Sekiranya mana-mana Kerajaan Negeri berhasrat untuk melaksanakan **undang-undang jenayah Syariah**, peruntukan undang-undang sedia ada perlu diteliti bagi memastikan pelaksanaan undang-undang tersebut selaras dengan Perlembagaan Persekutuan dan undang-undang yang sedang berkuat kuasa, agar dapat memenuhi prinsip-prinsip keadilan dan kesaksamaan dalam penghukuman.

Oleh yang demikian, pelaksanaan undang-undang Islam hendaklah dibuat secara teratur mengikut kerangka Perlembagaan Persekutuan khususnya aspek pemakaian undang-undang Islam tersebut yang terhad kepada orang Islam sahaja bagi menjamin kestabilan dan keharmonian negara terpelihara.

Sekian, terima kasih.

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA : Y.B. DATUK RAIME BIN UNGGI**  
**(TENOM)**

**PERTANYAAN : LISAN**

**TARIKH : 18.05.2015**

**Y.B. DATUK RAIME BIN UNGGI [ TENOM ]** minta **MENTERI KEWANGAN** menyatakan sejauh manakah kecelikan peniaga, usahawan, pembekal, pemborong, pengusaha dan peruncit dalam memahami sistem Cukai Barang dan Perkhidmatan (GST) sejak dilaksanakan 1 April 2015 lalu.

**JAWAPAN**

Tuan Yang Dipertua,

Kerajaan telah menjalankan usaha berterusan untuk memberi kefahaman

tentang pelaksanaan GST kepada golongan sasaran melalui program penerangan GST dan program *Hand Holding* yang dijalankan mengikut sektor-sektor industri secara lebih mendalam. Melalui usaha-usaha yang telah dijalankan, didapati tahap pematuhan GST oleh kebanyakan SME dan syarikat kecil telah meningkat setelah lebih sebulan GST dilaksanakan.

Bagi memastikan tahap pematuhan ini meningkat, Kerajaan akan terus melaksanakan pelbagai program kesedaran dan latihan GST kepada semua lapisan masyarakat termasuk peniaga bagi meningkatkan kefahaman yang tepat mengenai GST. Kerajaan melalui Jabatan Kastam Diraja Malaysia (JKDM) juga akan terus melaksanakan program *Hand Holding* kepada syarikat-syarikat yang telah mendaftar GST bagi memudahkan pemahaman yang terperinci mengenai pelaksanaan GST. Sehingga 30 April 2015, sebanyak 468 program *Hand Holding* telah diadakan dengan penyertaan lebih daripada 50,000 orang dari pelbagai sektor perniagaan.

Selain itu, JKDM juga telah menubuhkan *GST Helpdesk* di seluruh negara bagi membantu dan membimbing peniaga dalam menguruskan sistem GST. JKDM turut memuat naik video panduan membuat

pembayaran GST dan panduan mengemukakan penyata GST di portal *gst.customs.gov.my* bagi memudahkan peniaga membuat tuntutan atau pembayaran GST.